

EDOJJOSHAHUA PAMEYA JESOSAJA EPEEJJI PEA JJASHAHUABAQUIME PO MEE CANI LOS HECHOS

¡Ishoacue Edojjoshahua Pameja epoejji! —Jesosa poanaje

1 ¹Ecuea epeeji Teopino, eyaya, Noca bajjaniya jiquio esohui tehueaña miquea ebajji. Yahuajo eyaya miya huohuinaje Jesosajo ma ohua acanaje oja Chiija jjequisohua'yo jjimahuaa. Ojaya ehuhui cuanajo pea'ai eyaya tehuenaje. Maya eyaya mi que tehuenaje ecuea ebionei esohui etehue'yojo. ²E'e, eyahuasijje sohuaqui'yo jjimahuaa Jesosaa Edojjoshahua Pame nijjeya o shajja'ajjajji cuana sohuihuohui canaje. Ma dejja cuana oja babaca'yo, oja huoojea'yo cuana ojaya esohui huohuijji epojji. ³E'e, Jesosa yahuajo quea nee nee poanaje. Mano'yonaje. Mano'yo majje shequi o'oyanaje. Shequi o'oya majje oya poe o'oyanaje o shajja'ajjajji cuana huasijje. Quea huiso ma dejjaa ajjima acani acanaje Jesosaa quea ja'a nee nee, ojjañaja ebajji oya e'e jojo nei eshe o'oya. Jesosaa oya cuana ba mee canaje Eyacuiñajji eyajo ojjaña huoojeajji poani. Shequi o'oya majje Jesosa oya cuana nijje nequi o'oyanaje quea huiso cahuime, 40 cahuime. ⁴Ijjia'ijjia aniya ohuaya oya cuana huohui canaje jama ba'a: —¡Jenosanena cuiñajji esecue yasijje a'a cuayaquijji! Eyacuiñajjiya ojaya esohui jayojja jama acaje'yo; ojaya Edojjoshahua Pame huoojea caje miquiana que dobiqúiya. ¡Ishoacue Edojjoshahua Pame! Yahuajo eyaya miquianaya jamaya huohuinaje —Jesosa poanaje—. ⁵E'e, Huaniya yahuajo pishana quea huiso cuana enajo besa mee canaje Eyacuiñajjijo. Quijje pishana ca ca Edojjoshahua Pame miquiana que dobiqúiye'yo —Jesosa poanaje.

Jesosa Eyacuiñajjiya eyahuasijje jjequisohua ca'yonaje

⁶E'e, o shajja'ajjajji cuaa onijje nequi o'oya majje Jesosa huohui'ajja canaje jama ba'a: —Emeshi Mese Jesosa, ¿a'a jjeyahua nei miya Isaeni cuanaja Emeshi Mese poaje'yo jiquio meshijo? —acanjaje cuaa.

⁷Jesosaa oya cuana saja'a canaje: —Cua'a, Eyacuiñajjiya eba ojaye nei, esejaya Chii eyajo anija ojaya eba. Ache shono, ache ba'ijo shai miquianajaya ba jjima.

⁸Jamatii, Edojjoshahua Pame miquiana que dobiqui majje ohuaya miquianaya sohuihuohui meesahua caje quea ja'a nee. Miquianaya ecuea esohui huohuijji poaje'yo. ¡Jenosanenajo, Jodio meshijo, Samania meshijo, ojjaña meshi quea huesha nee yasijje pea'ai ecuea esohui huohuiquicue! —Jesosa poanaje.

⁹Jamaya huohui canijo tii, onaaya ba neinei caqui tii, Eyacuiñajjiya Jesosa jjequisohua ca'yonaje eyahuasijje. Bo dojjo huasijje dobiqui'yajo, oja epeejji cuaa oya ba pajea ca'yonaje. ¹⁰Jesosa ba'esohuaquianajo, ojaya epeejjiya eyahuasijje ba neinei caquijo tii, Eyacuiñajjiya esohuidojojji cuana becamejjijji pea'ai jjanequipanaquinaje ona nijje. Ojaya daqui quea oshe nee nee poanaje. ¹¹Oya jama poanaje ba'a: —Miquianaaya, Janinea meshijo ba'e cuaa, ¡shajja'ajjacue mo! Miquianaaya Jesosa banaje ba'esohuaquije'yo eyahuasijje. Qui'ajjaya oya poeje o'oya quijje, e'e jojo nei —esohuidojojji poanaje.

Matia babaca canaje cuaa Jesusaja huoojea'yo esohui huohuijji epojji Jodasa jjoco cuiña'yojji epojji

¹²Jjeyahua nei Jesusaja epeejji cuana acuijjajja yiyejo, Onimo jjajja yiyejo nequi Jenosanena huasijje poqui o'oyanaje; huesha'ama poanaje, beshahua nei beca mil metros. ¹³Oya cuanaja ojaya equi yahuajo aninaje yasijje dobiqui o'oyanaje. Ejamacoo equecuayijji ai yasijje dobiqui o'oyanaje mahuiso ba'a: Peno, Jacobo, Huani, Anesi, Penipe, Tomasi, Batanomee, Mateo, Simoni Senote, Apeoja bacua ejja Satiaco, oja chahua Jode bajjani pea'ai; mahuisoya. ¹⁴Oya cuana epona cuana nijje, Jesusaja enaese Mania pea'ai, Jesusaja echahua mese cuana pea'ai Eyacuiñajji nijje mimi majamajanaje, ojjaña.

¹⁵Quijje pishana ojjaña jjachichaquinaje quea huiso nee; beshahua nei 120 huisome yaninaje. Majoya Peno nequisohuanaje emimijji. ¹⁶Jama poanaje ba'a: —Ecuea epeejji cuana, Eyacuiñajjiya esohui yahuajo nei etehue'yo jayojja jama jjeyahua nei apoa poanaje. Edojjoshahua Pameya yahuajo Dabi huohui meesahua canaje Jodasajo, ma Jesosa inameejji poanaje onajaya equecua'yojji. ¹⁷Yahuajo Jodasa ecuana nijje nequinaje. Jesusaa oya babaca canaje. Jamatii oya esohui huohuijji nisho poanaje. ¹⁸Jodio etii cuaa aje oe Jodasa ejjeshejji quia canaje Jesosa iña meesahua sosejje. Ma Jesosa sosejje quia bejjo meshi jjjeshejji acanjaje cuaa. Quijje Jodasa acui aajo jjanaaninequiaqui majje tohuaanaje mishi yasijje; oquequinaje janobajjima nei. Jjajjono sejjaqui majje jjasapa cuiapojoeaquiñaquinaje. Jjamajjii cuiapojoeaquiñaquinaje. See ai cuayaquinananaje pea'ai. ¹⁹Ojjaña Jenosanenajo ba'eja Jodasa eba poanaje

jomajo mano'yonaje. Jamajjeya oya cuaa ma meshi bajjani canaje Asedama meshi ojaya esohuijo. Ese Ejja esohuijo Ena' Cuayaquinaje Meshi bajjani acanaje cuaa. ²⁰E'e, yahuajo nei Dabiya esohuicuyajjijo Salmojo jama tehueme aca poa ba'a: "Ojaya equi cajiña ca'yahua tii. ¡A'a equi cuiña mee'yojji!" Jama yahuajo nei tehue ca poa ojo pea'ai ba'a: "Eyaya oya cajaa anaje. Jamajjeya peaa ecuea esohui cahuohui cahua" jamaya yahuajo nei tehue ca poa Jodasajo.

²¹—Jamajjeya Jodasa chamajo pea dejja ejjababacaqui ecuana nijje esohui huohuijji. Ejjababacaqui joya Jesosaja esohui shajja'ajjajji epo nei, ma Jesosaa dejjaa ajjima acani ba epo nei, joya ese nijje Jesosaja epeeji poanaje. ²²E'e, joya yahuajo Jesosa Huaniya enajo besa mee caqui ba epo ejjababacaqui; joya Jesosa nijje tii jjapeequinequinaje, eyahuasijje sohuaquije'yo ba epo. Jamajjeya ma dejjaa ecuana nijjeya Jesosa shequi'yonaje cahuohui cahua —Peno poanaje.

²³Jamajjeya ojjaña cuaa becanejjijji pea'ai dejja babaca ca'yonaje. Matia, pea Jose Basaba, ojaya pea bajjani Josoto. ²⁴⁻²⁵Babaca majje oya cuana Emeshi Mese nei nijje eyajo ani nijje miminaje jama ba'a: —Emeshi Mese nei, miquea eba ojjañaja ejjashahuabaquijji cuana. ¡Ecuana ba meesahuacue ache edejja miquea ebabaca miquea ehoojea'yo epojji! E'e, Jodasa miquea esohui pajea'yo majje mano'yonaje; cuaqui yasijje poqui'yonaje. Jamajjeya Jodasa chamajo peaa miquea esohui cahuohui cahua —jamaya Eyacuiñajji nijje miminaje cuana.

²⁶Majoya oya cuana quebanei jayojja poanaje ache dejja esohui huohuijji nequije ebajji. Babaca canaje Matia esohui huohuijji poaje. Jamajjeya Matia pea 11 huisome nijje nequi'yonaje Jesosaja huoojea'yo esohui huohuijji epojji.

Edojjoshahua Pame Jesosaja epeeji cuana huasijje poeyanaje

2 ¹Bobi chichajji shejo, Petecote pojjajo bobi chichajeyo majje Jodio cuana quea bihui nee ojee ijjiia'ijjiia aninaje. Ma pojjajo Jesosa shajja'ajjajji cuana, oja huoojea'yo esohui huohuijji cuana pea'ai, pea epeeji cuana nijje ojee jjachichaquinaje oe equijo. ²Jyehua nei Edojjoshahua Pame beni quea quemo jjaqueyaquiani jayojja eyajo shajja'ajja canaje ojjaña. Edojjoshahua Pame equi yasijje dobiquinaje. ³Majoya cuaqui jiji sisi jayojja ojjañaja esapa biajje nequinaje. Oe cuaqui jiji sisi oe epeejjija esapa biajje jijjinequinaje. Jamaya ojjaña poanaje. ⁴Edojjoshahua Pame ojjaña cuana huasijje dobiqui'yonaje. Majoya jjeya nei oya cuana pea mimi'yome poanaje. E'e, Edojjoshahua Pameya oya cuana pea mimime po meesahua ca'yonaje.

⁵Quea huiso Jodio cuaa ojjaña meshijo ba'yani cuaa Jenosanenajo ba'ecaa Eyacuiñajjija esohui yahuajo nei jayojja bihuiameya acani. ⁶Jamajjeya beni quea quemo eyajo poeyani jayojja shajja'ajja majje ojjaña cuajicuajjibenaje Jesosaja epeeji cuana huasijje. Jesosaja epeeji cuana pea mimi'yome mimiani shajja'ajja majje Jesosaja epeeji pojjeama quea mete nee jama poanaje ba'a: —¿Yajjajje shai Jesosaja epeeji cuana pea mimi'yome poani so'o, de? ¿Yajjajje shai joya esejaya esohuijo mimiani, de?

⁷ Jamajjeya quea mete poanaje. Huohui'ajja canaje jama ba'a: —E'e, ojjaña jiquio deja cuana Janinea meshijo ba'e. ⁸ ¿Yajjajo shai jiquio pea esohiyo mimi cani so'o? ¿Ma ecua eseyaya esho'yahuaa shajja'ajjanaje jayojjaya seya jjeya shajja'ajjaña cuana? ⁹ E'e, jiquioyo yani deja cuana quea huiso meshijo ba'e: Deija cuana Patia meshijo ba'e, Madia meshijo ba'e, Enami meshijo ba'e, Mesopotamia meshijo ba'e, Jodea meshijo ba'e, Capanosia meshijo ba'e, Ponito meshijo ba'e, Asia meshijo ba'e pea'ai yani. ¹⁰ Pea cuana Pichia meshijo ba'e, Panipinia meshijo ba'e, Ejito meshijo ba'e, Apica meshijo ba'e, Sinene meshi oje mijije ba'e pea'ai yani. E'e, Jodio deja cuana, Jodioja epeeji cuana Shoma meshijo ba'e cuana yani. Maaya Jodio pojjeama cuaa Jodioja ehuohui'yo Eyacuiñajjiyo shajja'ajja cani. ¹¹ Beca cuana Queta meshijo ba'e, Anamia meshijo ba'e yani pea'ai. Jamatii ojjaña eseyaya esejaya esohiyo Eyacuiñajjiya ma dejjaja ba jjima acanaje cuana quea pame nee shajja'ajjaña, ma Jesosaja epeeji cuaa huohui canijo —poanaje ojjaña.

¹² Jamajjeya quea mete po majje pea cuana nijje mimimiminaje jama ba'a: —¿Yajja shai poani?

¹³ Pea cuana ca ca Jesosaja epeeji cuanajo soa neineinaje. Jama poanaje ba'a: —Chojja, de. Oya cuana jja ca quea huiso ishi'ishinaje. Huoocui —poso acanaje cuaa.

Penohua esohui huohui canaje

¹⁴ Majoya Penohua pea Jesosaja huoojea'yo esohui huohuijji cuana nijje, ¹¹ huisome nijje ojee nequisohua majje janobajjima nei sohuihuohui canaje jama ba'a: —Deija cuana Jodio meshijo ba'eya, ojjaña Jenosanenajo ba'eya pea'ai, ijjeyahua nei mo nequiaa shajja'ajjacue! Eya Jodio pea'ai. Jamajjeya eyaya miya jjabahuejjaqui meeje'yo. ¹⁵ ¿A'aya ecua ehuoo poso aña? Jjeya mecajjeahua nei ishi'ishi ajja cuana. ¹⁶ Chojja. Jamajjeya jshajja'ajjacue! Yahuajo nei nei Eyacuiñajjiya esohui huohuijji Joeni bajjani jama poa ba'a:

¹⁷ “Eyacuiñajji jama poani ba'a: Quijje jiquio meshi beshahua nei apoa poajo, eyaya Edojjoshahua Pame huoojeaje'yo ojjaña huasijje. Edojjoshahua Pameya esho'i, epona sho'i cuana pea'ai huohui meesahua caje ma eyaya quijje nei aje. Ohuaya deja etii pishana cuana jjacahuibaqui mee caje. Edeja tii cuaa caluiba majje huohui caje pea'ai. ¹⁸ E'e, eyaya Edojjoshahua Pame huoojeaje'yo ecua echacojji cuana que, epona, deja cuana que pea'ai. Edojjoshahua Pameya ecua esohui huohui meesahua caje pea cuana huasijje. ¹⁹ Quijje eyaya ma dejjaa ajjima acani aña eyajo ba majje deja cuana quea mete poaje. Jiquio meshijo ma dejjaa ajjima acani eyaya aje pea'ai ojjaña ebaaji eya quea ca'a nee nee. E'e, quea huo'o nee ena' jayojja poaje eyajo, meshijo pea'ai. Cuaqui quea quemo poaje. Huichacha quea quemo nee, quea moo nee nee poaje. ²⁰ Eshequi quea apo nee poaje. Ba'i quea huo'o nee ena' jayojja poaje. Majoya Emeshi Mese nei poeje o'oya. Ma pojajajo ojjaña ba caje Emeshi Mese nei quea ca'a nee nee, quea pame nee nee poani.

²¹ Jamajjeya ojjaña Emeshi Mese nei nijje camimiahua jama ba'a:

—Emeshi Mese nei, ¡eya jaahuanacue! ¡Ecuea mimishi cuijea'yocue!

—Jamaya onijje mimi'yajo, ohuaya oya cuana jaahuana caje'yo; ba'e tiitii mee caje'yo eyajo, cuaqui yasijje huoojea'yo jjima acaje pea'ai”.

Jamaya yahuajo nei nei Joeniya tehue ca poa Eyacuiñajjija esohui —Peno poanaje.

²² Majoya Peno jama poanaje ba'a: —Dejja cuana Isaeni meshijo ba'e, ¡shajja'ajja neineicue mo! Jesosa ma Nasanenajo ba'ya poa miquiana nijje nequinaje. Eyacuiñajjija Jesosaa ma dejjaa ajjima acani amesahua canaje quea huiso nee nee. Jamaya miquianajaya eba —Penohua acanaje—.

²³ Jamatii Jesosa iña majje miquianaaya oya ona huasijje quianaje. E'e, miquianaaya Jesosa quia'yonaje dejja mase yasijje, acui ecueata'apeejo emano mee'yojji. Jamatii yahuajo nei jamaya Eyacuiñajjija ejjashahuabaqui'yoyji poa. ²⁴ Jamajjeya Eyacuiñajjija Jesosa shequi mee ca o'oyanaje. E'e, Jesosa jjanijo ehuananobia jaa tiitii ajja poa; emano'yo tii po mee'yo jjima acanaje.

²⁵ Yahuajo emeshi mese Dabiya Jesosajo huohui ca poa jama ba'a:

“Ecuea Emeshi Mese nei enijje ani tiitii'ya poa. Ohuaya eya jaahuana tiitii canijo, eya mete'ama poaje'yo. ²⁶ Jamajjeya eyaya quea jaji neeya Eyacuiñajji bihuiaña. Eya jjanijo ehuananobia jaa shequije o'oya, yamiña. Ihui'yo ajja poaje. Jamaya ecuea eba. ²⁷ Miyaya eya jeana'yo ajja pea emano'yo cuana nijje. Jamajjeya eya mete'ama. Eya miquea quea boti nee. Jamajjeya eya meshijo ihui'yo ajja poaje'yo. ²⁸ Miyaya eya ba'e meeje o'oya quea pame nee. Minijje nequi tiitii meeje'yo. Quea bihui nee eya poani”.

Jamaya yahuajo nei Dabiya huohui ca poa Jesosaja esohui —Peno poanaje.

²⁹ Penohua huohui canaje jama pea'ai ba'a: —Epeejji cuana, e'e jojo nei esejaya etiiquiana Dabi yahuajo nei mano'ya poa. Jjeya oya ehuananobia jaa jjanijo. Jamaya esejaya eba. ³⁰ Dabi ca ca Eyacuiñajjija esohui huohuijji poa. Eyacuiñajjija oya huohui ca poa jama ba'a: “E'e jojo nei miquea osecua quijje nei cuayaje eyaya Emeshi Mese nei po meeje'yo”.

³¹ E'e, yahuajo nei Dabiya eba poa quijje nei Jesosa, Eyacuiñajjija huoojea'yo ojjaña jaahuanajji shequije o'oya. Jamajjeya Dabiya huohui ca poa jama ba'a: “Miyaya oya jeana'yo ajja pea emano'yo cuana nijje. Oya meshijo ihui'yo ajja poaje'yo” jamaya Dabi yahuajo nei poa.

³² Penohua ojjaña cuana huohui ca o'oyanaje: —E'e jojo nei Eyacuiñajjija Jesosa shequi mee ca'yonaje; ecuanaaya Jesosa ba o'oyanaje, eshe, de.

³³ Eyacuiñajjija Jesosa nequi tiitii mee ca'yonaje eyajo onijje, o ebiane mijiijje ojjaña huoojea'yoyji. Eyacuiñajjija esohui yahuajo jayojja jama Edojjoshahua Pame Jesosa que dobiqul'yonaje. Jesosaa ma Edojjoshahua Pame jjeyahua nei huoojea canaje ecuana que dobiquiya. Jiquia aje jja oya nequiaa banaje. Ojaya epoe'yo miyaya shajja'ajjanaje pea'ai. ³⁴ ¡Bacue, Dabi ca ca oma sohuaqui jjima eyahuasijje yamiña! Ohuaya huohui ca poa jama ba'a:

“Eyacuiñajjiya ecuea Emeshi Mese nei huohui canaje jama ba'a: ¡E pejjejo anioquecue, ebianeí mijijje, enijje ojjaña huoojea'yojji!

35 ¡Jjeyahua nei ojjaña joya minijje jjapeequi ajja eyaya miya huoojea meeje'yo!”

Jamaya Dabiya tehue ca poa Jesosajo yahuajo.

36 Penohua jama acanaje pea'ai ba'a: —Isaeni dejja cuana, ¡shajja'ajja neineicue! Miquianaaya ca ca oe Jesosa acui ecueata'apeejo ba'ehuanasohuajeanaje; mano mee'yonaje. Eyacuiñajjiya ca ca Jesosa ojjañaja Emeshi Mese nei po mee ca'yonaje. Ohuaya Jesosa Quito ojjaña jaahuanaa huoojea ca'yonaje pea'ai —acanaje Penohua.

37 Ma shajja'ajja majje ojjaña jomajo nequica quea yeno nee nee poanaje. Jamajjeya Peno nijje, ojjaña Jesosaja huoojea'yo esohui huohuijji cuana nijje jama poanaje ba'a: —Epeejji cuana, ¿yajja acue poaje? Eseja iña mee'yo, eseja quecua mee'yo ca jja ca oe, de.

38 Penohua saja'a canaje jama ba'a: —¡Miquianajaya mimishi cuana pajea'yocue! ¡Jesosa nijje jjapeequicue! Majoya Eyacuiñajjiya esohui huohuijjiya miquianaya besa mee caje Jesosa Quitojo. Jamajjeya ojjaña ba caje miquianaya Jesosaja epeejji poani. E'e, Jesosa Quitohua miquianajaya mimishi cuana cuijea caje'yo. Ohuaya miquiana que Edojjoshahua Pame huoojea caje'yo pea'ai. 39 E'e, Eyacuiñajji Edojjoshahua Pame huoojea sa poani miquiana que, miquea ebacua cuana que pea'ai, ojaya epeejji cuana ojjaña meshijo ba'eca huasijje pea'ai, ojjaña Eyacuiñajjiya eabaca huasijje pea'ai —Penohua acanaje.

40 Penohua quea huiso pea esohui huohui canaje. Jama acanaje ba'a: —¡Dejja quea mimishi jama a'a pojji! ¡Oya cuana nijje a'a jjapeequijji! Eyacuiñajjiya mimishi cuana quea nee nee po mee caje'yo, quea nee tii tii.

41 Quea huiso cuana Penoja esohui shajja'ajja majje Jesosa nijje jjapeequinaje. Jamajjeya Penohua oya cuana besa mee canaje Eyacuiñajjiyo enajo. E'e, ma pojajajo tii quea huiso nee nee Jesosaja epeejji po'yonaje, 3.000 huisome. 42 Jamajjeya oya cuaa Jesosaja huoojea'yo esohui huohuijji cuanaja esohui shajja'ajja canaje; jamaya acanaje pea'ai. Ojee jjapeequinaje pea'ai. Ojee Jesosaja bobi ijja canaje pea'ai. Eyacuiñajji nijje mimi majamajanaje, ojjaña.

Jesosaja epeejji cuana jamaya ba'e cooa poa

43 Edojjoshahua Pameya Jesosaja huoojea'yo esohui huohuijji cuana ma dejjaa ajjima acani ameesahua canaje quea huiso. Jamajjeya ojjaña cuana jama poanaje ba'a: —E'e de, jiquio esohui huohuijji cuaa ma dejjaa ajjima acani quea huiso nee nee acanaje —poanaje cuana.

44 Jesosaja epeejji cuana ca ca huapa pojjeama cuana jayojja jama poanaje. Ojjaña dejja tai'lama, nishelui'lama pea'ai poanaje. 45 E'e, ojaya cuanaja aquiana cuana chicha majje quia canaje Jesosaja epeejji jaahuanajji cuana huasijje. Majoya oya cuaa quia canaje ojjaña Jesosaja epeejji cuana huasijje. Joya aema' poani quea huiso quia canaje; joya aquianajji ca ca oe pojji quia canaje.

Jamaya ojjaña huasijje quia ca poquinaje. Jamajjeya ojjaña aquiana peaja huisoajjaya poanaje. ⁴⁶Ojjaña pojjajo ojjaña Jesusaja epeeji cuaa Eyacuiñajjija equi epeeyi yasijje jjachichaqui majje esohui huohui canaje. Jesusaja bobi ijija canaje peaja equi cuana huasijje. Pea equi cuanajo anica ojee ijija'ijija ca ani ojjaña quea bihui nee nee jjapeequinaje. ⁴⁷Ojee Eyacuiñajji bihuia majamaja canaje ojjaña pojjajo. Pea cuana Jesusaja epeeji cuana nijje quea bei poanaje. Eyacuiñajjija ojjaña pojjajo pea cuana Jesosa nijje jjapeequi meesahua ca'yonaje. Jamajjeya Jesusaja epeeji cuana quea huiso nee nee poanaje.

Jiojjijajja jjajiojji jeapiihuiqui'yonaje

3 ¹Majoya eshequi jjajeapaaquiajo Peno, Huani nijje poquinaje Eyacuiñajjija equi yasijje Eyacuiñajji nijje mimiya. Jamaya ojjaña pojjajo Jodio deja cuana Eyacuiñajji nijje mimi aninaje eshequi jjajeapaaquiajo. ²Oe deja ejiojji cojjasahuaajo aninaje meme aninaje, jiojjijajja. Oya jamatii cuaya jiojjijajja tii. Jamajjeya ojjaña pojjajo pea cuaa oya dojo canaje Eyacuiñajjija equi yasijje, Esecue jjani Bame Bame bajjani yasijje. Jomajo ohuaya eme' huo ca aninaje bobijo, ejjeshejjijo pea'ai. Oya jjashahuabaquinaje jama ba'a: —E'e pojj'a'aja deja cuaa Esecue Bame yasijje poe majje eya aquiana quia caje sosema'.

³Jamajjeya Peno, Huani nijje Eyacuiñajjija equi yasijje dobiquiajo, jiojjijajjaa o que eme' huo canaje. ⁴Jamajjeya Penohua Huaniya pea'ai jiojjijajja ba canaje. Jama acanaje ba'a: —¡Ecuana bacue!

⁵Aquiana sosema' sa poanaje. Jamajjeya Peno bajeasohua canaje, jiojjijajjaa. ⁶Jamatii Peno jama poa ba'a: —Ecuea epeeji, ecuea aquiana chama'. Ecuea ejjeshejji pea'ai chama'. Eya Jesusaja epeeji; joya ecue ani aje mi quiaje jama ba'a: Jesosa Quitohua ma Nasanenajo ba'ya poaa miya jeo meesahua caje'yo. Jamajjeya ¡nequisohuacue! ¡Jeocue oe! —acanaje Penohua.

⁷Penohua jiojjijajja ebianeí mejje iña majje nequisohua mee canaje. Jjeyahua nei ojaya ejiojji quea pame poanaje, quibojjisha quea pame poanaje pea'ai. ⁸⁻⁹Jamajjeya oya jjeyahua nei nequisohua majje jeonaje. Peno nijje, Huani nijje pea'ai Eyacuiñajjija equi yasijje dobiquinaje, equecuayijji yasijje ma Sanomoja equi bajjani yasijje. Oya quea jaji nee jeonaje. Tohuatohuaa poanaje. Eyacuiñajji bihuia canaje pea'ai. Ojjaña equijo nequiya oya ba canaje tohuana, Eyacuiñajji bihuia poequi pea'ai. ¹⁰Jiojjijajja yahuajo ojjaña eba. Eyacuiñajjija equi pejejo ani tiitiinaje, Esecue Bamejo. Aquianajo meme ania poa. Ojjaña quea bihui poanaje jiojjijajja jeoje'yo ba majje: —E'e de, oya jiojjijajja jeonaje jjeya nei —poanaje.

Penohua esohui huohui canaje Eyacuiñajjija equijo

¹¹Majoya ma jiojjijajja poanaje Peno nijje, Huani pea'ai nijje po'yonaje, bihuiabihuia'yo nequinaje. Eyacuiñajjija equijo equecuayijji bajjani Sanomoja equijo quea huiso cuana jjachichaqui canaje o baa. Ojjaña

quea bihui poanaje Penoja, Huanijo pea'ai. Jama poanaje ba'a: —¡Dee! Penohua, Huaniya pea'ai oya jiojjijajja jeo mee canaje. Quea ca'a nee nee oya, de, Eyacuiñajjija ma dejjaa ajjima acani —poanaje ojjaña.

¹²Ojjaña jjachichaquije ba majje, ojjaña esohui shajja'ajja majje pea'ai Penohua huohui canaje jama ba'a: —Dejja cuana Isaeni meshijo ba'e, ¡shajja'ajjacue mo! ¿Apiojji acuae ecuanaja esohuio miqúanaya quea ajjajja poani so'o? ¿Apiojji acuae jjashahuabaquiani jama ba'a: “Peno, Huani pea'ai Eyacuiñajjija epeeji quea ca'a nee nee poani. Jamajjeya jiojjijajja cuaya ohuaya jeo mee canaje” poani nequiana so'o, de? —poanaje Peno—. ¹³Chojja, ecuaaya pojjeamaa jiojjijajja jeo meenaje. ¡Bacue! Eyacuiñajjija Amajama, Isaaca, Jacobo, eseja pea etiúiana cuana pea'ai jaahuana ca poa. Jjeyahua nei ma Eyacuiñajjija ojaya Bacua Ejja Jesosa o pejejeo anioque mee ca'yonaje ojjaña huoojea'yojji. Miquianaaya ca mi ca Jesosa quianaje emeshi mese Pinatoja, equecua mee'yojji. Pinatohua Jesosa pichojea sa acajo, miqúanaya quea quene taanaje jama ba'a: “Jesosa me! cacacue! ¡Acui ecueata'apeejo ba'ehuanasohuajecue!” anaje nequiaa. ¹⁴Eyacuiñajjija Jesosa quea boti nee nee. E'e, Jesosa quea pame nee nee, mimishi'ama nei. Jamatii miqúanaya oya cajaa anaje jama ba'a: “¡A'a Jesosa pichojeajji!” taaajebenaje quianaaya: “¡Mashama' oe pichojea'yocue!” anaje quianaaya. Mashama' aje oe ona quecua'yojji epo, de. ¹⁵Miquianaaya ca ca oe Jesosa mano mee'yonaje, ma ojjaña ba'e tiiti mee'yojji epo. Eyacuiñajjija ca ca Jesosa shequi mee ca o'oyanaje. Jamaya ecuanajaya eba. E'e, Jesosa shequi o'oyanaje ecuaaya banaje. ¹⁶E'e, Jesosa quea ca'a nee nee nequi. Ohuaya ca ca oe jiojjijajja jeo mee canaje. Ecuana Jesosaja epeeji. Ojo jjashahuabaquiani jama ba'a: “E'e jojo nei Jesosaa jiojjijajja jeo mee caje” jamaya Jesosajo e'e jojo nei jjashahuabaquianijo, ohuaya quea ja'a nee po mee canaje jiquio dejja. Maya miqúanaya jjeya nei baña —Peno poanaje.

¹⁷—Epeeji cuana, ecuea eba miqúanaya, Jodio etii cuana nijjeya oya ba jjimajojo Jesosa quianaje onaja equecua'yojji. ¹⁸Yahuajo nei nei Eyacuiñajjija ojaya esohui huohuijji cuana tehue mee ca poa Jesosa Quitojo jama ba'a: “Quijje nei ecue huoojea'yo ojjaña jaahuanajji quea nee nee po mee caje'yo cuaa”.

Ma etehue'yo yahuajo nei jayojja jama jjeya miqúanaya anaje —Penohua acanaje—. ¹⁹⁻²⁰¡Jamajjeya Eyacuiñajjija esohui jayojja jama acue! ¡Miquianajaya mimishi pajea'yocue! ¡Jesosa nijje jjapeequicue! E'e, Eyacuiñajjija ojaya esohui yahuajo nei jayojja jama huoojea ca'yonaje ojjaña jaahuanajji Jesosa Quito ese jaahuanaa. Jamajjeya ohuaya esejaya mimishi cuana cuijea caje'yo; ese nijje quea bei poaje'yo. ²¹Jjeya Jesosa eyajo nequi oja Chii nijje. Jomajo oya ani'yo; ojjaña Eyacuiñajjija esohui jayojja jama apoa poajo oya Jesosa poeje o'oya. E'e, Eyacuiñajjija yahuajo nei nei ojaya esohui huohuijji cuana huohui mee ca poa jama ba'a: “Quijje ojjaña Eyacuiñajjija esohui ma ohua yahuajo nei huohui ca poa apoa poajo, Eyacuiñajjija huoojea'yo ojjaña jaahuanajji poeje o'oya ojjaña aquiana jiquio meshijo eyacua po mee'yohua”.

²²E'e —Penohua acanaje—, Eyacuiñajjija esohui huohuijji Moisesi yahuajo jama poa ba'a:

“¡Bacue! Eyacuiñajjiya eya huoojea canaje ojaya esohui huohuiya.

Quijje ohuaya pea esohui huohuijji e jayojja miqiuana que huoojea caje, miqiuana nijje meshijo ba'e. ¡Ojjaña ojaya esohui jayojja jama acue! ²³Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo”.

Jamaya yahuajo nei Moisesiya tehue ca poa Eyacuiñajjiya esohui —Penohua acanaje.

²⁴—E'e, yahuajo nei nei Eyacuiñajjiya esohui huohuijjiya Samoeni bajjaniya esohui quea pame nee huohui ca poa Jesosajo, Eyacuiñajjiya huoojea'yo ojjaña jaahuanajjiyo. Majoya ojjaña Eyacuiñajjiya esohui huohuijji cuana Samoeniya esohui jayojja jama huohui ca poquiapoquia poa quea huiso neeya. ²⁵Eseya Eyacuiñajjiya esohui huohuijji yahuajo nei ba'e cuanaja osecua cuana, etiiquianaja osecua cuana poanijojo Eyacuiñajjiya esohui yahuajo esejaya etiiquiana cuana nijje jayojja jama ohuaya eseya acaje jjeja nei pea'ai. E'e, yahuajo nei Eyacuiñajjiya Amajama huohui ca poa esejaya etiiquiana jama ba'a: “Quijje nei miquea osecuajo ojjaña cuana ojjaña meshijo ba'e quea bihui nee nee poaje” ²⁶Peno poanaje: —E'e Eyacuiñajjiya oja Bacua Ejja oe nei Jesosa ese yasijje, Jodio cuana huasijje huoojea canaje ebionei, esejaya mimishi cuana pajea meesahuaa. Jamajjeja eseya quea ja'a nee po mee caje'yo —Penohua acanaje Huani nijjeja.

Peno, Huani pea'ai iña canaje Jodio etii cuaa

4 ¹Majoya Penohua, Huani nijjeja ojjaña cuana huasijje Jesosaja esohui huohui canijo, Eyacuiñajji nijje emimijji cuana, Eyacuiñajjiya equi cuiñajji etii pea'ai, Sanoseo cuana nijje poeyanaje. ²Penoja esohui shajja'ajja majje jiquio Jodio etii cuana quea quene nee nee poanaje Penohua Jesosa shequi o'oyanaje huohuime acaje. ³Jamajjeja Peno, Huani pea'ai iña majje dojo canaje etecueajji. Siniajo mi tecuea canaje. Jeanobiajea canaje mecahuajje emimijji. ⁴Jamatii quea huiso dejja cuana, ponaña pea'ai Penoja esohui Jesosajo shajja'ajja majje Jesosa nijje jipapeequinaje, me oejje mil huisome, 5.000 huisome.

⁵Mecajjeahua emeshi mese cuana, Jodio dejja etii cuana Moisesija tehue'yo huohuijji nijje ojee poanaje Jenosanenajo. ⁶Eyacuiñajji nijje emimijji etii Anasi bajjani, oja huapa pojjeama cuana Caipa, Huani, Anejano pea'ai ojee poanaje. ⁷Jodio dejja etiiya Peno, Huani, jiojjijajja pea'ai iyaa canaje etecueajji. Poeyajo, Peno tecuea canaje jama ba'a: —¿Anijje acuae nequiaa jiojjijajja jjajiojji jeapihuiqui meenaje so'o?

⁸Edojjoshahua Pameya oya huohuisahua canijo, Penohua jama acanaje ba'a: —Emeshi mese cuana, dejja etii cuana pea'ai, e'e ecuaaya jiojjijajja jeo meesahuanaje. ⁹Jamajjeja miqiuanaaya ecuana huohui'ajjaña jama ba'a: “¿Anijje acuae jiojjijajja jeo mee'yonaje?” ¹⁰Jamajjeja ¡ojjaña dejja cuana Isaeni meshijo ba'eya, ¡shajja'ajjacue mo! Miquiaaya ca ca oe Jesosa Quito,

ma Nasanenajo ba'ya poa acui ecueata'apeejo ba'ehuanasohuajeanaje; mano mee'yonaje. Jamatii Eyacuiñajjiya Jesosa Quito shequi mee ca o'oyanaje. Ohuaya, Jesosa Quitohua jiojjijajja jeo mee canaje. ¡Bacue quea pame nee oya nequi! —Penohua acanaje—. ¹¹E'e, yahuajo nei Eyacuiñajjiya esohui huohuiji cuaa Jesusajo tehue ca poa jama ba'a:

“Oe equi yamajjana equi iyajji cajaa aca poa cuaa. Jamatii

Eyacuiñajjiya ma eyamajjana equi yamajjana quea ca'a nee aca poa. Jamajoya ojjaña ojaya epeeji cuaa Eyacuiñajji bihuia cani”.

Jesosa Quito ma eyamajjana equi iyajji jayojja. Miquianaya Jesosa sa po'yo ajja poanaje. Jamatii jyehua nei oya Jesosa quea pame nee nee, quea ca'a nee nee nequi. ¹²Jesosa Quitohua ohuaye nei mimishi cuana cuijea'yo majje ba'e tiitii mee caje'yo se. E'e, Eyacuiñajjiya oya huoojea ca'yonaje ese nahueji, ese cuaqui yasijje epoqui'yo poaje jjejojo. Pea chama' ese jaahuanajji —acanaje Penohua.

¹³Ma Jodio etii cuaa Penoja esohui, Huanija esohui pea'ai shajja'ajja majje jama acanaje ba'a: —¡De! Oya cuana bicho'ama mimiani ecuana nijje. ¿Yajjaje shai? Yahuajo ebiojo ba'e'ya poa oya cuana. Esohui etehue'yo quea huiso ojaya ba jjima yahuajo poa. Jamatii quea ja'a nee esohui huohui cani. E'e de, Jesosa nijje nequi tiitiinaje. Ohuaya pojja'a quea huiso ba mee canaje —acanaje etii cuaa Penoja, Huanijo pea'ai.

¹⁴Jamajjeya Jodio etii cuaa Peno Jesusajo mimipajea mee'yo sa acani. Jamatii joya jiojjijajja Peno nijje, Huani pea'ai nijje nequi quea pame nee. Jamajojoya mi tecuea canaje. ¹⁵Jamajjeya Peno, Huani, Jiojjijajja pea'ai esecue yasijje, equi quibo huasijje huoojeacuayajea canaje. O huoojeacuayajea majje mimimiminaje. ¹⁶Jama poanaje ba'a: —¡Ae acuae acajji so'o? Jesusaja esohui pajea'yo ajja. Ojjaña Jenosanenajo ba'eya ba canaje Penohua ma dejjaa ajjima acani acanaje; jiojjijajja jeo mee canaje. Jamajjeya ecuaaya yajja siajje ame yajji Peno jama ba'a: “Chojja Penoja, Huanija pea'ai jiojjijajja jeo mee'yo jjima” jama siajje pomeya jjapo meequi ajja, de. ¹⁷Jamajjeya Peno, Huani pea'ai ejjatecueaqui jama ba'a: “¡A'a huohui'yojji Jesusajo!” jamaya ejjahuohuiqui: “¡A'a ojjaña cuana Jesosa shequi'yonaje mimime pojji! ¡A'a Jesusaa jiojjijajja jeo mee canaje mimime pojji pea'ai!” —poanaje Jodio etii cuana.

¹⁸Majoya oya cuaa Peno, Huani iyaa ca o'oyanaje. Poe majje huohui canaje jama ba'a: —¡Bacue! ¡A'a jja oe Jesusajo mimi o'oyajji! Chojja. ¡A'a Jesusaa eshe o'oyaa jiojjijajja jeo mee canaje a'a huohui majajji! —huohuime acanaje Jodio etii cuaa.

¹⁹Jamatii Penohua, Huaniya pea'ai mete'ama saja'a canaje jama ba'a: —¡Jashahuabaquicue so'o! ¿A'a ecuaaya miquianajaya esohui jayojja jama aje? Cho. Eyacuiñajjiya esohui jayojja jama pojjeama. Miquianaaya ecuana Jesusaja esohui huohui mee jjima añ. Eyacuiñajjiya ca ca ecuana huoojea canaje Jesusajo huohuiya. ²⁰¡Bacue! Ecuaaya Jesosa banaje eshe o'oya. Eyacuiñajjiya esohui ecuaaya shajja'ajjanaje onijje. ¡Maya ecuaaya cahuohuahua!

²¹Jamatii Jodio etii cuaa Peno, Huani pea'ai cuia sa acanaje. Jamatii cuia jjima poanaje quea meteya jjejojo. Ojjaña cuaa Eyacuiñajji bihuia

canaje Jiojjijajja jeo mee canajejo; Peno, Huani pea'ai ojjañaja quea nahue ecuaa mee'yojji poanaje. Jamajjeya mi cuia canaje. Tecuea canaje ca ca oe; majoya tecuea majje huoojea canaje Huani, Peno pea'ai.

²²E'e, Jiojjijajja jeonaje etii nei, peaja ojiojji miji pea'ai huiso shequajame, 40 shequajame poanaje. Eyacuiñajjiya Peno, Huani pea'ai oya jeo meesahua ca'yonaje.

Ojjaña Eyacuiñajji nijje miminaje esohui mete'ama ehuohui meesahuajji

²³Jamajjeya Jodio dejja etiiya oya huoojea cajje Peno, Huani nijje poqui'yonaje ojaya epeejji cuana que. Ma Jodio etii cuaa tecuea canaje, Eyacuiñajji nijje emimijji mese cuanajo pea'ai huohui cañaquinaje.

²⁴Ma shajja'ajja majje ojjaña cuaa ojee Eyacuiñajji bihuia canaje. Onijje miminaje jama ba'a: —Eyacuiñajji, ecuanaja Chii ai, miya quea pame nee nee. Miyaya ojjaña eyajo pana'ya poa, meshi cuana pana'ya poa, bae cuana pana'ya poa pea'ai. Ojjaña aquiana cuana eyajo, meshijo, enajo pea'ai ojjaña mique pana'yo. ²⁵Yahuajo nei nei miyaya ecuanaja etiiquiana que, miquea epeejji emeshi mese Dabi que huoojea'ya poa Edojjoshahua Pame. Edojjoshahua Pameya Dabi huohui meesahua ca poa jama ba'a:

“Joya, ojjaña cuana quea shajjaquijjo, Eyacuiñajji nijje mimipanajjiani. Oya cuana quea tai jjashahuabaquiani Eyacuiñajji jeabichajeajji nisho. ²⁶Emeshi mese cuana dejja huoojeajji poani nijje jjachichaquiani; ojee nequianiya Eyacuiñajjiya huoojea'yo ojjaña jaahuanajji jeabichajea'yojji nisho”.

²⁷—E'e Eyacuiñajji, miyaya miquea Ebacua Ejja quea pame nee Jesosa huoojeanaje ojjaña jaahuanajji epojji. Jiquio cuiñajjiyo ba'eca cuana quea huiso quea mase Jesosa quecua sa poanaje. Jodioja emeshi mese quea mase Enode, Shomano emeshi mese Ponosio Pinato nijje jjachichaquinaje Jodio pojjeama cuana nijje, Isaeni dejja cuana nijje pea'ai. Ojee jjashahuabaquinaje Jesosa quecua'yojji. ²⁸E'e Eyacuiñajji, miya yahuajo nei nei Jesosajo jjashahuabaquia poa jama ba'a: “Eyaya Jesosa huoojeaje dejja cuana huasijje. Jamatii onaaya oya iña caje quecua'yojji”. Miquea ejjashahuabaqui'yojji yahuajo jayojja jama jjeyahua nei dejja quea mase cuaa acanaje. ²⁹Eyacuiñajji, miya ecuanaja Emeshi Mese nei eyajo ba'e. Miquea eba jjeyahua nei emeshi mese cuana quea mase ecuaa nijje mimijajiani Jesusaja esohui ecuaaya ehuohui poaje jjejojo. Jamajjeya ecuaa miquea epeejji poanajo, jesohui Jesusajo huohui meesahuacue mete'ama! ³⁰¡Mique Bacua Ejja Jesosa nijje jjapeequianiya pea cuana huaquia meesahuacue! ¡Ma dejjaa ajjima acani ameesahuacue, Eyacuiñajji! —jamaya miminaje Eyacuiñajji nijje ojjaña.

³¹Eyacuiñajji nijje mimipajea'yajo, Eyacuiñajjiya ma equi jeahuehuahuehua mee canaje. Edojjoshahua Pameya ojjaña huasijje dobiqui majje Eyacuiñajjiya esohui huohui mee canaje mete'ama.

Jesosaja epeeji cuana huapa pojjeama jayojja ba'ya poa.

³²Jomajo ojjaña Jesosaja epeeji cuana ojee jjapeequinaje quea bei. Oya cuana aquiana nahue'ama poanaje. Bobi nahue'ama poanaje. Nishehui'ama, dejja tai'ama ojjaña poanaje. Ojjaña Jesosaja epeeji cuana ba'e meesahua canaje. Ojjaña aquiana cuana ojjañaja poanaje. ³³Jamajjeya Eyacuiñajjija huoojea'yo esohui huohuijji cuaa janobajjima nei esohui huohui canequinaje mete'ama. Jama huohuime acanaje ba'a: —Esejaya Emeshi Mese nei Jesosa Quito shequi o'oyanaje e'e jojo nei —acanaje.

Jamajjeya Eyacuiñajjiya oya cuana jaahuana neinei canaje; quea bei nee po mee canaje.

³⁴⁻³⁵E'e, jamajjeya Jesosaja epeeji cuaa meshi, equi cuana, aquiana pojja'a quia majje, ejjeshejji jjeshe majje quia canaje Jesosaja epeeji jaahuanajji yasijje. Majoya ohuaya ma ejjeshejji quia canaje Jesosaja epeeji aema' cuana huasijje, aema' pishana huasijje pea'ai. Jamajjeya oya huisoajjaya aquiana ojjañaja poanaje.

³⁶Majoya oe Nemita Jose bajjani ma yahuajo Chipe meshijo ba'e poenequinaje, Jesosaja epeeji. Oya Benabe bajjani aca'yonaje, Ese Ejjaja esohuijo Ona Quea Bei pomeejji bajjani aca'yonaje Jesosaja huoojea'yo esohui huohuijjiya. ³⁷Ma Benabeya que jjinipea quia canaje ejjeshejji sosejje. Majoya ohuaya ejjeshejji ye ca'yonaje Jesosaja huoojea'yo esohui huohuijji Jesosaja epeeji aema' cuana huasijje equiajji. Jamajjeya ojjaña quea bihui nee Benabe nijje poanaje.

Anania oja huanase Sapina pea'ai siajjepojji poanaje

5 ¹Majoya Ananiaa ojaya ehuanase Sapina nijjeya que jjinipea quia ca'yonaje ejjeshejji sosejje. Bejjo ñatepe majje equijo iyaquehua canaje. Quea bejjo jea poanaje. ²Jamajjeya Ananiaa oe pojji bejjo quia ca'yonaje Jesosaja huoojea'yo esohui huohuijji yasijje. Oja huanaseja eba poanaje. Jamatii siajje poanaje jama ba'a: —Ma'aje bejjo, Peno, ojjaña tii que sosejje ecue jjeshe —anisho canaje Ananiaa; ona quea bihui pojji nisho siajje poanaje.

³Edojjoshahua Pameya Peno huohui meesahua canaje jama ba'a: —Anania, ¿apiojji acuae mi Edosiquiana jama siajje poani? ¿Apiojji acuae Edojjoshahua Pame siajje aña so'o? Miquea ojjaña ejjeshejji que jjinipea sosejje quia'yo jjima; miquea equijo huanaquehuanaje. ⁴Bacue, Anania! Que jjinipea quia jjimahuajo miquea tii poanaje. Quia'yo majje ejjeshejji miquea tii poanaje. Jamajjeya ¿apiojji acuae mi siajje poani ojjaña bejjo miquea que sosejje quia'yaña nisho poani? Miyaya ecuanaya pojjeama dasiaña; miyaya Eyacuiñajji dasia sa aña, de —poanaje Peno.

⁵Penoja esohui shajja'ajja majje Anania bichaquinananaje; poquijeyonananaje. Chama'yo tii poanaje. Anania mano'yonaje ba majje ojjaña quea mete nee nee poanaje. ⁶Majoya dejja etii pishana cuaa Anania daqui oshejo bebo majje dojo canaje mojeaa.

⁷Quijje pishana eshequi jaasohua pishanajo, Ananiaja ehuanase Sapina poeyanaje Peno que. Oja ba jjima ojahue mano'ya poa. ⁸Penohua oya huohui'ajja canaje jama ba'a: —Sapina, ¿ache sose huiso que jjinipea quinaje miquiaaya?

Oya epona sijje poanaje pea'ai: —E'e Peno, ma sose huiso tii quianaje ecuaaya —poanaje epona.

⁹Majoya Penohua epona tecuea canaje: —¿Apiojji miya miqueahue jayojja jama sijje poani? ¿Apiojji miyaya Edojjoshahua Pame dasia sa aña pea'ai? ¡Bacue! Miqueahue mojeajji epo poe'yonaje. Ohuaya miya mojea pea'ai caje'yo —acanaje Penohua.

¹⁰Sijjepojji jjejojo jjeyahua nei epona mano bichajeaquinanaje Peno pejjejo tii. Jamajjeya dejja etii pishanaa ma Anania mojea'yojji epohua Peno que poe o'oya majje epona emano'yojaa ba cañaquinaje. Epona dojo canaje mojeaa, ojahue pejjejo.

¹¹Ma ba majje ojjaña Jesusaja epeeji cuana quea mete nee poanaje Eyacuiñajji dasiajji nisho. Ojjaña pea cuana ma shajja'ajja majje quea mete nee nee poanaje pea'ai.

Jesosaja huoojea'yo cuaa acanaje quea huiso ma dejjaa ajjima acani

¹²Majoya Eyacuiñajjiya Jesusaja huoojea'yo esohui huohuijji cuana ma dejjaa ajjima acani ameesahua canaje quea huiso nee ojjaña cuanajo. Ojjaña Jesusaja epeeji cuana jjachichaqui nequinaje Eyacuiñajji equi yasijje, equi equecuayijji Sanomoja equi bajjani yasijje Eyacuiñajji bihuiaa. ¹³Pea cuana Jesusaja epeeji cuana nijje quea bei nee poanaje jama ba'a: —Jesusaja epeeji cuana quea pame nee —poanaje. Onijje mimijaji ajja nei poanaje, quea mete.

Jesosaja epeeji cuana nijje jjachichaqui jjima poanaje Jesusaja epeeji pojjeama. ¹⁴Ojjaña pojjaajo quea huiso nee Jesosa nijje jjapeequinaje dejja cuana, epona pea'ai. ¹⁵Jesosaja huoojea'yo esohui huohuijji cuaa ma dejjaa ajjima acani acanaje: emanojaaca cuana huaquia meesahua ca'yonaje, jjajaequi meesahua ca'yonaje. Jamajjeya ojjaña emanojaa cuana ejiojji cojja sahuajje dojo canaje cuaa, equipajaajjijo jaa. Ejiojji sahuajo huana yiyoyiyo canaje. Jama poanaje ba'a: —Peno ejiojjijje poquijeya oja yajjanaa emanojaa cuana biajje yejje cananaje pojja'a, jjaajaquije'yo pojja'a —poanaje cuana.

¹⁶Quea huiso dejja cuana cuiñajji sisi cuanajo ba'e, Jenosanena chipi neejo ba'e poeyanaje Jenosanena huasijje. Emanojaa cuana ye canaje quea huiso nee nee; niñepoqui cuana eshahuajo niñepoquiani cuana ye canaje pea'ai. Ojjaña cuana huaquia'yonaje, jjaajaqui'yonaje, niñepoqui pajea'yonaje pea'ai. Jesusaja epeeji cuaa jjaaja meesahuaqui ca'yonaje.

Jesosaja epeeji jeanobia canaje cuaa Jesusaja esohui huohuijjiyo

¹⁷Majoya Eyacuiñajji nijje emimijji etii, Jodio dejja etii cuana, Sanoseo cuana pea'ai quea quene poanaje Jesusaja huoojea'yo esohui huohuijji cuana nijje. Mimimiminaje jama ba'a: —¡Dee! “¡A'a Jesusajo huohui

majajji!” aje oma a'ajjanaje yahuajo. Jamatii esohui huohuipajea ajja. Ecuana shajja'ajja jjima acani. Ojjaña cuana Jesosa nijje jjapeequi mee cani, ecuanaja esohui pajea mee cani —poanaje Jodio etii cuana.

¹⁸Jamajjeya Jodio etii cuaa Jesosaja huoojea'yo esohui huohuijji cuana iña canaje. Dojo canaje ejjajeانباقوئججئ equi yasijje, dejja mimishi cuana nijje pea'aiya. ¹⁹Jamatii mecashono Eyacuiñajjija esohuidojojji poeyanaje ejjajeانباقوئججئ equi yasijje. Esecue jjani ca'apejo cañanaje. Jesosaja huoojea'yo esohui huohuijji cuana dojocuayaqui ca'yonaje esecue yasijje. Huohui canaje jama ba'a: ²⁰—¡Poqui o'oyacue Eyacuiñajjija equi yasijje! ¡Ojjaña cuana huohuicue Jesosaja esohui onijje eba'e quea pame neejo, ma Jesosaa huohui canaje shequi o'oya majje! —poanaje esohuidojojji.

²¹Jamajjeya mecajjeahua oya cuana poqui o'oyanaje Eyacuiñajjija equi yasijje. Jesosaja esohui huohui ca o'oyanaje ojjañaja eshajja'ajjajji.

Ohua esohui huohui canijo tii, Eyacuiñajji nijje emimijji etii cuana, ojjaña Jodio etii cuana pea'ai jjachichaquinaje pea equijo. Jjachichaqui majje sohuinano cuana huoojea canaje equi ejjajeانباقوئججئ yasijje Jesosaja huoojea'yo esohui huohuijji jjequiya nisho. ²²Jamatii sohuinano cuana equi ejjajeانباقوئججئ yasijje poqui majje ba cañaquinaje Jesosaja huoojea'yo esohui huohuijji chama'. Ba'ajja cañaquinaje; sa'ajja cañaquinaje. Chama' equi ejjajeانباقوئججئ. Jamajjeya esohuinano mese cuana poqui o'oyanaje Jodio etii cuana huohui'yohua. ²³Jama poanaje ba'a: —Esecue jaahunajji poani nequinaje esecue jjani pejeje. Esecue jjani eca'a tii nequinaje. Jamatii esecue jjani ca'apejo'yo majje chama' ba canaje Jesosaja epeeji cuana.

²⁴Eyacuiñajjija equi jaahunajji, Eyacuiñajji nijje emimijji mese cuana pea'ai ma esohui shajja'ajja majje quea mete poanaje: —¿Yajja po majje shai cuayaqui'yonaje, de? ¿Achacua shai poqui'yonaje ma dejja cuana? —poanaje.

²⁵Majoya pea dejja poeyanaje. Jama huohuime acanaje ba'a: —Dejja cuana ma miquianaja jeanobia'ajja poanaje jjeya nei Eyacuiñajjija equijo nequi o'oya, Jesosaja esohui huohui o'oya ca ca poequi ojjaña cuanaja eshajja'ajjajji.

²⁶Jamajjeya sohuinano huoojeajji poani echacosahuajji nijje poquinaje Jesosaja esohui huohuijji cuana jjequi o'oyaa. Jamajjeya quea huiso cuanaja Jesosaja esohui huohuijji cuana quea jea nee poanaje, quea nahue nee poanaje etecueajji. Tecuea jjima nei jjequime acanaje. E'e, dejja mase quea mete jama poanaje ba'a: —E sapa jajahuejjajea ca meiya —poanaje.

²⁷Jamajjeya jjequi majje nequi mee canaje Jodio etii cuana ani cojja nei. Majoya Jodio etii cuaa jama tecueame acanaje ba'a: ²⁸—Peno, “¡a'a Jesosajo huohui majajji!” aje mi yahuajo a'ajjanaje. Jamajjeya ¿apiojji acuae Jesosajo huohuipajea'yo jjima aña ojjaña dejja cuana huasijje, ojjaña Jenosanenajo ba'e yasijje so'o? Miquianaaya ca ca oe ecuanaya niñebaña jama ba'a: “Jodio etii cuana ca ca oe Jesosa quecua'yojji epo, quea mimishi jjejojo”. ¿Apiojji acuaeya jama sohuihuohuime aña tii so'o? —poanaje Jodio etii cuana.

²⁹Jesosaja huoojea'yo esohui huohuijji cuaa, Penohua pea'ai jama saja'ame acanaje ba'a: —Ecuaya Eyacuiñajjija esohui jayojja nei nei aje'yo, miqiuanaja sohui jama pojjeama. ³⁰E'e, yahuajo esejaya etiquiana cuana Eyacuiñajji nije jjapeequi'yonaje. Miqiuanaaya ca ca oe Jesosa acui ecueata'apeejo ba'ehuanasohuajea meenaje emano'yojji. Jamatii Eyacuiñajjiya oya shequi mee ca o'oyanaje. ³¹E'e, Eyacuiñajjiya Jesosa ojjaña jaahuanajji, mimishi cuijea'yojji pea'ai po mee ca'yonaje. Ojaya ebianeí mijije nequi mee ca'yonaje eyajo ojjaña huoojea'yojji epojji. Jamajjeya Jesosaa Jodio cuanaja mimishi cuana cuijea ca'yani. Mimishi cuana pajea meesahua ca'yani pea'ai onijje jjapeequianijo. ³²Jamaya ecuanajaya eba. Edojjoshahua Pameja eba pea'ai. Eyacuiñajjiya Edojjoshahua Pame huoojea cani ojaya epeeji cuana que dobiquiya, ojaya ehuhui'yo jayojja jama acanijo —Penohua acanaje.

³³Penoja esohui shajja'ajja majje Jodio etii cuana quea que nee nee poanaje. Ojjaña Jesosaja huoojea'yo esohui huohuijji quecua sa acanaje. ³⁴Jamatii oe dejja ona nije nequi Jjamani bajjani nequisohuanaje emimijji. Oya Paniseo dejja pea'ai, Moisesija etehue'yo huohuijji, dejja etii quea pame. Jamajjeya ojjaña oya shajja'ajja canaje. Jamajjeya Jjamani jama poanaje ba'a: —¡Jiquio dejja, Jesosaja esohui huohuijji dojocuayaquicue esecue yasijje! —poanaje. Ojaya esohui shajja'ajja mee sa po ajja.

³⁵Majoya cuayaquinaje. Jjamaniya sohuihuohui canaje jama ba'a: —Isaeni dejja etii cuana, ma dejja cuana quecua jjimahuaa, ¡ecue sohui shajja'ajja neineicue! ³⁶¡Niñeba'yocue! Yahuajo pishana oe dejja Teodasi bajjani emeshi mese jayojja quea ca'a po'ajjanaje. Huohui canaje jama ba'a: “Eya quea pame nee, quea ca'a nee nee. Quea huiso nee nee ecuea eba. ¡Eya shajja'ajjacue!”

Jamajjeya quea huiso nee nee, beshahua nei 400 huisome dejja cuana onijje jjapeequi'yonaje. Jamatii peaa Todasi quecua ca'yonaje. Todasi quecua ca'yajo, ojaya epeeji cuana ojaya esohui pajea ca'yonaje. ³⁷Quijje pishana pea shequiajajo, emeshi meseya ojjaña cuana bajjani cuana tehue mee canaje esicojji. Ma shequiajajo pea dejja Jodasa bajjani emeshi mese jayojja po'ajjanaje. Jodasaja esohui shajja'ajja canaje quea huiso dejja cuaa. Jodasa nijjeya emeshi mese jeabichajea'yo sa acanaje. Jamatii Jodasa quecua ca'yajo, ojaya epeeji cuaa oja sohui pajea ca'yonaje. Poqui'yonaje. ³⁸Jamajjeya ¡a'a Jesosaja epeeji cuana napajji! ¡A'a iña majajji! Eyacuiñajjiya oya cuana huohui meesahua ajjajo, quijje ojjaña Jesosaja esohui pajea caje'yo pea'ai. ³⁹Eyacuiñajjiya ca ca oya cuana huohui meesahua cani pojja'a. Jamajjeya ohuaya esohui mi huohuipajea cani. E'e, eseyaya Eyacuiñajji niñeba chana' pojja'a. Jama a sa po'yo ajja eseya —acanaje Jjamaniya.

⁴⁰Ojjaña Jodio etii cuaa oja sohui shajja'ajja canaje. Jamaya acanaje. Jamajjeya Jesosaja huoojea'yo esohui huohuijji cuana iyaa canaje. Cuiasejjajea canaje acui sisiya. Tecuea ca o'oyanaje jama ba'a: —¡A'a jja oe Jesosajo huohui majajji! —jamaya amajje oya cuana huoojeacuayajea ca'yonaje.

⁴¹Jamajjeya Jodio etii cuana jeana'yo majje Jesosaja huoojea'yo esohui huohuijji cuana poquinaje. Eyacuiñajji bihuia canaje jama ba'a: —E'e

Eyacuiñajji, ecuana Jesosa nijje jjapeequianijo, Jodio etii cuaa Jesosa aca poa jayojja ecuana acani pea'ai. Jamaya capoahua —miminaje ojjaña.

²Jamajjeya ojjaña pojajajo Eyacuiñajjija equijo, pea equi cuanajo pea'ai oya cuana huohuihuohui pajea'yo ajja poanaje esohui quea pame nee Jesosajo. Jama huohuime acaninaje ba'a: —Jesosa Quito Eyacuiñajjija huoojea'yo ojjaña jaahuanajji e'e jojo nei.

Me oejje beca, 7 dejja babaca ca poa Jesusaja epeejji aema' jaahuanajji

6 ¹Jamajjeya Jesusaja epeejji cuana quea huiso nee nee poanaje. Majoya pea cuana nijje quea bei pojjeama poanaje. Jomajo ani Jodio cuana Jieno meshijo ba'yahua mimijajinaje pea Jodio cuana nijje, Emeoja esohuijo mimiani cuana nijje. Jama poanaje ba'a: —Ojjaña pojajajo bobi quiañaño miquianaaya quiaña quea huiso aquiana miquea e'ahuemano cuana. Ecuanaja e'ahuemano huasijje ca ca oe pojji quiaña, de —poanaje Jodio cuana ma Jieno meshijo ba'yahua.

²Jamajjeya ma shajja'ajja majje Jesusaja huoojea'yo esohui huohuijji cuaa ma ome miji beca, 12 huisomeya ojjaña Jesusaja epeejji cuana iyaa canaje. Quea huiso ojee poeyajo, huohui canaje jama ba'a: —Epeejji cuana, ¡bacue! Ecuana Eyacuiñajjija esohui cahuohuiyahua. Ojjaña pojajajo bobi equiajji pojjeama ona huasijje. ³Jamajjeya ¡miquianaaya me oejje beca, 7 dejja quea pame cuana babacacue bobi quiajji! E'e, ¡joya Edojjoshahua Pame shajja'ajja cani, quea jjashahuabaqui ja'a nee nee poani babacacue! Majoya ecuanaaya ma dejja cuana huoojeaje bobi quiajji, pea aquiana cuana pea'ai quiajji ojjaña huasijje, e'ahuemano cuana huasijje pea'ai. ⁴Jamajjeya ecuanaya Eyacuiñajji nijje mimi majamajaje, ojaya esohui huohui tiitiije pea'ai.

⁵Jiquio ehuohui'yo jayojja jama a sa poanaje ojjaña Jesusaja epeejji cuana. Jamajjeya Estema babaca canaje Jesusaja epeejji e'ahuemano jaahuanajji. Ohuaya, Estemaa Edojjoshahua Pame shajja'ajja neinei canaje. Eyacuiñajjija esohui jayojja jama atiitii canaje pea'ai. Majoya pea dejja cuana babaca canaje pea'ai: Penipe, Pocono, Nicaino, Timono, Pamenase, Niconasi pea'ai. Oya Niconasi Jodio pojjeama; oya yahuajo Atioquia cuiñajjijo ba'ya poa. Jodio cuanaja ehuohui'yo jayojja Eyacuiñajji bihuia ca poa, jjeya ca ca Jesosa nijje jjapeequiani. ⁶Majoya jiquio 7 epeejji cuana babaca majje Jesusaja huoojea'yo esohui huohuijji cuana huasijje jjequi canaje cuaa. Poeyajo ma dejja cuana sapa biajje Jesusaja huoojea'yo esohui huohuijji cuaa eme' huana canaje. Eyacuiñajji nijje miminaje onajo, o chaco meesahuajji. Jamajjeya ojjaña eba poanaje ma dejja cuana e'ahuemano cuana huasijje aquiana quiajji epojji.

⁷Majoya Jenosnenajo quea huiso nee neeya Eyacuiñajjija esohui shajja'ajja canaje. Quea huiso nee nee Jesosa nijje jjepeequinaje. E'e, Jodio etii cuana, Eyacuiñajji nijje emimijji cuana pea'ai Jesusaja epeejji poanaje, ojaya esohui jayojja jama acanaje.

Estema iña majje tecuea canaje Jodio etii cuaa

⁸Estema Eyacuiñajjija quea jea nee neejo oya quea ca'a nee po mee canaje; quea huiso ma dejjaa ajjima acani ameesahua canaje ojjaña cuanajo. Jamaya ojjaña ba mee canaje oya Jesusaja epeeji nei. ⁹Jamatii pea Jodio cuana Sinene cuiñajjijo ba'e, Anejanía cuiñajjijo ba'e, Sinisia meshijo ba'e, pea cuana Asia meshijo ba'e pea'aiya Estema emimicuiajejanobiajeajji nisho acanaje. E'e, Jodio cuaa equi bajjani Echacoji epichojea'yoja equi ojee e'anijjijo jjachichaquiani cuaa Estema emimicuiajejanobiajeajji nisho acanaje. ¹⁰Edojjoshahua Pameya ca ca Estema quea jjashahuabaqui ja'a nee po mee canaje; oya mimi meesahua canaje pea'ai. Jamajjeya ma Jodio cuana Estema nijje jjamimicuiajejanobiajea pajeaquinaje, yajja saja'ame yajji. ¹¹Oya cuana Estema nijje quea quene nee poanaje. Jamajjeya quecua'yo sa acanaje. Siajjepojji cuana bejjo quia canaje Estema siajje ajji. Jama siajje ame aje acanaje ba'a: —Ecuaya Estema shajja'ajjanaje. Ohuaya ca jja ca oe Eyacuiñajji niñeba caní quea tai. Eseyaya etiiquiana Moisesi niñeba caní pea'ai —poanaje ma siajjepojji cuana, bejjo sosejje.

¹²Jamajjeya ma shajja'ajja majje ojjaña Jodio cuana Estema nijje quea quene nee nee poanaje. E'e, Jodio etii cuana, Moisesija etehue'yo huohuijji cuana pea'ai quea quene nee poanaje Estema nijje. Jamajjeya Estema que cuajicuajjibenaje; iña canaje. Dojo canaje Jodio etii cuana ojee ani yasijje. O cojja nei nequi mee canaje. ¹³Majoya pea siajjepojji cuana jjequi canaje Estemajo siajje ajji. Jama siajje pome poanaje ba'a: —Estemaya ca ca Moisesija etehue'yojo quea tai mimiani, Eyacuiñajjija equijo pea'ai. ¹⁴E'e, ecuaaya oya shajja'ajjanaje; jama poanaje Estema ba'a: “Jesusaa ma Nasanenajo ba'yahuaa jiquio equi, Eyacuiñajjija equi jeabichajea cajeyo. Jesusaa eseya Moisesija etehue'yo pajea mee cajeyo ojaya ehuhui'yo jayojja jama eba'ejji” —jama siajje pomeya poanaje Estemajo.

¹⁵Majoya ojjaña Jodio etii cuaa jomajo aniya Estema ba neinei canaje. Ba canaje ojaya ecojja esohuidojojji jayojja cojjame, quea cojja bei nee nee, quea cojja ja'a nee nee.

Estemaa sohuihuohui canaje Jodio etii cuanaja eshajja'ajjajji nisho

7 ¹Majoya Eyacuiñajji nijje emimijji etiiya Estema huohui'ajja canaje jama ba'a: —¿A'a jiquio esohui e'e nei? ¿A'a cuae miyaya jamaya aña?

²Estemaa saja'a canaje jama ba'a: —Ecuea epeeji cuana, dejja etii cuana pea'ai, ¡shajja'ajjacue mo! Yahuajo nei nei Eyacuiñajji quea pame nee esejaya etiiquiana Amajama que jjanequipanaquia poa. Jamaya poa Amajama Mesopotamia meshijo ba'yahua, Janani meshi yasijje poe jjimahuajo. ³Eyacuiñajjiya Amajama huohui ca poa jama ba'a: “¡Mesopotamia meshijo a'a ba'e majajji! ¡Jiña'yocue oe! ¡Pea meshi yasijje poquicue! ¡Miquea huapa pojjeama cuana jiña'yocue! Eyaya miya pea meshi ba meeje. Jomajo miya ba'e meeje'yo” aca poa Eyacuiñajjiya.

⁴—Jamajjeya Amajamaa Canea meshijo ba'e poquia poa Janani meshi yasijje. Jomajo nequia poa. Oja chii mano'ya poa. Oja chii mano'yajo,

Eyacuiñajjiya Amajama huoojea ca'ya poa jiquio meshi yasijje, ma ese jjeyahua nei ba'yani yasijje. ⁵Jamatii Eyacuiñajjiya oya jiquio meshi quia jjima poa ojaya epojji. Que biso nei ojaya nahue mee jjima poa. Eyacuiñajjiya oya huohui ca poa jama ba'a: “Amajama, jiquio meshi miquea poaje'yo quijje; mique osecua cuanaja quijje nei poaje'yo pea'ai” oya aca poa Eyacuiñajjiya, jamatii Amajama edeja tii nojinoji poa, bacuama' tii poa.

⁶—E'e, Eyacuiñajjiya Amajama huohui ca poa jama ba'a: “E'e jojo nei miquea osecua cuana jiquio meshijo baleje'yo quijje nei. Jamatii jjeya jiquio meshi onajaya. Jamajjeya miquea osecua cuana jiquio meshijo nequi poqui caje quea huesha nee pea meshi yasijje. Joma meshijo ba'e deaja cuaa miquea osecua cuana quea huiso napa caje. Chaco tiitii mee caje'yo sosema' quea huiso nee nee shequijame, 400 shequijame. ⁷Quea mase poaje miquea osecua cuana nijje. Majoya eyaya ma deaja quea mase cuana tecueaje'yo, quea nee nee po meeje'yo pea'ai. Jamajjeya miquea osecua cuana ma meshijo ba'e poqui mee caje'yo jiquio meshi yasijje epoe o'oyajji. Jiquio meshijo tii eya bihuia caje o'oya cuaa. Ecue sohui jayojja jama ba'e caje cuana pea'ai”. Jamaya yahuajo nei nei Eyacuiñajjiya Amajama aca poa.

⁸—Majoya Eyacuiñajjiya pea esohui huohui ca poa ojjaña ba meeji oya e'e jojo nei Amajama nijje miminaje. Jama poa ba'a: “Amajama, jehuissejjajecue cuiishasha biso nei miquea, mique bacua cuanaja, ojjañaja. Jamajjeya ojjaña cuaa ba caje eya e'e jojo nei minijje miminaje, miya, mique osecua quea huiso nee nee cuana jiquio meshi quiaña miquea epo'yojji tii tii” aca poa.

—Jamajjeya Amajamaa Eyacuiñajji shajja'ajja ca poa. Quijje oja bacua Isaaca cuaya poa. Ebacua jjeya cuaya me oejeje pea beca peejjima cahuime poajo, Amajamaa oya cuiishasha biso nei jehuissejjajea ca poa. Majoya tii majje Isaacaja bacua Jacobo cuaya poa. Isaacaa oya cuiishasha biso nei jehuissejjajea ca poa. Quijje tii majje Jacoboaja bacua cuana cuaya poa quea huiso nee; ¹²huisome deaja poa, epona oe nei poa. Jacobohua oya jayojjaya aca poa, ejeajjiya aca poa jayojjaya. Jacoboaja bacua eja cuana tiinaje ojjaña Isaeni cuanaja etiquiana, esejaya, de.

⁹Ma edoe mese cuana aje echahua mesejo quea quene nee poa, Josejo. Quia ca'ya poa deaja cuana Ejito meshijo ba'e yasijje ejjesheji soseje. Echacoji sosema' Jose poa. Jamatii Eyacuiñajjiya Jose pajea'yo jjima poa; jaahuana ca poa. ¹⁰E'e, jamatii pea cuaa oya quea mimishi acanaje, Eyacuiñajjiya Jose jaahuana ca poa. Ejito emeshi mese Panaohua Jose quea jea nee aca poa. Jamajjeya Panaohua Jose ojjaña huoojea'yojji po mee ca poa Ejito meshijo. Panaoja equi jaahuanajji po mee ca poa Jose. ¹¹Majoya bobi chama' poa Ejito meshijo, Canaani meshijo, ojjaña meshijo pea'ai. Bobimajo quea huiso bobi yasijje po'ya poa. Eseyaya etiquiana cuana pea'ai bobima' poa. ¹²Majoya Jacobohua jiquio meshijo ba'eya shajja'ajja canaje bobi quea huiso Ejito meshijo yani, Ejito emeshi meseja. Jamajjeya ohuaya esejaya etiquiana, oja bacua cuana huoojea ca poa Ejito meshi yasijje bobi jjequiya. ¹³Quijje poqui o'oyanaje Ejito meshi yasijje bobi jjequi o'oyaa. Poqui o'oyajo Joseya oja doe cuana huohui ca poa: “Eya ca ca iña mique chahua Jose” aca poa.

—Joseya oja o'i cuana dojo ca poa emeshi mese Panao que, ojaya ebajji. ¹⁴Majoya Joseya oja o'i cuana huoojea ca poa oja chii jjequiya, Jacobo jjequiya. Ojjaña oja huapa pojjeama cuana quea huiso nee nee jjequi ca poa Ejito meshi yasijje, 75 huisome. ¹⁵Jamajjeya Jacobo ojjaña oja bacua cuana nijje, oja osecua cuana nijje pea'ai poquia poa Ejito meshi yasijje. Jomajo, Ejito meshijo oya mano'ya poa. Jomajo esejaya etiiquiana cuana quea huiso nee mano'ya poa. ¹⁶Jacobo, oja bacua beca cuana pea'ai mano'yajo esa' cuana ye ca'ya poa cuaa jiquio meshi yasijje, Siqueme cuiñajji yasijje ohuajea'yohua. Mei jjani yasijje huananobiajea ca'ya poa, ma yahuajo Amajamaa jjeshe ca poa Jamonoja meshi, mei jjani ehuananobiajea'yojji, bejjo sosejje —Estemaa acanaje.

¹⁷—E'e, ma Eyacuiñajjiya yahuajo nei Amajama huohui ca poa jayojja jama ohuaya aca poa. Isaeni dejja cuana Ejito meshijo ba'e jpapapaqui'ya poa; quea huiso nee nee po'ya poa. ¹⁸Majoya Ejito meshi mese mano poqui'yani poa. Majoya pea cuaya majje oya jayojja poa. Quijje pea dejja Ejito emeshi mese poa, pea Panao. Jose ojaya ba jjima poa yahuajo nei mano'yojojo. ¹⁹Ma emeshi mese eyacua quea mase poa esejaya etiiquiana nijje. Oya cuana quea mimishi aca poa. Quea yeno nee nee po mee ca poa. E'e, ebacua cuana jeajea mee ca poa emanojeajji —Estemaa acanaje.

²⁰—Majoya etiiquianaja bacua Moisesi bajjani cuaya poa. Oya quea bacua bame nee nee poa, pea ebacua cuana quea bame pishana poa. Oja enaeseya oya quehuajje nei jaahuana ca poa oja equijo. Quehuajje tii mee ca poa pea beca peejjima ba'ime. ²¹Majoya emano'yojji nisho enaeseya Moisesi esecue yasijje dojocua'ajjaqui ca poa. Jamatii Emeshi mese Panaoja bacuaseya Moisesi ba ca poa. Jjeshe ca poa. Dojo ca poa tii meeya. Ojaya ebacua poa Moisesi, Panaoja bacuaseja. ²²Jamajjeya Moisesi ojjaña Ejito cuanaja esohui ba mee ca poa Ejito esohui huohuijji cuaa. Jamajjeya Moisesiya Ejito etii cuaa jayojja jama aca poa; quea ja'a nee esohui huohui ca poa pea'ai —Estemaa acanaje.

²³—Majoya Moisesi peaaja ejiojji miji pea'ai shequiajame tii majje, 40 shequiajame po majje jama poa ba'a: “Ecua huapa pojjeama cuana cabaquiahua, Isaeni cuana”. ²⁴Moisesiya ba cañaquia poa oe Ejito dejjaa Isaeni dejja cuiasejjajea caqui. Ba majje, quenequene majje Moisesiya ma Ejito dejja cuiajea ca poa. Mano'ya poa. ²⁵E'e, Moisesi jjashahuabaquia poa jama ba'a: “Ecua huapa pojjeama cuanaja eba Eyacuiñajjiya eya huoojea canaje ona jaahuanaa, esejaya meshi yasijje dojhua, echacojji sosema' pojjeama epojji” poanaje Moisesi.

—Jamatii ojaya huapa pojjeama cuanaja Moisesi ba jjima Eyacuiñajjiya huoojea'yo. ²⁶E'e, mecajjeahua Moisesi poe o'oyanaje ojaya huapa pojjeama cuana baa. Beca cuana jjacuaquiani ba majje Moisesiya oya cuana quea bei po mee sa aca poa. Jamajjeya huohui ca poa jama ba'a: “Epeejji cuana, miquianaya huapa pojjeama cuana. ¿Apiojji acuae huapa pojjeama nijje jjacuaquiani so'o? Jamaya quea tai”.

²⁷—Jamatii oe Jodiohua ma ojaya huapa pojjeama cuiajji nishohua Moisesi iñajjeanajea ca poa; shajja'ajja sa po'yo ajja poa. Jama aca poa

ba'a: “¿Aya shai miya ecuana huoojeajji po mee ca'yonaje so'o? ²⁸ ¿A'a eya cuiaje'yo pea'ai? Ecuea eba miyaya oma mecajje Ejito dejja cuiay'onaje.

²⁹—Ma shajja'ajja majje Moisesi quea mete poa: “Ojjaña eba eyaya Ejito dejja cuiay'onaje. Ejito emeshi meseya eya cuiya ca chana”. Jamajjeya quehua poquia poa pea meshi yasijje, Madiani meshi yasijje. Jomajo oya ba'ya poa oja huapa pojjeama cuana nijje. Jomajo ba'e eponajo jjahuanaquia poa. Jomajo oja bacua ejja cuaya poa beca. ³⁰Jomajo oya ba'ya poa peaja ejiojji miji pea'ai shequiaja huisome, 40 shequiaja. Majoya oya meshi jabojo, Sinai eyiyo pejeje poquianijo, ñajjajja jaahuana poequijo Eyacuiñajji o que poquia poa. Acui tii'ajja jiji mee ca poa. Jamatii ma acui quiy'o'yo ajja poa. Eyacuiñajji ma acui jijiqui yiyesamajo jjanequipanaquia poa. ³¹Jamajjeya Moisesi acui jijiqui ba majje quea mete poa. Jjanequichipiquia poa acui jijiqui baa. Eyacuiñajji acui jijiqui yiyesamajo nequi onijje mimia poa. ³²Jama aca poa ba'a: “Moisesi, eya Eyacuiñajji. Miquea ettiquiana enijje jjapeequia poa, Amajama, Isaaca, Jacobo pea'ai”.

—Jamajje Moisesi piopionaje quea mete jjejojo. Acui jijiqui ba maja sa po'yo ajja poa. ³³Majoya Eyacuiñajjiya oya jama aca poa ba'a: “Moisesi, jiquio meshijo tii eya enequijo, miquea ejiojji shejee huijiajeacue enijje emimijji! ³⁴Eyaya ecuea epeeji cuana baña Ejito meshijo ba'e. Jomajo Ejito dejja cuaa ecuea epeeji cuana janobajjima nei napa cani eyaya baña pea'ai. Oya cuana quea yeno nee nee pa neineiani eyaya shajja'ajjaña. Jamajjeya eyaya oya cuana nahueje'yo, oya cuana dojoje'yo sosema' echaco majajji pojjeama. ¡Poquicue, Moisesi! Eyaya miya huoojeaje o'oya Ejito meshi yasijje” aca poa Eyacuiñajjiya —Estema poanaje.

³⁵—¡Bacue! Yahujajo nei nei Moisesija huapa pojjeama cuaa oya cajaa aca poa. Shajja'ajja sa po'yo ajja poa: “¿Aya shai miya ecuana huoojea'yojji po mee canaje so'o?” aca poa cuaa.

—Jamatii Ejito dejja cuanajo sosema' echaco majajji pojjeama jojoya, Eyacuiñajjiya Moisesi huoojea ca poa ojaya epeeji cuana jaahuanajji epojji. Eyacuiñajjiya Moisesi oya cuana dojo meesahua ca poa Ejito dejja cuanajo sosema' echaco majajji pojjeama. E'e, Eyacuiñajji jjanequipanaquia poa acui jijiquijo Moisesija ebajji. ³⁶Jamajjeya Moisesiya Jodio cuana, Eyacuiñajjiya epeeji cuana Ejito meshijo ba'e dojocuayaqui ca'ya poa pea meshi yasijje epoqui'yojji. Eyacuiñajjiya Moisesi Ejito meshijo quea huiso ma dejjaa ajjima acani ameesahua ca poa. Ojaya epeeji cuana Ejito meshijo ba'e dojocuaya meesahuaqui ca poa pea meshi yasijje epoqui'yojji, jiquio meshi yasijje. Bae ena hu'o oje miji yasijje poqui meesahua ca poa. Bae ena nequiashiña mee ca poa. Majoya ojjaña poquia poa oje miji yasijje. Meshi quea jabojo, quimajo ba'e meesahua ca poa quea shequiaja huiso nee, peaja ejiojji miji pea'ai shequiajame, 40 shequiajame. ³⁷Ohuaya, Moisesiya Isaeni dejja cuana jama aca poa ba'a:

“¡Bacue! Eyacuiñajjiya eya huoojea canaje ojaya esohui huohuiya. Quijje ohuaya pea esohui huohuiji e jayojja miquiana que huoojea caje, miquiana nijje meshijo ba'e tii. Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo tii”.

Jamaya Moisesiya aca poa yahuajo nei nei.

³⁸—E'e, Moisesi Isaeni cuana nijje poquianijo meshi quea jabo neejo, meshi quimajo oya cuana nijje poquia poa Sinai eyiyo huasijje. Jomajo Sinai eyiyo biajje Eyacuiñajji mimia poa Moisesi nijje. Ma esohui shajja'ajja majje Moisesiya Isaeni cuana huasijje huohui ca poa, esejaya etiquiana huasijje, esohui eba'e tiiti mee'yojji. Ma esohui Moisesiya tehue ca poa esejaya ebajji pea'ai.

³⁹—Jamatii esejaya etiquiana Moisesija esohui shajja'ajja sa po'yo ajja poa. Oya cuaa ca ca Moisesi niñeba ca poa. Ejito meshi yasijje poqui o'oya sa poa quea mimishi jjejojo. ⁴⁰Moisesi eyiyo biajje Eyacuiñajji nijje mimianijo, etiquiana aje oe Anoni jama aca poa ba'a: “Anoni, Eyacuiñajji nisho acue ecuanaja ebihuiajji, ecuan hui DOJOJJi epojji, ejiojji jaahuanajji. Moisesiya eseya Ejito meshijo ba'e jjequi canaje jiquio meshi tai yasijje; quea jabojo manojeyo. Jjeya Moisesi chama'. ¿Achacua shai oya poquinaje? Ecuanaja ba jjima” poa esejaya etiquiana cuana —Estemaa aca poa.

⁴¹—Jamajjeya etiquiana cuaa eyacuiñajji nisho pana ca poa ana'ajja bacua nisho, mei huo'o. Aquiana cuana dahua ca poa ma eyacuiñajji nisho bihuiajji. Ojee ijia'ijjia poa. Quea bihui nee jayojja poa oja panaa shajja'ajja cani poso. ⁴²Etiquiana cuaa Eyacuiñajji pojjeama bihuia ca poa, oja pana, majameta cuana bihuia sa aca poa. Jamajjeya shajjama' jjejojya Eyacuiñajji esejaya etiquiana nijje jjapeepajequia poa. E'e, jama poanaje ba'a: “Oya cuana quea jjashahuabaqui tai poani jojya eyaya oya cuana jaahuana maja ajja poaje'yo, ecuea esohui eba nisho jjejojo”. E'e, ma etiquiana quea mimishijo yahuajo nei nei Eyacuiñajjija esohui huohuijji cuaa tehue ca poa jama ba'a:

“Isaeni dejja cuana, e bihuiajji pojjeama miquianaaya huo quea huiso quecuanaje quea huiso shequijame, ⁴⁰ shequijame meshi jabojo, dejjama' meshijo. Aquiana cuana dahuanaje pea'ai e bihuiajji pojjeama. ⁴³Chojja. Miquianaaya ca ca oe daqui equi sisi yajji DOJOJJi tiiti nequinaje eyacuiñajji nisho Monoca bihuiajji. Ma daqui equijo nequianaje eyacuiñajji nisho Monoca bajjani. Majameta Sepani bajjani aje oe bihuia tiitiinaje pea'ai. E'e, majameta miquianajaya eyacuiñajji nisho poanaje. Miquianaaya aje oe epana'yo cuana bihuia aninaje pea'ai. Eya bihuia jjima miquianajaya. Jamaya quea tai. Jamajjeya eyaya pea dejja cuaa miquianaya iña meesahuaje quea huesha nee nee edojo'yojji pea meshi yasijje, Babinonia meshi yasijje DOJOJJi meeje. Jomajo quea yeno po meeje ejjabahuejjaquijji, enijje e'e DOJOJJi nei ejjapeequijji”.

Jamaya yahuajo nei nei tehue ca poa esejaya etiquiana huasijje —Estemaa acanaje—. ⁴⁴E'e, esejaya etiquiana Eyacuiñajjija daqui equijo Eyacuiñajji nijje mimianinaje. Ma daqui equi huacuaya huacuaya quea huesha nee DOJOJJi canequinaje meshi jabojo. E'e, Moisesi Eyacuiñajji huohui ca poa: “¡Daqui equi iyacue enijje emimijji! Jama iyame acue ba'a” aca poa. E'e, Moisesi daqui

equi cahui ba mee ca poa. Eyacuiñajjija esohui jayojja neiya daqui equi iya ca poa, Moisesiya. ⁴⁵Majoya Moisesi mano'yajo, esejaya etiiquiana yahuajo nei nei ba'eya Josoe nijjeya ma daqui equi meshi jabojo dojo majamaja canequia poa jiquio meshijo eba'e'yojji. Jodio pojjeama cuaa ca ca jiquio Jodioja meshi eba'e'yojji aca poa. Jamajjeya Eyacuiñajjija Josoe huoojea meesahua ca poa Jodio pojjeama cuana; mete mee ca poa. Eseyaya etiiquiana cuana jiquio meshi yasijje ba'e mee ca poa. E'e, ma daqui equi nequia poa jiquio meshijo, Jodioja meshijo. Jamaya nequi titiia poa esejaya etiiquiana Dabi ba'e jjimahuajo.

⁴⁶—Emeshi mese Dabi quea pame nee nee, Eyacuiñajjija quea boti nee nee poa. Jaahuana ca'ya poa pea'ai. Jamajjeya Dabiya Eyacuiñajjija equi iya sa aca poa daqui equi pojjeama, mei equi quea bame iya sa aca poa Eyacuiñajji bihuiajji. Ojjaña Jacoboja osecua cuana Eyacuiñajji bihuia mee sa aca poa mei equi eyacuajo. Jamatii Dabi mei equi iya mee jjima poa Eyacuiñajjija. ⁴⁷Dabija bacua ejjaa Sanomo bajjaniya ca ca mei equi quea bame nee iya ca poa Eyacuiñajji bihuiajji.

⁴⁸—Eyacuiñajji quea pame, quea ca'a nee nee ca ca equi cuanajo ba'e ajja, dejjaja equijo. E'e, yahuajo nei Eyacuiñajjija esohui huohuijji cuaa oja sohui tehue ca'ya poa jama ba'a:

⁴⁹“Eya Eyacuiñajji, eyajo ojjaña huoojea'yojji poani. Ojjaña meshi cuanajo pea'ai eya Emeshi Mese nei poani. Ojjaña ecuea aquiana. Jamajjeya ¿yajja acuaeya equi iyaje so'o e ba'ejji? ¿A'a cuae eya equijo jomishocaje? Eya hueahuea ajja. ⁵⁰E'e, yahuajo eyaya ojjaña aquiana cuana pana poa”.

Jamaya yahuajo nei tehue ca poa Eyacuiñajjija esohui —Estemaa acanaje.

⁵¹—Miquianaya ca ca oe quea sapa ca'a, jjashahuabaqui ajja. Edojjoshahua Pameja ehuohui'yo a'ajja tii. Miquianajaya etiiquiana cuana quea mimishi nee jayojja jama poani. ⁵²E'e, etiiquiaa aje oe yahuajo ojjaña Eyacuiñajjija esohui huohuijji cuana quea mimishi aca'ya poa. E'e, yahuajo nei Eyacuiñajjija esohui huohuijji cuaa huohui ca poa Jesusajo jama ba'a: “Quijje Eyacuiñajjija huoojea'yo ojjaña jaahuanajji poeje. Oya quea pame nee nee, mimishi'ama nei nei poaje” aca poa cuaa. Jamatii miquianajaya etiiquiaa ma esohui huohuijji cuana quecua ca'ya poa. Oya jayojja jjeya miquianaaya Jesosa iña meesahuanaje onaja quecua'yojji. ⁵³Yahuajo Eyacuiñajjija esohuidojojjiya quea huiso nee neeya ba canaje Eyacuiñajjija sohuihuohui caqui miquianajaya etiiquiana huasijje. Majoya etiiquiaa ma esohui miquiana huasijje huohui ca poa. Jamatii ma esohui jayojja jama ba'e sa po'yo ajja miquianaya —Estemaa acanaje.

Estema sapa jajahuejjajea ca'yonaje cuaa

⁵⁴Estemaja esohui shajja'ajja majje quea quene nee poanaje Jodio dejja cuana. Ese' ijjiyai canaje quea maseya jjejojo. ⁵⁵Jamatii Edojjoshahua Pameya Estemajo nequiya oya eyahuasijje ba meesahua canaje jjeyahua nei. Eyajo ba mee canaje Eyacuiñajji quea jeajahua nee nee, quea ca'a nee nee. Jesosa ba

mee canaje pea'ai, Eyacuiñajji pejeje. ⁵⁶Jamajjeya Estema jama poanaje ba'a: —¡Bacue! Eyaya esecue eca'apejo nequi baña eyajo. Ojjañaja Edoe Mese Jesosa baña Eyacuiñajji ebianeí mijijje nequi ojjaña huoojea'yojji —Estema poanaje.

⁵⁷Jodio dejja cuana ma shajja'ajja majje quea quene nee nee poanaje. Estemaja esohui Jesusajo eshajja'ajja poaje jjejojo eme sisiya eshajja huejja noco canaje. Taaa majje ojjaña cuajicuajjebenaje Estema que. ⁵⁸Estema iña canaje, cuiñajji esecue yasijje dojocuayaqui canaje. Mei jjeshe majje Estema sapa jajahuejjajea canaje meiya. Dejja cuaa ma Estema jajahuejjajeajji epo cuaa ojaya daqui nei cuana huijiajjea canaje; Sanoni quia canaje ejaahuanajji.

⁵⁹Onaaya Estema sapa jajahuejja canijo tii, Estema Jesosa nijje miminaje jama ba'a: —Jesosa, ecuea Emeshi Mese nei, ¡ecuea edojjoshahua jjequisohuacue eyahuasijje!

⁶⁰Ecui'oshajjajo nequi majje Jesosa nijje mimi neineinaje jama ba'a: —Emeshi Mese nei, ¡jiquio dejja cuana quea mimishi poanija mimishi cuijea'yocue! —jamaya mimi majje Estema mano'yonaje. Chama'yo tii poanaje.

Pabohua Jesusaja epeeji cuana napa canaje

8 ¹Pea cuaa Estema sapa jajahuejjajea cani ba majje Sanoni jashahuabaquinaje jama ba'a: —E'e jamaya, casapa jajahuejjajea cahua, de —poanaje, Estema Jesusajo siajje poani posojo jamaya poanaje Sanoni.

Majoya ma pojajajo tii Jesusaja epeeji pojjeama cuaa Jesusaja epeeji cuana janobajjima nei napa canaje Jenosanenajo ba'eca cuaa. Jamajjeya beshahua nei ojjaña Jesusaja epeeji cuana poquinaje pea cuiñajji cuana Jodio meshi yasijje; Samania meshi yasijje pea'ai poquinaje. Jesusaja huoojea'yo esohui huohuijji cuana ca ca oe poqui jjima poanaje; Jenosanenajo nequinaje tii.

²Jamajjeya dejja quea pame nee cuaa, Jesusaja epeeji cuaa Estema dojo canaje mojea'yohua. Pa neinei'yonaje ojo pea'ai.

³Sanoniya ca ca quea tai aca'yonaje Jesusaja epeeji cuana. Napa huicha'a huicha'a ca'yonaje ojjaña equijo ba'e. Dejja cuana, ponaña pea'ai iña majje dojo canaje equi ejjajeañobiacuajji yasijje jeañobiaa. Dejja mimishi cuana nijje ejañobia jaanaje.

Penipeya esohui huohuiqui canaje Samania meshijo

⁴Jesusaja epeeji cuana ojjaña meshi cuana huasijje poquinaje. Esohui huohui capoquinaje Jesusaja. ⁵Penipe ca ca poquinaje Samania meshi yasijje. Jomajo Jesosa Quitojo huohui canaje ojjaña cuana huasijje: —Jesosa Eyacuiñajjija huoojea'yo ojjaña jaahuanajji, de —Penipeya acanaje.

⁶Ojjaña cuaa Penipeja esohui shajja'ajja canaje. Penipeya ma dejjaa ajjima acani ba majje ojjaña ojava esohui shajja'ajja neinei canaje. ⁷E'e, eshahua cuana dejjajo nequi taaa neinei majje cuayaqui'yonaje ma Penipeya huoojeacuayajea canaje. Jeo'ajja cuana ohuaya jeo mee canaje. Jiojjijajja

jjajiojji jeapihui meequi ca'yonaje pea'ai Eyacuiñajji nijjeya. ⁸Jamajjeya ojjaña cuana Samania meshijo ba'eca quea bihui nee nee poanaje.

⁹Samania meshijo ba'enaje eyamiquecua Simoni bajjani. Edosiquiaa oya ma dejjaa ajjima acani ameesahua canaje quea huiso shequiajame. Jamajjeya quea huiso cuana Samania meshijo ba'eca quea mete nee poanaje Simonijo. Simoniya huohui canaje jama ba'a: —Eya ca iña quea ca'a nee nee. Ojjaña ecuea eba, de.

¹⁰Jamajjeya ojjaña cuaa ojaya esohui shajja'ajja neinei canaje, emeshi mese cuaa, echacojji cuaa, dejja tii cuaa, esho'iquiana cuaa pea'ai. Ojo jama huohuime acanaje cuaa ba'a: —Jiquio dejja, Simoni Eyacuiñajjiya ameesahua cani —poso acanaje cuaa—, ma dejjaa ajjima acani quea huiso nee.

¹¹E'e de, quea huiso shequiajame ohuaya ma dejjaa ajjima acani acajo, quea huiso ojo quea mete poanaje. Oja sohui shajja'ajja canaje ojjaña.

¹²Jamatii Penipeya esohui quea pame nee Jesosa Quitojo huohui canaje jama ba'a: —Jesosa Quito Eyacuiñajji nijje eyajo nequi, ojjaña huoojea'yojji poani. Onijje jjapeequi'yajo ohuaya miya ba'e tiitii mee caje'yo onijje eyajo —acanaje Penipeya.

Quea huiso nee nee dejja, ponaña pea'ai Penipeja esohui Jesusajo shajja'ajja majje Jesosa nijje jjapeequinaje. Jamajjeya Penipeya oya cuana Eyacuiñajji besa mee canaje enajo.

¹³Majoya Simoniya pea'ai Penipeja esohui shajja'ajja canaje. Jesosa nijje jjapeequinaje. Penipeya oya Eyacuiñajji besa mee canaje pea'ai. Majoya oya Simoni Penipe nijje po'ayequi nequinaje. Penipeja esohui shajja'ajja huicha'a huicha'a canaje. Eyacuiñajjiya Penipe ma dejjaa ajjima acani ameesahua canaje. Jamajjeya ma ba majje Simoni jjaba'one neineiquinaje.

¹⁴Majoya Jesusaja huoojea'yo esohui huohuijji cuaa Jenosanenajo nequiya onaja esohui shajja'ajja canaje. Jama acanaje cuaa ba'a: —Quea huiso nee Samania meshijo ba'eya Eyacuiñajjiya esohui shajja'ajja canaje. Jesosa nijje jjapeequinaje quea huiso nee nee, de —acanaje cuaa.

Jamajjeya ma shajja'ajja majje Jesusaja epeejji etii cuaa Peno, Huani pea'ai Samania meshi yasijje huoojea canaje Jesusaja epeejji eyacua cuana baa.

¹⁵Samania huasijje poqui majje Peno, Huani pea'aiya Jesusaja epeejji cuana huasijje Eyacuiñajji nijje miminaje jama ba'a: —Eyacuiñajji, ¡Edojjoshahua Pame huoojeacue jiquio miquea epeejji cuana huasijje dobiqiyia!

¹⁶E'e, yahuajo Edojjoshahua Pameja Samania meshijo ba'e cuana huasijje dobiqii jjima. Oya cuana ca ca oe Emeshi Mese nei Jesosa nijje jjapeequi'yajo pea cuaa oya cuana Eyacuiñajji besa mee canaje enajo. ¹⁷Jamajjeya Penohua, Huaniya pea'ai poe majje ma epeejji cuana sapa biajje eme' huana canaje. Peno Eyacuiñajji nijje mimiajo Edojjoshahua Pame ona que dobiqiyonaje.

¹⁸Simoniya ba canequinaje Jesusaja huoojea'yo esohui huohuijjiya Jesusaja epeejji cuanaja sapa biajje eme' huana cajo, Edojjoshahua Pame ona huasijje dobiquinaje. Ba majje Simoni jjashahuaba taiquinaje jama ba'a: —Eyaya Edojjoshahua jjesheje bejjo sosejje.

¹⁹Jamajjeya ohuaya Peno, Huani pea'ai jama acanaje ba'a: —Mi jayojja jama a sa aña eyaya. Jamajjeya eyaya dejja cuanaja sapa biajje eme' huana majje Edojjoshahua Pame dobiqúi meeje'yo pea'ai. ¡Che mo eya jamaya a'yocue miyaya bejjo sosejje! —acanaje Simoniya.

²⁰Ma shajja'ajja majje Penohua oya tecuea canaje jama ba'a: —Simoni, miya jjashahuaba taiquianijojjo Eyacuiñajjiya miya mano mee ca chana'. Miquea ejjeshejji pea'ai chama'yo tii po mee ca chana'. Miya jjashahuaba taiquiani; Eyacuiñajjiya Edojjoshahua Pame huoojea caje'yo ejjeshejji sosejje poso miyaya aña. ²¹Chojja, Simoni. Miyaya Edojjoshahua Pame bejjo sosejje ejjeshejji pojjeama. Eyacuiñajjiya eba miya quea tai jjashahuabaquiani, quea mimishi. Jamajjeya ecuana nijje echacojji pojjeama Eyacuiñajjiyo. ²²Jamajjeya ¡miquea ejjashahuabaquijji pajea'yocue! ¡Eyacuiñajji nijje e'e jojo nei mimicue! “¡Eyacuiñajji, enijje a'a quea quene pojji!” acue. “¡Ecuea mimishi, ecuea ejjashahuaba taiquijji pajea meesahua'yocue!” acue. ²³E'e Simoni, ecuea eba miquea ejjashahuabaquijji quea tai. Ecuaaya Edosiquiana nijjeya ma dejjaa ajjima acani anaje poso aña miyaya. Jama a sa aña pea'ai, de. Miquea mimishi cuana pajea meeme'e'yo ajja pea'ai. Quea nee nee poaje miya, Simoni —Peno poanaje.

²⁴Peno shajja'ajja majje Simoni quea mete nee nee poanaje. Jamajjeya jama acanaje ba'a: —Peno, Huani pea'ai, ¡Eyacuiñajji nijje mimicue ejo! Jamajjeya Eyacuiñajjiya ecuea mimishi cuana cuijea caje'yo. Miquea esohui jayojja jama pojjeama ohuaya eya acaje'yo —poanaje.

²⁵Majoya Penohua, Huaniya pea'ai Emeshi Mese nei Jesosaja esohui huohui majamaja canaje quea huiso cuana huasijje. Majoya oya cuana poqui o'oyanaje Jenosanena huasijje. Poquije ojjaña cuiñajji cuana huasijje dobiquipoquinaje. Ojjaña Samania meshijo ba'eca cuana huasijje Jesosaja esohui quea pame nee huohui capoquinaje. Majoya esohui huohui majje Jenosanena huasijje poqui o'oyanaje.

Penipeya Etiopia dejja huasijje Jesosaja esohui huohuiqui canaje

²⁶Majoya oe esohuidojojjiya miminaje Penipe nijje. Jama poanaje ba'a: —Penipe, ¡poquicue miya eeno poejji miji jaa ejjojjiije, ma Yasa cuiñajji yasijje quea huesha nee nee epoquijji, ma ejjojjiije Jenosanenajo ba'e cuana poquiani Yasa cuiñajji yasijje, meshi jabo yejje majje!

²⁷Majoya Penipe poquinaje. Poquijeya dejja Etiopia meshijo ba'e ebiñajja cajja'yo ba canananaje. Oya Etiopia dejja etii, emeshi mese epona Canase bajjanijjo chacochoani, aquiana quea nahue, bejjo cuana jaahuanajji. Oya yahuajo poquinaje Jenosanena huasijje Eyacuiñajji bihúiaa. ²⁸Jjeya ca ca oja meshi yasijje poqui o'oyani, ejjojjiije. Mapichiya oya dojo cani aquiana dojojji biajje ani. Poquijeya esohui ba capoquinaje, ma yahuajo nei Eyacuiñajjiya esohui huohuijji Isaiiaa tehue ca poa ba capoquinaje. ²⁹Jamajjeya Edojjoshahua Pame Penipe nijje miminaje jama ba'a: —¡Aquiana dojojji yasijje poquicue miya, Etiopia dejja etii yasijje!

³⁰ Jamajjeya Penipe poquicuajinaje ma dejja que. Shajja'ajja cañaquinaje ohuaya esohui acani. Shajja'ajja majje huohui'ajja canaje jama ba'a: —¿A'a ma esohui miquea eba? ¿A'a miquea quea ja'a nee? —Penipeya acanaje.

³¹ Etiopia dejjaa Penipe saja'a canaje jama ba'a: —Chojja. Ecuea ba jjima. Ecuea quea quehua. ¿Yajjajo ebajji ca huohui jjima, de? ¡E'e pojja'a miyaya eya ba meesahuacue jiquio esohui!

Jamajjeya ohuaya Penipe iyaa canaje. Anioque mee canaje o pejeje, aquiana dojji biajje. ³² Majoya Eyacuiñajjija esohui ba canaje ma Isaiaa yahuajo tehue ca poa Jesosajo, Eyacuiñajjija huoojea'yo ojjaña jaahuanajjijo jama ba'a:

“Ñajjajja dojo cani quecua'yohua jayojja jama onaaya oya iña caje equecua'yojji. Ñajjajja ña dede canijo, quea nee po majje ñajjajja siasia ajja jama jayojja oya mimipanaje ajja poaje onaa oya napa canijo.

³³ Oya mimishi'ama. Jamatii oya quea mimishi acaje cuaa. Oya siajje acaje cuaa jama ba'a: —Oya quea mimishi —acaje. Ojo siajje poaje. Quea mimishi nee nee de, oya acaje onijje nequi cuaa; oya quecua caje'yo pea'ai. Chama'yo tii acaje'yo”.

Jamaya yahuajo Isaiaa tehue ca poa Jesosajo.

³⁴ Ba majje Etiopia dejjaa Penipe huohui'ajja canaje jama ba'a: —¿Ache dejjajo acuae huohui canaje Isaiaa? ¡Huohucue mo oe! E'e pojja'a ohuaya pea dejjajo huohui ca poa. E'e pojja'a huohui ca poa ojaya emano'yojjijo —acanaje Etiopia dejjaa.

³⁵ —E'e —Penipeya acanaje. Majoya ohuaya Eyacuiñajjija esohui etehue'yo huohui capoquinaje quea huiso. Esohui quea pame nee Jesosajo huohui canaje.

³⁶ Majoya oya cuana poquianijo, ena huasijje poeyanaje. Jamajjeya ma Etiopia dejja jama poanaje ba'a: —¡Bacue, ena ani ba'a! Eya pea'ai Jesosa nijje jjapeequije. Jamajjeya ¡besa meecue mo Eyacuiñajjijo jjeya nei!

³⁷ Penipeya saja'a canaje jama ba'a: —E'e, miya Jesosaja epeeji e'e jojo nei poanijo, eyaya miya besa meeje Eyacuiñajjijo —acanaje.

—E'e jojo nei Jesosa Quito Eyacuiñajjija Bacua Ejja, Eyacuiñajjija huoojea'yo ojjaña jaahuanajji. E'e de, jamaya eyaya baña —Etiopia dejjaa acanaje.

³⁸ Jamajjeya ohuaya echacoyji acanaje jama ba'a: —¡Mapichi cuana nequiñaqui meecue!

Mapichi nequiñaqui majje Penipe Etiopia dejja nijje ena huasijje poquinaje. Etiopia dejja besa mee canaje Eyacuiñajjijo. ³⁹ Majoya Penipeya Etiopia dejja besa mee'yo majje, jjequicuaya'yo majje Edojjoshahua Pameya Penipe dojo canaje pea meshi yasijje. Etiopia dejjaja Penipe ba o'oya jjima poanaje. Jamatii oja meshi yasijje poqui'yonaje quea bihui nee nee; Jesosa nijje jjapeequi'yonaje.

⁴⁰ Jjeyahua nei Edojjoshahua Pameya Penipe dojo canaje quea huesha nee esohui quea pame Jesosajo huohuiya. Asota cuiñajji yasijje anioqueñaquinaje. Majoya Asoto cuiñajjijo ani poqui majje quea huiso cuiñajji yasijje poquijeya Eyacuiñajjija esohui huohui canananaje. Quea huesha esohui huohuiqui canaje Sesanea cuiñajji yasijje, Penipeya.

Sanoni Jesosa Quito nije jjapeequi'yonaje

9 ¹Penipeya quea huesha sohuihuohui canijo, Sanoniya Emeshi Mese nei Jesosaja epeeji cuana niñeba majamaja canaje. Quecua sa acanaje. Jamajjeya oya poquinaje joya Eyacuiñajji nije mimiani etii yasijje. ²Po majje Sanoni onijje jama poanaje ba'a: —¡Esohui tehuecue ojjaña Jodio cuana Damasico cuiñajjijo ba'e yasijje, ojjaña Jodio cuanaja ebajji, equi ojee ejjachichaquijjijo anija ebajji! ¡Jama acue ba'a: “¡Sanoni ojjaña Jesosaja epeeji poani cuana ña meecue! ¡Jeyo majje dojo meecue Jenosanena huasijje jeanobiaa, dejja, ponaponaña pea'ai!” acue! —poanaje Sanoni Jodio etii nije.

—E'e —poanaje Jodio dejja—, jamaya ejja'aqui.

³Majoya Sanoni poquinaje Damasico huasijje Jesosaja epeeji cuana ñaa nisho. Ejjojijje poquije Damasico chipi nee yasijje nequiñaquinaje. Eyajo ejjijjiya quea ja'a neeya jeaja'a canaje Sanoni. Quea jeajahua nee nee poanaje. ⁴Jamajjeya Sanoni meshi yasijje oquenaje. Shajja'ajja canaje pea eyajo onijje mimiani jama ba'a: —¡Sanoni, Sanoni! ¿Apiojji acuaya miyaya eya napaña so'o?

⁵—¿Ae bajjani miya? —Sanoni poanaje.

—Eya Jesosa. Miyaya aje oe eya napaña —acanaje Jesosaa eyajo—.

⁶¡Nequisohuacue miya! ¡Poquicue Damasico huasijje! Jomajo peaa miya huohui caje miquea echacojji ma miyaya ejo quijje aje —Jesosa poanaje.

⁷Pea cuana Sanoni nije poquiani nequiñaquinaje. Pea eyajo mimiani shajja'ajja canaje. Esohui ca ca oe shajja'ajja jjima. Oya cuanaja ba jjima eyajo mimiani. Jamajjeya quea mete nee poanaje. Mimimimi ajja poanaje.

⁸Majoya Sanoni nequisohuanaje. Jjabapojja'ajjaqui'yonaje. Cojjama', de. Pea cuaa oya mepejejea canaje Damasico huasijje. ⁹Jomajo oya nequinaje pea beca peejjima cahuime cojjama'. Eyacuiñajji nije mimi tiitiianijo ijja'ijjia jjima poanaje Sanoni.

¹⁰Jesosaja epeeji Anania bajjani Damasicojo ba'enaje. Ma mecajje Eyacuiñajjiya Anania jjacahuiba meequi canaje Emeshi Mese nei Jesosaa oya jama iyaame acanaje ba'a: —¡Anania, shajja'ajjacue mo!

—¿Yajja? Jesosa, miya ecuea Emeshi Mese nei. Eyaya miya shajja'ajjaña —Anania poanaje.

¹¹Emeshi Mese neiya oya huohui canaje jama ba'a: —Anania, ¡poquicue ejjojji yasijje bajjani Ejjojji Epii Nei! ¡Jonasaja equi yasijje poquicue! Dobiqui majje Jonasa huohui'ajjacue jama ba'a: “¿Achejo jaa Sanoni, ma yahuajo Tanaso cuiñajjijo ba'ya poa? Eya onijje mimije” acue, Anania. ¹²E'e, jjeyahua nei Sanoni enijje mimiani. Eyaya Sanoni jjacahuibaqui meenaje pea'ai jama ba'a: Miya o que poenaje. Oja sapa biajje eme' huananaje. Jamajjeya oya quea cojja ja'a po'yonaje —Jesosaa acanaje. Jamaya Anania jjacahuibaqui mee canaje.

¹³Majoya Anania Jesosa nije jama poanaje ba'a: —Emeshi Mese nei Jesosa, ecuea eba Sanoniya miquea epeeji cuana Jenosanenajo ba'e napa canaje quea huiso nee. Jamaya ojjaña eya huohui canaje. ¹⁴Oya

jiquiacua poeyanaje ojjaña miquea epeeji cuana iñaa Jenosanena huasijje ejeanobiajeaquijji. Jodio etiiya oya huoojea canaje, Jodio Eyacuiñajji nijje emimijji etiiya. Eya quea mete Sanonijo, de —Anania poanaje.

¹⁵Majoya Jesosaa Anania huoojea canaje jama ba'a: —¡Poquicue miya, Sanoni que! Oya eyaya babacanaje ecuea esohui huohuijji epo'yojji. Ecuea esohui ohuaya huohui caje Jodio pojjeama cuana huasijje, emeshi mese cuana huasijje, ojjaña pea Jodio dejja cuana ojjaña meshijo ba'e yasijje pea'ai. ¹⁶Ecuea esohui huohuijjiyojo onaaya oya quea huiso napa caje'yo. Quea nee nee poaje oya. Jamaya eyaya oya ba meeje —acanjaje Jesosaa. Jamaya Anania jicahuibaquinaje.

¹⁷Majoya ecahuijaa shequi'yo majje Anania poquinaje Jonasaja equi yasijje, Sanoni jaa huasijje poquinaje. Sanonija sapa biajje eme' huana canaje Ananiaa. Jama acanjaje ba'a: —Epeeji Sanoni, esejaya Emeshi Mese nei Jesosaa eya huoojea canaje mi que. E'e, miyaya ejiojjijje poejeya Jesosa banaje eyajo. Maaya eya huoojea canaje mi quea cojja ja'a po mee'yohua. Jesosaa Edojoshahua Pame mi yasijje dobiqui mee caje'yo pea'ai —acanjaje Ananiaa.

¹⁸Anania onijje mimianijo tii, oja sapa biajje eme huana cajo, aquiana esope jayojja Sanonija ecojjajo ani, ma o quea cojja misi po meeji poani oquequinaje. Jamajjeya quea cojja ja'a nee po o'oyanaje Sanoni. Jamajjeya nequisohua'yajo, Ananiaa Sanoni Eyacuiñajji besa mee canaje Eyacuiñajji nijje epo'yojji. ¹⁹Majoya ijia'ijjia majje Sanoni quea ca'a po'yonaje.

Sanoniya Jesosaja esohui huohui canaje Damasicajo

Oe poji cahuime Sanoni Jesosaja epeeji cuana nijje nequinaje Damasicajo. ²⁰Jodio cuanaja equi ojee ejjachichaquijji yasijje poquinaje Jesosaja esohui huohuiya. Jama huohuime acanjaje ba'a: —Jesosa Eyacuiñajjija Bacua Ejja e'e jojo nei —Sanoniya acanjaje.

²¹Jodio dejja cuana ma equijo ani oja esohui shajja'ajja majje quea mete nee nee poanaje. Jama huohuime acanjaje ba'a: —¿Apiojji acuae jiquio Sanoni mimiani Jesosajo? Jenosanenajo ohuaya quea huiso cuana cuia canaje Jesosa nijje mimianijojo. Oya jiquiacua poeyanaje Jesosaja epeeji cuana iñaa. Eyacuiñajji nijje emimijji etii cuana huasijje dojo sa acanjaje, Jenosanena huasijje. Jjeya ca ca Sanoni Jesosajo mimi majamajani. ¿Yajjajo shai ohuaya Jesosaja esohui huohui cani?

²²Jamatii Sanoniya Jodio cuana Damasicajo ba'e sohuihuohui neinei canaje. Jama atiitii canaje ba'a: —Jesosa e'e jojo nei Eyacuiñajjija huoojea'yo ojjaña jaahuanajji, Quito —Sanoniya acanjaje.

Sanoniya quea ja'a nee nee huohui canaje Jesosajo. Jamatii Jodio cuana onijje jjamimicuiaje nobiqui nequinaje quea huiso. Quea quene nee poanaje: —¿Yajja acuae seya aje so'o? Jesosaja esohui huohuipajeya'yo ajja. ¡Ejjacuiajeaquí'yo Sanoni! —poanaje cuana.

²³Jamajjeya quijje pishana Jodio etii quea quene nee nee po majje jjachichaquinaje. Ojee mimiminajje Sanoni cuia'yojji. ²⁴Pea cuaa ca

ca Sanoni huohui canaje jama ba'a: —Jodio dejja cuaa miya quecua sa acani. Ojjaña pojajajo, mecayje pea'ai ohuaya cuiñajji esecue jjani pejjejo miya ishoa'ajja ca ani ecua'yojji —acanjaje.

²⁵Jamajjeya oe mecayje oja epeeji cuaa Sanoni quehua poqui mee ca'yonaje. E'e, cuiñajji mei jiyo ao'ao biajje oya cuana jaasohuaquinaje. Jomajo Sanoni jjepai aijo jjabioquinaje. Majoya oja epeeji cuaa oya jpapashineijje jeaoquea ca'yonaje meshi yasijje, cuiñajji secue yasijje. Majoya Sanoni Jenosanena huasijje poqui'yonaje.

²⁶Jamajjeya Jenosanena huasijje poqui'yo majje Sanoni Jesusaja epeeji cuana nijje jjapeequi sa poanjaje. Jamatii Sanoni Jesusaja epeeji pojjeama poso acanjaje cuaa. Ojo quea mete nee nee poanjaje: “Eya iña ca chana!” poanjaje cuana. ²⁷Majoya Jesusaja epejjiya Benabeya Sanoni dojo canaje Jesusaja huoojea'yo esohui huohuijji cuana huasijje. Oya cuana huohui canaje jama ba'a: —Epeeji cuana, ja'a quea mete pojji Sanonijo! E'e, jiquio Sanoniya ejiojjijje poquijeya Emeshi Mese nei Jesosa ba canaje. Jesosa onijje miminaje pea'ai. Majoya ohuaya Jesusaja esohui huohui neinei canaje Damasiojo nequiya —acanjaje Benabeya.

²⁸Jamajjeya Sanoni Jesusaja huoojea'yo esohui huohuijji cuana nijje ba'enaje. Ohuaya onijjeya Jenosanenajo mete'ama huohui mee canananaje Jesusaja esohui. ²⁹Jomajo yaninaje Jodio cuana Jienoja esohuijo mimiani. Sanoni ona nijje mimiquinaje quea huiso. Jesusaja esohui huohui canaje. Maaya mimicuiajejanobiajea sa acanjaje Sanoni. Sanoni nijje quea quene nee nee po majje oya cuiajea sa acanjaje Jesusaja esohui huohui cajo. ³⁰Maya ba majje Sanonija epeeji cuaa oya dojo canaje Sesanea cuiñajji yasijje. Majoya oya huoojea canaje quea huesha nee, oja cuiñajji yasijje, Tanaso huasijje bishejo.

³¹Majoya Jodea meshijo, Janinea meshijo, Samania meshijo pea'ai pea cuana Jesusaja epeeji cuana nijje quea bei poanjaje. Napa pajea canaje. Jamajjeya quea huiso nee nee Jesosa nijje jjapeequi'yonaje. Edojjoshahua Pameya oya cuana ba'e meesahua canaje. Ojjaña cuana Emeshi Mese Jesusaja esohui jayojja jama ba'enaje quea ja'a nee nee.

Peno poquinaje Nida cuiñajji yasijje, Jope cuiñajji yasijje pea'ai

³²Majoya Peno ojjaña cuiñajji yasijje poquinaje Jesusaja epeeji cuana baa. Nida huasijje poquinaje Jesusaja epeeji cuana nijje jjapeequiya, esohui huohuiya pea'ai. ³³Jomajo Penohua pea dejja ba canaje, Eneasi bajjani. Eneasi aje oe jeo'ajja. Oya ejaa jaanaje me oejje pea beca peejjima shequijame, 8 shequijame. ³⁴Jamajjeya oya ba majje Penohua huohui canaje jama ba'a: —Eneasi, Jesusaa miya jeo mee cajeyo. ¡Nequisohuacue! ¡Miquea ejaajji bebocue!

Jjeyahua nei Eneasi nequisohuanaje. Quea ja'a nee nee poanjaje, de. ³⁵Ojjaña cuaa Nidajo ba'eya, Sanohuijo ba'eya pea'ai Eneasi ba canaje jeojeo'yonaje. Jamajjeya quea huiso nee Jesosa nijje jjapeequi'yonaje.

Tabita mano'yo majje shequi o'oyanaje

³⁶Jope cuiñajji epona tii Tabita bajjani ba'ya poa, Ese Ejja esohuijo ca ca oya Docuei bajjani. Oya Jesusaja epeeji nei. Tabitaa quea pame nee atitii canaje. Aema' cuana ba'e meesahua canaje pea'ai. ³⁷Tabita aje quea mano poanaje. Mano'yonaje. Epeeji cuaa oya shacua ca'yonaje. Majoya jaahuana canaje eyajo jaa equecuayijji yasijje. ³⁸Jope, Nida quea chipi nee, huesha'ama. Jamajjeya Jesusaja epeeji cuana Jopejo ba'eya shajja'ajja canaje Peno Nidajo nequi. Jamajjeya beca dejja huojea canaje Peno que. Jama huohuime acanaje ba'a: —Peno, ¡poecuajicue ecuana nijje Jope yasijje!

³⁹Jamajjeya shajja'ajja majje Penohua ojaya aquiána bio canaje. Ona nijje poquinaje Jope yasijje. Jope yasijje poe'yajo ojjaña cuana nijje oya sohuaquinaje eya equecuayijji yasijje Tabita baa. Ojjaña e'ahuemano cuaa pa neineianiya Peno ocuee canaje. Tabitaja soco ba mee canaje. Ojo jama huohuime acanaje ba'a: —¡Bacue, Peno! Eshe anijo Tabitaa ecuanaja daqui eyami, daqui nei pea'ai quea huiso soco canaje. ¡Bacue ojaya esipi'yo ecuanajaya pea'ai! —acanaje cuaa.

⁴⁰Majoya Penohua ojjaña cuana huojeacuayajea canaje esecue yasijje. Ecuí'oshajjajo nequi majje Eyacuiñajji nijje miminaje. Eyacuiñajji nijje mimi majje epona emano'yojaa nijje miminaje jama ba'a: —¡Tabita, shequi'yocue! ¡Nequisohua'yocue miya!

Shequi'yo majje Tabita jjabapojjaqui'yonaje. Peno ba majje anisohuanaje. ⁴¹Majoya Penohua Tabita me iña majje nequisohua meesahua ca'yonaje. Tabita nequisohua meesahua'yo majje Penohua Jesusaja epeeji cuana, e'ahuemano cuana pea'ai esecuejo nequi iyaa canaje Tabita bajji. Jama acanaje ba'a: —¡Dobicue! ¡Miquea epeeji Docuei bahuacue! Shequi'yonaje, Jesusaa oya shequi mee ca'yonaje.

⁴²Ma shajja'ajja majje quea huiso nee Jopejo ba'e Jesosa nijje jjapeequi'yonaje. ⁴³Jamajjeya Peno Jopejo nequinaje quea cahui huiso. Dejja Simono bajjani nijje ba'enaje, ijjiacajji jee chacoji nijje.

Penohua Jodio pojjeama huasijje esohui huohui canaje, Conenio huasijje

10 ¹E'e Teopino, eyaya, Nocaa jiquio pea esohui tehueaña miquea ebajji. Esohui e'e nei Jesusaja epeeji cuanajo tehueaña jama ba'a: Oe dejja Conenio bajjani Sesanea cuiñajji ba'enaje. Oya Jodio pojjeama, Shomano dejja, quea huiso nee sohuinano huojeajji poani, ma bajjani ba'a: Itaniano sohuinano cuana. ²Jamatii Conenio quea pame nee. Ojaya huapa pojjeama cuana nijje Eyacuiñajji esohui jayojja jama ba'e sa poani. E'e, ohuaya aema' cuana ba'e meesahua canaje; quea huiso aquiána quia canaje sosema'. Eyacuiñajji nijje mimi majamajanaje pea'ai. ³Oe pojajajo eshequi jjanequijeapaaquijajo Eyacuiñajji Conenio jjacahuibaqui mee canaje jama ba'a: Cahuiba canaje Eyacuiñajji esohuidojojji o que poe majje onijje miminaje jama ba'a: —¡Conenio, shajja'ajjacue mo!

⁴Esohuidojojji ba majje Conenio quea ajjajja nee jama poanaje ba'a: —¿Yajja? ¿Ae sa poani miya? ¡Huohuicue mo!

Esohuidojojjiya oya jama acanaje ba'a: —Eyacuiñajjiya miquea emimi cuana onijje shajja'ajja canaje. Miya aema' cuana huasijje aquiana quiaña sosema' ojaya eba pea'ai. Jamajjeya minijje quea bihui nee poani. ⁵Jamajjeya ijjeya nei beca dejja huoojeacue Jope yasijje! Jomajo oe dejja Simohui Peno bajjani enequi. ¡Peno jjequi meecue! ⁶Oya Peno Simonoja equijo ba'yani, ijjiacajji jee chacojji poanija equijo. Ojaya equi bae ai sahuajo ani —acanaje Eyacuiñajjiya esohuidojojjiya. Jamaya Conenio jjacahuibaquinaje.

⁷Majoya esohuidojojji poqui'yonaje. Conenio shequi'yonaje. Shequi'yo majje ojaya echacosahuajji beca iyaa canaje. Oe Sohuinano ojaya epeeji quea pame nee iyaa canaje, ma Eyacuiñajji nijje mimiani pea'ai. ⁸Eyacuiñajjiya esohuidojojjiya esohui onijje Coneniohua huohui canaje. Majoya oya cuana huoojea canaje Jope yasijje.

Penohua cahuiba canaje

⁹Jamajjeya Conenioja epeeji cuana Jope yasijje poquinaje. Pea pojajjo eshequi biacojjajja nequijo Jope ba cañaquinaje quea chipi nee.

Peno ca ca Jopejo Simonoja equijo nequi equi jamacoo huasijje jaasohuaquinaje Eyacuiñajji nijje mimiya. ¹⁰Eshequi biacojjajja nequijo Peno quea shoe nee poanaje. Bobi ijji sa poanaje. Onaa Penoja bobi cuacua canijo, Penohua ishoa'ajja ca aninaje bobi. Majoya equi jamacoojo jaa cahuinaje. Eyacuiñajjiya oya jjacahuibaqui mee canaje jama ba'a: ¹¹Esecue quea quemo jayojja ba canaje eyajo. Esecue eca'apejo nequi. Aquiana equipajaajji quea quemo jayojja ba canaje, jjapashineijje jeaoquea canaje o que, jjono eyichijjo jayojjajo. ¹²Ma equipajaajji ojaña ijjiacajji cuana, peyo cuana, ojjaña cuichoiji cuana pea'ai ba canaje, eshe, de. Jamaya jjacahuibaqui mee canaje pea'ai ba'a: ¹³Eyajo Jesosa Peno nijje miminaje jama ba'a: —Peno, ¡nequisohuacue! ¡Ijjiacajji cuana, peyo cuana, cuichoiji cuana pea'ai quecuacue e'ijjiajji! —poanaje.

¹⁴Penohua ca ca jama acanaje ba'a: —Emeshi Mese Jesosa, chojja. Eya ijji sa po'yo ajja ma aquiana cuana. Peajja, de. Yahuajo ecuanaja etiiquiana cuanaja esohui jayojja jama poanijo ma aquiana cuana ecuea ijji jjima. Eya coma ijji sa po'yo ajja nei nei —poanaje Peno.

¹⁵Eyajo Jesosaa Peno huohui ca o'oyanaje jama ba'a: —Eyacuiñajjiya ojjaña bobi quea pame po mee ca'yonaje. Jamajjeya ¡a'a jama pojji ba'a: “Jiquio bobi peajja, coma ijji ajja ca iña” a'a pojji, Peno! —Jesosa poanaje.

¹⁶Jamaya Jesosaa Peno pea beca peejjima huohui'yome acanaje, oya jayojja huohui'ajja o'oyame acanaje Peno ecahuijaa. Majoya equipajaajji jjequisohua ca'yonaje eyahuasijje.

Jamaya jjacahuibaquime meeya Peno Jesosaa acanaje ejjabahuejjaqui meejji jama ba'a: Jodio pojjeama cuana Jodio cuana jayojjaya

Eyacuiñajjija quea jea nee. Oya cuana pea'ai Jesosa nijje jjapeequi meesahua caje'yo, mimishi cuijea caje'yo pea'ai.

¹⁷Jamajjeya shequi'yo majje Peno jjashahuabaqui aninaje jama ba'a: —¿Ajeo shai iña Jesusaa jjacahuibaqui mee canaje? ¿Ae shai ohuaya eya ba mee sa acani?

Peno jamaya jjashahuabaquianijo, Conenioja echacojji cuana poeyanaje Jope yasijje. Simonoja equi sa'ajja canaje. ¹⁸Ba majje esecue yasijje poeyanaje. Secuejo nequi taaanaje jama ba'a: —¿A'a Simohui Peno yani jiquiojo?

¹⁹⁻²⁰Peno ma ohua cahuiba canajejo jjashahuabaquianijo, Edojjoshahua Pameya oya huoojea canaje jama ba'a: —Peno, ¡shajja'ajjacue! Pea beca peejjima dejja poeyanaje mi baa. ¡Jamajjeya nequisohuacue; jaooquequicue; oya cuana baquicue esecue jjanijo nequi! ¡Onijje poquicue, Peno! ¡A'a quea mete pojji! Eyaya oya cuana huoojeanaje mi dojhua.

²¹Jamajjeya Peno jaooquequinaje ma dejja cuana baa. Huohui'ajja cañaquinaje jama ba'a: —E'e. ¿A'a miyaya eya sa'ajjaña? Quiويا iña. ¿Apiojji acuaya iña sa'ajjaña? ¿Ajeo acuae mi poeyanaje so'o?

²²Onaaya Peno huohui canaje jama ba'a: —Coneniohua, ma sohuinano cuana huoojeajji poaniya Sesaneajo ba'eya ecuana huoojea canaje. Ohuaya quea pame nee acani, Eyacuiñajjija esohui jayojja jama acani. Oya ojjaña Jodio cuanaja quea boti nee. Eyacuiñajjija esohuidojojji onijje miminaje jama ba'a: “¡Dejja cuana huoojeacue Jope yasijje Peno jjequiya! ¡Peno miquea equi yasijje jjequicue! ¡Penoja esohui shajja'ajja neineicue miquianaaya o poeyajo!” poanaje esohuidojojji —Conenioja epeejiya Peno acanaje.

²³Jamajjeya Penohua oya cuana iyaa canaje esecuejo nequi: —E'e, ¡dobucue! ¡Jiquiacua cahuicue ecuana nijje! —poanaje. Jomajo oya cahui oe poanaje.

Peno Conenioja equi yasijje poquinaje esohui huohuiya

Mecajjeahua nei shequi majje Peno poquinaje Conenioja epeeji cuana nijje Sesanea huasijje. Pea Jesusaja epeeji Jopejo ba'e poquinaje pea'ai.

²⁴Sesaneajo ca ca Coneniohua oya cuana ishoa'ajja ca aninaje. Ojjaña ojaya huapa pojjeama cuana, ojaya epeeji cuana pea'ai iyaa canaje ojaya equi yasijje Peno ishoa'ajjajji. Jamajjeya beca cahuime po majje Penohua Sesanea ba cañaquinaje. ²⁵Conenioja equi yasijje poeyajo, Conenio equijo ani cuayaquinaje o baa. Ecuí'oshajjajo nequi majje Peno bihuia canaje, ohuaya.

²⁶Penohua ca ca oya jama acanaje ba'a: —¡Dee! ¡Nequisohuacue oe, miya! Eya aje dejja pea'aiya, mi jayojjaya. ¡A'a jja oe eya bihuiajji! —Peno poanaje.

²⁷Conenio nijje mimimimiqui tii Peno dobiquinaje equi yiyedojjo huasijje. Eyiye dojjojo quea huiso ejjachichaqui nequi ba cañaquinaje. ²⁸Majoya ojjaña ba majje Penohua huohui canaje jama ba'a: —¡Bacue! Yahuajo Jodio cuaa huohui ca poa jama ba'a: “Jodio cuana, ¡a'a dobiquijji Jodio pojjeamaja equi yasijje! ¡A'a ona nijje ¡jjia'¡jjiajji!” Jamaya yahuajo nei Jodio cuana poa. Maya miquianajaya eba. Jamatii Eyacuiñajjiya eya ba mee canaje jama ba'a: “¡A'a Jodio pojjeama quea tai poso ajji!” jamaya eya acanaje Eyacuiñajjiya —Peno poanaje.

²⁹—Jamajjeya miquiianaaya eya iyaanajejo eya quea bihui nee poeyanaje miquiiana baa. E'e. Jamajjeya ¿ae sa poani miya? ¿Apiojji acuae iña iyaanaje so'o? —Peno poanaje.

³⁰Coneniohua Peno jama acanaje ba'a: —Peno, yahuajo Eyacuiñajjija esohuidojojji enijje miminaje. E'e, ebeca pee pea'ai cahuime yahuajo eshequi oya jayojja nequijo eya Eyacuiñajji nijje mimi nequinaje tii tii equijo. Eshequi jjanequijeapaaquianijo oe dejja jjanequipanaquinaje. Oja daqui quea jeajahua nee nee poanaje. ³¹Oya enijje miminaje: “Conenio, Eyacuiñajjiya miquea emimi shajja'ajja canaje. Miya aema' cuana bobiaña ba canaje pea'ai. Miya ojaya quea boti nee. ³²Jamajjeya ¡beca dejja huoojeacue Jope yasijje! ¡Dejja Simohui Peno bajjani iyaa meecue! Oya Peno pea dejja bajjani Simono nijje nequi, ijjiacajji jee chacojji poani nijje nequi, bae ai sahuajo ba'e nijje nequi” jamaya eya acanaje esohuidojojjiya. ³³Jamajjeya ma shajja'ajja majje jjeyahua nei eyaya beca dejja huoojeanaje mi jjequiya. Mi poeyajo eya quea bihui nee poanaje. Eyacuiñajjija eba ecuana quea huiso jjachichaquinaje miquea esohui shajja'ajjaa. E'e, ecuaaya Eyacuiñajjija esohui shajja'ajja sa aña. Jamajjeya ¡ojjaña Eyacuiñajjija esohui ecuana huohuicue jjeya nei, ma ohua mi huohui canaje ecuana huohuijji! —Conenio poanaje.

Penohua esohui huohui canaje Conenioja equijo

³⁴Jamajjeya Penohua huohui canaje jama ba'a: —E'e de. Jjeya ecuea eba Eyacuiñajjija ojjaña cuana quea jea nee acani. Jodio pojjeama Jodio cuana jayojjaya jama acani e'e jojo nei, Eyacuiñajjiya. ³⁵E'e, ojjaña joya quea pame ba'yani, Eyacuiñajjija esohui jayojja jama poani pea'ai ohuaya jaahuana cani, ojjaña cuana ojjaña meshijo ba'e, ojjaña pea mimime poani pea'ai —Penohua acanaje.

³⁶—Conenio, miquea eba Eyacuiñajjiya Isaeni dejja cuana huasijje ojaya esohui quea pame nee Jesosa Quitoja huohui ca poa jama ba'a: “Emeshi Mese nei Jesosa Quito nijje jjapeequianijo, Eyacuiñajji ojjaña nijje quea bei poaje'yo, mimishi cuijea'yo majje”. Jamaya aca poa cuaa yahuajo nei —Peno poanaje—. ³⁷E'e Conenio, miquea eba pea'ai Huaniya, ma Eyacuiñajjijo ebesameejji poaniya huohui canaje jama ba'a: “¡Miquea mimishi pajea'yocue! ¡Eyacuiñajjijo besacue!” acanaje Huaniya. Ohuaya Jesosa besa mee canaje pea'ai. Majoya Jesosaa Janinea meshijo, ojjaña cuiñajjijo Jodioja meshijo sohuihuohui canaje; quea pame nee acanaje pea'ai. ³⁸Jama poanaje ba'a: Eyacuiñajjiya Jesosa Nasanenajo ba'e que Edojjoshahua Pame huoojea canaje, dobiqui mee ca'yonaje. Jesosa quea ca'a nee nee po mee canaje. Ma dejjaa ajjima acani quea huiso nee quea pame nee nee ameesahua canaje. Jesosaa poquijeya quea huiso nee nee emanojaa cuana huaquia mee ca'yonaje. Eshahua cuana dejjajo nequi huoojeacuayajea mee ca'yonaje Jesosaa Eyacuiñajji nijjeya —Penohua acanaje—. ³⁹E'e Conenio, Jesosaa quea pame nee acani ecuaaya, ojaya epeeji cuaa banaje. Onijje poquinaje

ojjaña Jodio meshi yasijje, Jenosanena huasijje pea'ai. Jamatii pea cuaa Jesosa quea mimishi aca'yonaje. Acui ecueata'apeejo ba'ehuanasohuajea ca'yonaje emano'yojji. ⁴⁰Jamatii Jesosa mano'yajo, pea beca peejjima cahuime epo jaa Eyacuiñajjiya oya shequi mee ca o'oyanaje. Majoya Eyacuiñajjiya oya ecuana huasijje huoojea ca o'oyanaje. E'e, ecuaaya oya banaje eshe o'oya. ⁴¹Ojjaña dejja cuanaja oya ba o'oya jjima. Ecuanaaya, ma Eyacuiñajjiya yahuajo babaca ca poaa oja esohui huohuijji poaniya ca ca oe ecuaanaaya Jesosa ba o'oyanaje. Shequi o'oya majje oya ecuana nijje ijja'ijjianaje, ena ishi canaje pea'ai. ⁴²Majoya ohuaya ecuana huoojea canaje ojaya esohui huohuiya ojjaña cuana huasijje. Jama huohuime aña ba'a: "Quijje Eyacuiñajjiya Jesosa huoojea caje o'oya. Jesosaa poe o'oya majje ojjaña sosequia caje'yo ma eseya mano'yo jjimahua aninaje poa sosejje. E'e, ojjaña eshe nequi cuana, ojjaña yahuajo nei mano'yo pea'ai ohuaya sosequia caje'yo ma eseya mano'yo jjimahua aninaje poa sosejje. Ojjaña joya quea pame ba'ya poa quea bihui nee ba'e tiitii mee caje'yo eyajo onijje. Mimishi cuana ca ca quea nee nee po mee caje'yo tii tii. ⁴³E'e Conenio, yahuajo nei nei Jesosa poe jjimahuajeo Eyacuiñajjiya esohui huohuijji cuaa Jesusajo huohui ca poa jama ba'a:

"Oya quea pame nee nee, quea ca'a nee nee poanijo, ojjaña joya onijje jjapeequiani Eyacuiñajjiya mimishi cuijea caje'yo. Jamajjeya oya cuana cuaqui yasijje poqui'yo ajja mano'yo majje".

Jamaya yahuajo nei Jesusajo tehue ca poa cuaa —jamaya Penohua esohui huohui canaje. Ojjaña cuaa Conenioja equijo nequiya shajja'ajja canaje.

Edojjoshahua Pame Jodio pojjeama huasijje dobiqiu'yonaje

⁴⁴Penohua sohuihuohui canijo tii, Edojjoshahua Pame Conenio que, ojaya epeeji cuana que pea'ai dobiqiu'yonaje, ma Penohua sohuihuohui cani yasijje. ⁴⁵E'e, Eyacuiñajjiya Edojjoshahua Pame huoojea ca'yonaje Jodio pojjeama cuana huasijje. Ma ba majje Jodio cuana Peno nijje nequi jjajjasoaquinaje: —E'e de, Eyacuiñajjiya Edojjoshahua Pame huoojea ca'yonaje Jodio pojjeama huasijje pea'ai —poanaje Jodio cuana ma Peno nijje poquinaje.

⁴⁶E'e, Jodio cuaa Conenio shajja'ajja canaje Eyacuiñajji bihuia cani, de, pea mimi'yome poanaje pea'ai. ⁴⁷Jamajjeya Penohua jama acanaje ba'a: —Yahuajo Eyacuiñajjiya Edojjoshahua Pame ecuana huasijje huoojea canaje jayojja jama jjeya ohuaya Edojjoshahua Pame jiquio dejja cuana huasijje huoojea canaje pea'ai. Jamajjeya ecuaanaaya oya cuana Eyacuiñajjiyo cabesa mee'yahua ena huasijje, ¿a'a e'e? —Penohua acanaje.

⁴⁸Jamajjeya Penohua pea cuana huoojea canaje Jesosa Quitoja epeeji ma jjeya nei onijje jjapeequinaje besa meeya Eyacuiñajjiyo. Majoya Conenio, oja epeeji cuana pea'ai miminaje Peno nijje. Jama poanaje ba'a: —Peno, ¡che ecuana nijje nequicue, esohui ba meesahuacue! —acanaje.

Jamajjeya Peno onijje nequinaje. Majoya quijje pishana Peno poqui'yonaje Jenosanena huasijje.

**Penohua Jesusaja epeeji cuana Jenosanenajo ba'e
huohui canaje Coneniojo, Jodio pojjeamajo**

11 ¹Jamajjeya Jesusaja huoojea'yo esohui huohuijji cuaa, ojjaña Jesusaja epeeji cuaa Jodea meshijo ba'eya pea'ai shajja'ajja canaje Coneniojo. Ojjaña jama acanaje ba'a: —Jodio pojjeama cuaa pea'ai Eyacuiñajjija esohui shajja'ajja ca'yonaje; jamaya aca'yonaje quea bihui nee, de —acanaje cuaa.

²⁻³Jamajjeya Peno Jenosanena huasijje poqui o'oyajo, beca Jodio cuana onijje mimijajinaje jama ba'a: —Peno, ¿apiojji miya Jodio pojjeama cuanaja equi yasijje dobiquinaje so'o? E'e, miya ca ca oe Jodio pojjeama cuana nijje ijjiia'ijjianaje pea'ai. ¿Apiojji? Jamaya pojjeama esejaya etiiquianaja esohui. Oya cuanaja cuiishasha biso nei ejehuissejjajea'yo pojjeamajo oya peajja, de —poanaje Jodio cuana.

⁴Jamajjeya Penohua oya cuana huohui canaje ojjaña joya Eyacuiñajjiya Jodio pojjeama cuanajo acanaje. ⁵Jama acanaje ba'a: —Ecuea epeeji cuana, eya Jopejo nequi Eyacuiñajji nijje mimi aninaje. Eyacuiñajjiya eya jjacahuibaqui mee canaje jama ba'a: Ijjiacajji cuana aquiana cuana quibi jayojjajo iya majje jeaoquea canaje e que, jjonojo. ⁶Ma quibi dojjojo eyaya banaje ojjaña ijjiacajji cuana, peyo cuana, ojjaña cuichojji cuana pea'ai. ⁷Eya jjacahuibaqui mee canaje jama ba'a: Eyajo Jesosa enijje miminaje jama ba'a: “Peno, ¡nequisohuacue! ¡Ijjiacajji cuana, peyo cuana, cuichojji cuana pea'ai quecuacue e'ijjiajji!” acanaje. ⁸Jamatii eyaya saja'anaje jama ba'a: “Jesosa, chojja, eya ijjiia sa po ajja ma aquiana cuana. Peajja, de. Yahuajo ecuanaja etiiquiana cuanaja esohui jayojja jama poanijo ma aquiana cuana ecuea ijjiia jjima” eya poanaje. ⁹Majoya Jesosa enijje mimi o'oyanaje: “Eyacuiñajjiya ojjaña aquiana cuana quea pame nee po mee ca'yonaje. Jamajjeya ¡a'a miya jama pojji ba'a: —¡Jiquio aquiana cuana peajja, coma ijjiia ajja ca iña! —a'a pojji, Peno!” acanaje Jesosaa eya ecahuijaa. ¹⁰Jamaya eya huohui huicha'a huicha'a canaje, pea beca peejjima huohuime acanaje. Majoya ojjaña jjequisohua ca'yonaje eyahuasijje.

¹¹—Majoya pea beca peejjima dejja ecuea equi yasijje poeyanaje. Oya cuana Sesaneajo ba'e o chacomeejjiya huoojea canaje e dojhua. ¹²Edojjoshahua Pame enijje miminaje jama ba'a: “¡Ona nijje poquicue mete'ama!” Jamajjeya eya poquinaje Sesanea huasijje. Jiquio Jesusaja epeeji me oeje oe huisome enijje nequi poquinaje pea'ai enijje. Ecuana Conenioja equi yasijje dobiquinaje. ¹³Majoya Coneniohua ecuana huohui canaje jama ba'a: “Eyacuiñajjija esohuidojojji ecuea equijo jjanequipanaquinaje. Enijje miminaje. Jama poanaje ba'a: —¡Beca dejja huoojeacue Jope yasijje Simohui Peno jjequiya! ¹⁴Ohuaya miquianaya sohuihuohui caje. ¡Ojaya esohui jama acue! Jamajoya Eyacuiñajjiya miquianajaya mimishi cuana cuijea caje'yo; onijje ba'e tiitii

mee caje'yo eyajo miya, miquea huapa pojjeama cuana pea'ai —eya acanaje esohuidojojjiya” jamaya Coneniohua eya huohui canaje —Peno poanaje—. ¹⁵Eya Conenio sohuihuohui'anijo tii Edojjoshahua Pame ojjaña cuana huasijje dobiqui'yonaje. E'e, ma ecua eseya yahuajo acanaje jayojja jama oya cuana aca'yonaje. ¹⁶Majoya eyaya niñeba'yonaje esejaya Emeshi Mese nei Jesosaja esohui yahuajo jama ba'a: “Ena huasijje ca ca oe Huaniya miquianaya besa mee canaje Eyacuiñajji. Quijje ca ca eyaya miquiana que Edojjoshahua Pame dobiqui meeje'yo Eyacuiñajji nijje epo'yojji tii tii” poanaje Jesosa yahuajo —Penohua acanaje—. ¹⁷E'e, Jesosa Quito nijje jjapeequianijo, Eyacuiñajjiya Edojjoshahua Pame huoojea canaje ese que. Oya jayojjaya jjeya Jesosa Quito nijje jjapeequianijo, Eyacuiñajjiya Jodio pojjeama cuana huasijje Edojjoshahua Pame huoojea ca'yonaje pea'ai. Eyacuiñajjiya quea pame nee nee acani tii tii. Jamajjeya eya ca iña Eyacuiñajji huoojea'yojji pojjeama. Eyaya oya huohui'yo ajja jama ba'a: “¡A'a Jodio pojjeama huasijje Edojjoshahua Pame huoojea'yojji!” Chojja, jamaya eyaya Eyacuiñajji huohui ajja, de. Eya Eyacuiñajjiya echacojji, de, ojaya esohui jayojja jama aña eyaya —Peno poanaje.

¹⁸Jamajjeya Penoja esohui shajja'ajja majje Jodio cuana Peno nijje mimijaji pajea'yonaje; Eyacuiñajji bihuia ca'yonaje jama ba'a: —E'e, jamajjeya Eyacuiñajjiya Jodio pojjeama cuana mimishi pajea meesahua cani. Jesosa nijje jjapeequi meesahua cani pea'ai. Jodio pojjeama cuanaja mimishi cuana cuijea'yo majje oya cuana ba'e tiitii mee caje'yo eyajo onijje pea'ai —poanaje ojjaña cuana.

Jesosaja epeeji cuana Atioquia cuiñajji ba'e

¹⁹E'e, yahuajo Jodio etii cuaa Jesosaja epeeji Estema sapa jajahuejjajea'yo majje ojjaña Jesosaja epeeji cuana napa majamaja canaje pea'ai. Jamajjeya ojjaña Jesosaja epeeji cuana quea huiso meshi yasijje quehua poquinaje quea mete jjejojo. Beca cuana quea huesha nee poquinaje Penisia meshi yasijje, Atioquia cuiñajji yasijje pea'ai. Pea cuana Chipe nasi yasijje besapoquinaje bishejo. Poquijeya Eyacuiñajjiya esohui huohui capoquinaje Jodio cuana huasijje. Jodio pojjeama cuana huasijje ca ca Jesosaja esohui huohui jjima acapoquinaje. ²⁰Majoya Jesosaja epeeji Chipe nasijo ba'e, Sinene meshijo ba'e pea'ai poquinaje Atioquia cuiñajji yasijje. Jomajo ohuaya Jodio pojjeama cuana huasijje pea'ai Eyacuiñajjiya esohui quea pame nee Jesosajo huohui canaje. ²¹Emeshi Mese nei Jesosaa oya cuana esohui huohui meesahua canaje. Jamajjeya quea huiso cuana Jesosaja esohui shajja'ajja majje onijje jjapeequi'yonaje, quea huiso nee nee. ²²Ma shajja'ajja majje Jesosaja epeeji Jenosanenajo ba'eya Jesosaja epeeji etii Benabe bajjani huoojea canaje Atioquia huasijje Jesosaja epeeji cuana baa. ²³Atioquia huasijje poe majje Benabeya ba cañaquinaje Eyacuiñajjiya Jodio pojjeama quea jea nee acanaje e'e jojo nei. Jamajjeya Benabe quea bhui nee poanaje. Jesosaja epeeji eyacua cuana jama huohuime acanaje ba'a: —E'e, jamaya. ¡Eyacuiñajjiya esohui jayojja jama atiitiicue! ¡A'a oya pajea'yojji! ¡Onijje jjapee tiitiicue!

²⁴Benabe Jesusaja epeeji quea pame nee. Edojjoshahua Pameja ejjashahuabaquiji jayojja jama acanaje tii. Jesusaja esohui jayojja jama atiitii canaje. Jamajjeya quea huiso cuana Emeshi Mese nei Jesusaja epeeji poanaje Benabeja esohui shajja'ajja majje.

²⁵Majoya Benabe poqui'yonaje Tanaso cuiñajji yasijje Sanoni sa'ajja'yohua. ²⁶Ba majje ohuaya Sanoni jjequi canaje Atioquia huasijje onijje esohui huohuijji. Jomajo Atioquiajo oya cuana nequi'yonaje Jesusaja epeeji cuana nijje oe shequiajame. Quea huiso nee nee Jesusaja esohui huohui majamaja canaje jomajo. Majoya Atioquiajo pea cuaa Jesusaja epeeji cuana bajjani canaje Quitoja epeeji, Quitiano cuana bajjani acanaje.

²⁷Majoya pea Jesusaja esohui huohuijji cuana Jenosanenajo ba'e poquinaje Atioquia huasijje. ²⁸Majoya ojjaña Jesusaja esohui shajja'ajjaa jjachichaquinaje. Oe esohui huohuijji Ajamo bajjani nequisohuanaje. Eyacuiñajjija Edojjoshahua Pameya oya huohui meesahua canaje. Jamajjeya Ajamohua huohui canaje jama ba'a: —Quijje pishana ojjaña meshijo ojjaña cuana quea shoe nee nee poaje'yo. Bobi chama' poaje'yo —jamaya ojjaña acanaje, Ajamohua. (Quijje pishana pea shequiaja po majje e'e jojo nei jamaya poanaje. Bobi chama' poanaje. Quea huiso nee quea shoe nee nee poanaje Shomano dejja Canio bajjani emeshi mese nequijo.)

²⁹Jamajjeya Ajamoja esohui shajja'ajja majje Jesusaja epeeji cuaa huohui canaje jama ba'a: —E'e, ecuaaya Jesusaja epeeji cuana huasijje Jodea meshijo ba'e yasijje bejjo huoojeaje o ba'esahuajji —poanaje.

Jamajjeya aquiana cuana, bejjo pea'ai chicha canaje. Beca cuaa oe pojji quia canaje. Pea cuaa joya quea aquiana huiso neeya quea huiso bejjo quia canaje. ³⁰Jamajjeya quijje quea huiso bejjo chicha majje huoojea canaje Benabe nijje, Sanoni pea'ai nijje. E'e, ohuaya bejjo dojo canaje Eyacuiñajjija epeeji etii yasijje equia'yojji ojjaña Jesusaja epeeji cuana huasijje.

Jacobo jaja ca'yonaje

12 ¹Ecuea epeeji Teopino, eyaya, Nocaa pea esohui tehueña Jesusaja epeeji cuanajo jama ba'a: Pea Enode emeshi mese nequinaje. Ohuaya Jesusaja epeeji cuana napa ca'yonaje quea huiso. ²Huanija echahua mese Jacobo sapa jajasejjajaea mee ca'yonaje baa aiya, de Enodeya. ³Jodio etii cuana quea bihui nee poanaje Jacobo quecua ca'yajo. Ma ba majjeya Enodeya huohui cajo Peno iña canaje pea'ai. Dojo canaje jeanobiaa, quijje equecua'yojji. Jamaya poanaje ojjaña Jodio cuana jjachichaquinaje pahui shejee mee jjima e'ijjijajji, quea bihui epojji. ⁴E'e, ma shejo Enodeya Peno equi ejjajejanobiaquiji yasijje jeanobia canaje. Sohuinano quea huisohua Peno jaahuana mee canaje. Enodeya Peno jaja mee sa acanaje quijje, ojjaña Jodio cuana pahui shejee jjima ijija majje. ⁵Jamajjeya Sohuinano cuaa Peno jaahuana neinei canaje ejeyo'yo jaa. Jamatii Jesusaja epeeji cuana Eyacuiñajji nijje mimi tiitiinaje Penajo: —Eyacuiñajji, ¡Peno jaahuanacue! ¡A'a quecua mee'yojji! —amajamaja canaje epojjajo, mecajje pea'ai.

Peno ejeanobia jaa esecue yasijje dojocuayaqui ca'yonaje esohuidojojjiya

⁶Majoya Enodeya Peno ejequicuayaqui'yojji nisho acanaje mecahuajje ejajajea'yojji nisho. Peno ca ca cahuijaanaje beca sohuinano yiyesama neijo. Baa jjonoja jeyo jaanaje. Pea sohuinano cuaa ejjajejanobiaquijji esecuejo nequiya oya jaahuana neinei'ajja canaje. ⁷Mecashono Eyacuiñajjiya esohuidojojji poquinaje Peno que. Ma equecuayijji jeaja'a cañaquinaje. Ohuaya Peno cuiapashi cañaquinaje eshequijji. Jama acanaje ba'a: —¡Peno, shequicue! ¡Nequisohua cuajicue, miya!

Jamajjeya baa jjono emejo ba'e jjapichoqui mee ca'yonaje, oquequi mee ca'yonaje meshi yasijje. ⁸Majoya esohuidojojjiya Peno jama acanaje ba'a: —¡Daqui huoshocue! ¡Ejiojji shejee huoshocue pea'ai! —jamaya Peno acanaje esohuidojojjiya. Jamaya poanaje Peno. Majoya ohuaya Peno huohui ca o'oyanaje: —¡Miquea equipajaajji bebocue! ¡E quishishijji poecue! —poanaje.

⁹Jamajjeya Peno Eyacuiñajjiya esohuidojojji quishishi poquinaje. Jamatii jjacahuibaquiiani poso Peno poanaje ba'a: —E'e de, eya jjacahuibaquiiani. E'e pojja'a esohuidojojji chama', de —Peno poanaje.

¹⁰Jamatii Penohua esohuidojojji quishishijji cuayaquijeya ebionei sohuinano epi nequi yejje canananaje. Jamatii ojaya Peno, esohuidojojji pea'ai ba jjima poanaje. Mama pishana nequi pea ba canana o'oyanaje sohuinano. Yejje canana o'oyanaje. Ba jjima poanaje Peno, esohuidojojji pea'ai sohuinanoja. Poquinaje baa cui esecue quea quemu huasijje. O poe'yajo jamatii jjaca'apejoquinaje. Esecue jjani yasijje cuayaqui'yonaje. Cuama pishana dojo majje esohuidojojjiya Peno jea cana'yonaje, ejiojji. ¹¹Majoya Peno jjashahuabaquinaje: ¿A'a mo eshe, a'a mo jjacahuibaquiiani pojjeama, de? Jjeya ecuea eba Emeshi Mese nei Jesusaa huoojea canaje ojaya esohuidojojji e dojocuayaqui'yohua. Mecahuajje Enodeya eya jaja ca'yo queaye poanaje. Jodio dejja cuaa e quecua'yojji nisho ishoa'ajja canaje pea'ai —Peno poanaje.

¹²Majoya ma shahuaba majje Peno poqui'yonaje Maniaja equi yasijje, Huani Macosoja enaeseja equi yasijje. Joma equijo quea huiso Jesusaja epeejji cuana jjachichaqui majje mimi aninaje Eyacuiñajji nijje, Peno jaahuana meejji. ¹³Penohua esecue jjani cuiaqueya cañaquinaje, epeeyijji esecue jjani. Oe epona ahuema' ani Shona bajjani poeyanaje aya esecue jjani cuiaqueya cani baa. ¹⁴Ohuaya Penoja esohui shajja'ajja canaje. Jjashahuabaquinaje: —E'e ee, Peno cuayaqui'yonaje.

Bihui majje esecue jjani pajea canananaje. Peno esecuejo tii nequi jea canananaje epona sho'iyá, de. Cuajicuajinanaje equijo ani cuana huohuiya. ¹⁵Jamatii equijo ani cuaa Shona jama saja'ame acanaje ba'a: —Chojja, Shona. ¿A'a jja mi niñepoquiiani?

—E'e jojo nei ca ca iña poani —poanaje Shona.

Jamajjeya ojjañaá jama saja'ame acanaje ba'a: —E'e pojja'a esohuidojojji Peno jaahuanajji ca ca coma poeyanaje.

¹⁶Penohua ca ca esecue cuiaqueya canequinaje, iyaa'iyaa nequinaje. Equijo nequi cuaa esecue ca'apejo'yo majje ba canaje Peno nequi. Quea bihui nee nee po'yo majje soa neinei'yonaje. ¹⁷Jamajjeya Penohua eme' sisi ecuasajo huana canaje: —¡A'a pa jjaja oe mimijji! —poanaje.

Ojjaña mimima'yo nequi ca'yonaje. Majoya Penohua oya cuana huohui canaje: —Emeshi Mese neiya Jesosaa eya ejeanobia jaa esecue yasijje jjequiquiaya meequi ca'yonaje esohuidojojjiya.

Majoya huohui canaje pea'ai Penohua: —¡Ojjaña Jesosaja epeeji cuana huohuiquicue! ¡Satiaco Apeoja bacua ejja pea'ai huohuiquicue!

Majoya Peno quehua poquicuajinaje pea meshi yasijje. ¹⁸Mecajjeahua sohuinano cuaa chama' Peno ba canaje ejjajejanobiaquijji. Ejjoco oe jaa ba canaje. Chama'. Ba majje oya cuana quea mete nee nee po'yonaje. Miminaanaa nequi'yonaje. ¹⁹Emeshi Mese Enodeya pea huojea canaje Peno jjequiya nisho ejajaje'yojji nisho. Peno chama' ba majje Enode quea mase nee nee poanaje. Sohuinano cuana ma Peno jaahuanajji cuana 'ya canaje. Huohui'ajja canaje: —¿A'a mi oe cahuijaanaje? —cahuijaa poso Enodeya acanaje.

Majoya Enodeya huojea canaje ma sohuinano cuana quecuaje'yohua. Chama'yo tii acanaje.

Majoya Enode Jodea meshijo nequi Sesanea huasijje poquinaje. Jomajo nequi tiiti'yonaje.

Enode, Jesosaja epeeji cuia'yojji epo mano'yonaje

²⁰Majoya emeshi mese Enode quea quene nee nee poanaje Tino cuiñajji ba'e cuana nijje, Sinono cuiñajji ba'e cuana nijje pea'ai. Jamajjeya oya cuana Enode nijje jjapeequi o'oya sa poanaje. Ojee poquinaje Enode baa. Ebionei Basito ba cañaquinaje, Enodeja echacojji, oja aquiana cuana jaahuanajji. Bejjo quia cajje Basito quea bihui poanaje ona nijje. Majoya pea bejjo sosejje Basito Enode nijje miminaje: —Dejja cuana Tinojo ba'e, Sinonojo ba'e pea'ai minijje jjapeequi o'oya sa poani. ¡Che oe onijje mimicue! —acanje Basitohua.

Tinojo, Sinono meshijo pea'ai chama' bobi. Jamajjeya Enodeja bobi sa poanaje quea huiso. Jamajoya Enode quea bihui po mee sa acanje onijje.

²¹Majoya Enodeya ojjaña dejja cuana iyaa canaje oja sohui shajja'ajjajji. Ojjaña nijje mimi jjimahuajo Enodeya daqui quea nahue nee huosho canaje, emeshi meseja ehuoshojji. Ojaya e'anioquejji quea quemajo anioquenaje. Majoya Enodeya ojjaña cuana quea huiso huohui canaje.

²²Ojjaña jomajo nequi oja sohui shajja'ajja majje oya bihuia canaje jama ba'a: —Emeshi mese Enode, miya Eyacuiñajji. Miya dejja jayojja jama mimime pojjeama poani —jamajoya Enode bihuia canaje ojjaña.

—E'e, jamaya —Enode poanaje, de.

²³Jamajjeya jjeyahua nei Eyacuiñajji esohuidojojjiya Enode quea mano nee nee po mee caj'e'yo pea cuana Eyacuiñajji bihuia mee jjima jojoya, jama ajjima

jojoya Enodeja ba'a: —¡Eyacuiñajjiya oe bihuiaque! ¡A'a eya bihuiajji! —po jjima jojoya oya sosohua ijia ca'yajje quea mano nee po'yonaje. Mano'yonaje Enode, de.

²⁴Majoya Jesosaja epeeji cuaa esohui quea pame nee Jesosaja huohui canaje quea huiso meshi yasijje. Quea huiso cuaa shajja'ajja canaje. Jesosa nije jjapeequinaje quea bihui nee.

²⁵Majoya Benabe, Sanoni pea'ai Jenosanena huasijje poeyanaje. Jesosaja epeeji cuana Jenosanenajo ba'e cuana bejjo quia canaje, ma Jesosaja epeeji cuana Atioquiajo ba'eya huoojea canaje. Bejjo quia'yo majje Benabe Sanoni nije huacuaya poqui o'oyanaje Atioquia huasijje. Ohuaya Huani Macoso dojo canaje onijje.

**Benabe, Sanoni pea'ai huoojea canaje pea meshi
cuana huasijje Jesosaja esohui huohuiya**

13 ¹Jesosaja epeeji cuana quea huiso nee nee poanaje Atioquiajo. Jomajo Eyacuiñajji esohui huohuijji, Eyacuiñajji esohui ba meesahuajji pea'ai yaninaje: Benabe, Sanoni, Simoni Ese Ejjaja esohuijo Deja Tehue bajjani, Nosio ma Sinene cuiñajji ba'ya poa, emeshi mese Enodeja edoe mese Manaeni pea'ai. Mahuiso. ²Oya cuana Eyacuiñajji bihuia po'aninaje. Eyacuiñajji bihuia canijo bobi ijia ajja aninaje. Jama poanijo Edojjoshahua Pameya oya cuana huohui canaje jama ba'a: —Eyaya Benabe, Sanoni pea'ai babacanaje ecuea esohui huohuijji epojji. Jamajjeya joya cuana huoojeacue ecue esohui huohuiya!

³Majoya oya cuanaa ijia'ijia ajja po majje, Eyacuiñajji nije mimi majje pea'ai eme' huana canaje Sanoni sapa biajje, Benabe sapa biajje pea'ai. Jama acanaje ba'a: —Ecuaya miquianaya huoojeaña pea meshi cuana huasijje Eyacuiñajji esohui huohuiya —acanaje.

Chipe nasijo Jesosaja esohui huohui canaje

⁴Majoya Edojjoshahua Pameya Benabe, Sanoni pea'ai huoojea canaje esohui huohuiya. Senesia huasijje poqui majje bishe ai yasijje nequisohuaquinaje Chipe nasi ai yasijje ebesapoquijji. ⁵Majoya oya cuana Sanamina cuiñajji yasijje ba'eñaquinaje Chipe nasi yasijje. Eyacuiñajji esohui huohui canananaje Jodio cuana huasijje, Jodioja equi ojee ejjachichaquijji cuanajo nequiya. Huani Macosohua oya cuana chacosahua canaje.

⁶Majoya Chipe nasi ojje miji yasijje poquinaje ejiojjije Paposa cuiñajji yasijje. Jomajo Jodio deja ba canaje Banajesosa bajjani. Oya Eyacuiñajji esohui huohuijji nisho, eyamiquecua poanaje oya. Jamajjeya Enimase bajjani acanaje cuaa. ⁷Oya emeshi mese Senio Paono nije jjapeequinaje. Emeshi mese Senio Paono quea jjashahuabaqui ja'a nee nee, quea huiso nee ojaya eba. Oya Eyacuiñajji sohui shajja'ajja sa poanaje. Jamajjeya Benabe Sanoni pea'ai iyaa canaje. ⁸Jamatii eyamiquecua jjamimicuijaja nobiajequinaje Sanoni nije, Benabe nije pea'ai. Emeshi mese Senio

Paono Eyacuiñajjija esohui shajja'ajja mee jjima canaje: —¡A'a shajja'ajjajji Paboja esohui Jesusajo! Dasia cani mi coma —eyamiquecua acanaje.

⁹Pea esohuijo Sanonija bajjani Pabo. Edojjoshahua Pame onijje nequi titiinaje. Jamajjeya Pabohua mete'ama eyamiquecua cojja ba neinei canaje. ¹⁰Jama tecueame acanaje ba'a: —Eyamiquecua, miya ca mi ca oe edosiquianaja bacua. Ojjaña quea pame nee ba'e miquea boti'ama. ¡A'a mimisho'i pojji Jesusajo miya! Ejjadasiaquijji miya de, quea mimishi. Eyacuiñajjija esohui quea quehua po mee sa ñña tii miyaya —Pabohua acanaje—. ¹¹Jamajjeya jjeyahua nei Eyacuiñajjiya miya cojjama' po mee caje'yo quea huiso cahuime —Pabohua acanaje.

Jjeyahua nei eyamiquecua cojjama' poaje'yo. Quea cojja misi nee nee. Taaanaje jama ba'a: —Cojjama' mo po mee ca'yonaje Jesusaa. ¡Emejo mo che dojocue quiaa! ¡Me pejjejeacue mo oe! —poanaje eyamiquecua.

¹²Ma ba majje emeshi mese Senio Paono quea mete poanaje. Jesusaja esohui shajja'ajja canaje. Jesosa nijje jjapeequi'yonaje, emeshi mese Senio Paono, de.

Pabohua Benabe nijjeya Atioquia huasijje Pisinia meshi yasijje esohui huohuiqui canaje

¹³Majoya Pabo ojaya epeeji cuana nijje bishe ai yasijje nequisohuaqui o'oyanaje. Panipinia meshi yasijje besapoquinaje, Pene cuiñajji yasijje. Ba'eñaqui majje Huani Macosohua Pabo, Benabe pea'ai jiña ca'yonaje. Poqui'yonaje Jenosanena huasijje oe nei.

¹⁴Majoya Pabo Benabe nijje poquinaje Atioquia huasijje, pea Atioquia Pisinia meshijo nequi. Epojja ejomishocajji Jodioja equi ojee ejjachichaquijji yasijje poquinaje. Dobiqui majje anioquenaje. ¹⁵Jodioja equi ojee ejjachichaquijji mese cuaa Moisesija esohui etehue'yo huohui canaje. Eyacuiñajjija esohui huohuijijja esohui yahuajo nei nei etehue'yo huohui canaje pea'ai. Majoya oya cuaa Pabo, Benabe pea'ai huohui'ajja canaje jama ba'a: —Epeeji cuana, e'e pojja'a miquea esohui yani ojjaña quea pame nee eba'e meesahuajji. ¡Jjeyahua nei huohuicue! —acanaje.

¹⁶Jamajjeya Pabohua nequisohua majje eme' jeasohua canaje. Jama acanaje ba'a: —Jodio cuana, Jodio pojjeama cuana pea'ai miquianaya Eyacuiñajjija esohui shajja'ajjajji poani. ¡Jamajjeya shajja'ajjacue mo! ¹⁷Yahuajo nei Eyacuiñajjiya esejaya etiiquiana babaca ca poa ojaya epeeji epojji. Majoya Ejito meshijo ba'e oya cuana jaahuana ca poa. Quea huiso, quea ca'a pea'ai po mee ca'ya poa. Oya cuana Ejito meshijo ba'e dojocuaqui ca poa pea meshi yasijje epoqui'yojji. Quea huiso ma dejjaja ba jjima aca poa. ¹⁸Meshi jabojo, dejjamajo Eyacuiñajjiya oya cuana jaahuana ca poa quea huiso shequijame, 40 shequijame. Oya cuana quea mimishi, shajjama' poa. Jamatii ojaya oya cuana cajaa ajjima poa. ¹⁹Majoya ohuaya pea emeshi mese cuana me oeje beca huisome, 7 huisome, pea emimi'yo cuana Canaani meshijo ba'e jeabichajea ca'ya poa. E'e, Eyacuiñajjiya ojjaña ma

dejja pea esohuijo mimiani cuana chama'yo tii po mee ca'ya poa quea mimishijoyo. Jiquio Canaani meshi Eyacuiñajjiya quia ca poa esejaya etiquiana cuana ba'ejji.

²⁰Canaani meshijo esejaya etiquiana cuana ba'ya poa quea huiso nee nee shequajame, 450 shequajame. Majoya Eyacuiñajjiya Jodio dejja huoojeajji pea nequi mee, pea nequi mee aca poquia poa Jodio cuana quea pame nee ba'e mee'yojji. Jamaya poanaje Eyacuiñajjiya esohui huohuijji Samoeni ba'e jjimahuajo. Majoya Samoeni mano'yajo, chama' pea Jodio dejja huoojeajji poa. ²¹Majoya esejaya etiquiana cuana emeshi mese sa poa. Eyacuiñajji nijje mimi ca poa jama ba'a: “¡Emeshi mese nequi meecue ecuanajaya!” aca poa.

—Jamajjeya aje Eyacuiñajjiya Sisija bacua ejja Sao nequi mee ca poa Jodioja emeshi mese. Saoja etiquiana Bejami' bajjani poa. Sao quea huiso shequajame nequia poa Jodio cuanaja emeshi mese, 40 shequajame. ²²Majoya emeshi mese Sao quea mimishi po majje mano'ya poa. Majoya Eyacuiñajjiya Dabi emeshi mese po mee ca'ya poa. Dabijo mimia poa jama ba'a:

“Isaija bacua Dabi ecuea eba. Oya quea pame nee nee. Ecuea ehuhui'yo jayojja jama acani. Ecuea ejjashahuabaqui'yojji jayojja jama jjashahuabaquiani pea'ai, Dabi”.

Jamaya yahuajo nei nei Dabijo mimia poa.

²³—Dabi Jesosaja etiquiana poa. Yahuajo Eyacuiñajjiya Jesosajo huohui ca poa jama ba'a:

“Eyaya ojjaña jaahuanajji Quito huoojeaje. Ohuaya Isaeni cuanaja mimishi cuijea'yo majje ba'e tiitii mee caje'yo eyajo onijje”.

Jamaya huohuime aca poa Eyacuiñajjiya Jesosajo.

²⁴—Jesosa poe jjimahuajo Huaniya ma ona besameejji poaniya ojjaña cuana huohui canaje jama ba'a: “¡Miquea mimishi cuana pajea'yocue! ¡Eyacuiñajjiyo oe besacue, enajo!” jamaya Huaniya ojjaña Jodio cuana huohui canaje. ²⁵E'e, Huanija echaco Eyacuiñajjiyo beshahua nei apoa po majje ohuaya huohui canaje jama ba'a: “¿Achajja miya jjashahuabaquiani? ¿Ae acuae jja iña? Eya ca jja ca iña Eyacuiñajjiya huoojea'yo ojjaña jaahuanajji Quito pojjeama. Oya quijje pishana poeje. Oya ca ca oe quea ca'a nee nee, quea pame nee nee. Eya ca iña quea pame pishana. Jamajjeya aje oe eya Jesosa Quito cojja nei nequi sa po ajja, quea bicho, de” acanaje Huaniya.

²⁶—Ecuea epeejji cuana, etiquiana Amajamaja osecua cuana, ¡shajja'ajjacue mo! ¡Eyacuiñajjiya epeejji cuana Jodio pojjeama cuana, shajja'ajjacue mo pea'ai! Eyacuiñajjiya jiquio esohui huohui canaje esejaya eshajja'ajjajji jama ba'a: Eyacuiñajjiya Jesosa huoojea canaje ese jaahuanaa, eseja mimishi cuijea'yohua pea'ai. ²⁷Jamatii dejja cuana Jenosanenajo ba'eja, Jodio etii cuanaja pea'ai ba jjima Jesosa Eyacuiñajjiya huoojea'yo ojjaña jaahuanajji. Oya cuanaa Eyacuiñajjiya esohui huohuijjiya esohui shajja'ajja canaje ojjaña ejomishocajji pojajajo; ma esohui Jodio cuanaja quea quehua. Jamatii Jesosa quecua ca'yonaje; ma esohui yahuajo nei nei etehue'yo jayojja jama acanaje Jodio cuaa. ²⁸Jesosa mimishi'ama nei nei ba canaje Jodio cuaa. Jamajjeya ¿yajajajo shai quecua mee

ca'yonaje oya? Jamatii oya cuaa emeshi mese Pinato jama acanaje ba'a: “¡Jesosa acui ecueata'apeejo ba'ehuanasohuajeacue emano'yoyji!” taaa neineime ponaje.

²⁹—Ojjaña Eyacuiñajjiya esohui yahuajo nei nei etehue'yo jayojja jama aca poa Jesosa, Jodio etii cuaa. Majoya Jesosa acui ecueata'apeejo ba'e jjequioquea'yo majje ojaya epeeji cuaa oya mei jjani ai yasijje huananobiaqui canaje. ³⁰Jamatii Eyacuiñajjiya oya shequi mee ca o'oyanaje. ³¹Mano'yo jjimahua Jesosa Janinea meshijo nequi Jenosanena huasijje poquinaje oja epeeji cuana nijje. Quijje shequi o'oya majje Jesosa oja epeeji cuana nijje japeequi o'oyanaje quea huiso cahuime. Ojaya epeeji cuana jjeyahua nei Jesusajo mimiani. Ojjaña Jodio cuana huohui cani jama ba'a: “Jesosa shequi o'oyanaje” acani. ³²Jjeyahua nei ecuaana Eyacuiñajjiya esohui quea pame nee miquiana huasijje huohuije jama ba'a: ³³Esejaya etiiquiana nijje Eyacuiñajji yahuajo nei mimia poa. Esey ma etiiquianaja osecuaya. Jamajjeya Eyacuiñajjiya esohui esejaya etiiquiana huasijje jayojja jama jjeyahua nei ohuaya acani esejo. Ojaya esohui jayojja jama ohuaya Jesosa shequi mee ca o'oyanaje. Yahuajo nei nei Dabiya Eyacuiñajjiya esohui Jesusajo tehue ca poa jama ba'a: “Miya ecue Bacua Ejja. Maya eyaya ojjaña ba mee aña” jamaya yahuajo nei nei Dabiya Eyacuiñajjiya esohui Jesusajo tehue ca poa esohuicuayajjiyo, Salmojo —Pabohua acanaje.

³⁴—Eyacuiñajjiya Jesosa shequi mee ca o'oyanaje emano beca'yoyji pojjeama, e'ihui'yoyji pojjeama. Eyacuiñajjiya yahuajo nei jama aca poa Jesosa ba'a:

“Ecuea esohui quea pame nee Dabi nijje jayojja jama eyaya miya aje'yo. E'e, eyaya miya quea pame nee nee aje'yo”.

³⁵Pea esohui cuayajjiyo Dabiya tehue ca poa jama ba'a:

“Miyaya eya, mique Bacua Ejja oe nei quea pame nee jaahuanaña, eya e'ihui'yoyji pojjeama tii tii poaje'yo”.

Jamaya yahuajo nei Eyacuiñajjiya tehue mee ca poa Jesusajo.

³⁶—Yahuajo Eyacuiñajjiya esejaya etiiquiana Dabi emeshi mese po mee ca poa. Jamatii deja tii majje Dabi mano'ya poa. Oya etiiquiana nijje emano'yo jaa. Oya ihui'ya poa pea'ai. ³⁷Jesosa Quito ca ca ihui'yo jjima poanaje. Eyacuiñajjiya oya emano'yo jaa shequi mee ca o'oyanaje. ³⁸Ecuea epeeji cuana, eyaya miquianaya huohuiaña Jesusajo. Oya Jesosa eshe o'oya. Jamajjeya ohuaya mimishi cuana pajea meesahua caje'yo miquianajaya. Mimishi cuijea caje'yo pea'ai. ³⁹Moisesija etehue'yo jayojja jama añaño pojjeama mimishi cuana cuijea ca'yani Eyacuiñajjiya. Jesosa eshe o'oya, de. Onijje japeequianijo ca ca oe ohuaya miquianaya mimishi cuana cuijea ca'yani. Majoya Eyacuiñajjiya miquianaya ba cani emimishi cuijea'yo. ⁴⁰¡Jamajjeya Eyacuiñajjiya esohui ba neineicue! miya ojaya etecuea'yoyji pojjeama. E'e, yahuajo nei Eyacuiñajjiya esohui tehue mee ca poa jama ba'a:

⁴¹“¡Shajja'ajjacue mo! Eya miquianaaya niñebaña. ¡Quea mete pocue! Eyaya miya chama'yo tii po meeje'yo. Eyaya ma dejja ajjima acani aje'yo miquianajaya ebajji. Jamatii ba majje miquianaya jjashahuabaqui ajja. Onaa huohui cajo, miquianajaya shajja'ajja jjima poaje”.

Jamaya yahuajo nei Eyacuiñajji poa —jamaya Pabohua esohui huohui canaje Atioquiajo, Jodioja equi ojee ejjachichaquijji.

⁴²Majoya esohui huohui majje Pabo, Benabe nijje esecue yasijje cuayaquinaje. Majoya beca cuana onijje miminaje jama ba'a: —Pabo, miquea esohui ecuana shajja'ajja sa o'oya poani. ¡Pea ejomishocajji pojajajo poe o'oyacue miquianaya!

⁴³Jodioja equi ojee ejjachichaquijji nequi esecue yasijje cuayaqui majje quea huiso Jodio cuana, Jodio pojjeama cuana ma Jodioja esohui jayojja jama Eyacuiñajji bihuia cani pea'ai Pabo nijje jjapeequinaje, Benabe nijje pea'ai. Jamajjeya Pabo, Benabe pea'ai ona nijje jama poanaje ba'a: —¡Jesosa nijje jjapee neineiquicue! ¡Eyacuiñajji esohui a'a pajea'yojji pea'ai! Ohuaya miya jaahuana tiitii cani.

⁴⁴Majoya pea epojja ejomishocajji beshahua nei ojjaña cuana ma cuiñajji ba'eca jjachichaquinaje Eyacuiñajji esohui shajja'ajjaa, Emeshi Mese neija esohui. ⁴⁵E'e, quea huiso nee nee poeyanaje Pabojja esohui shajja'ajjaa. Ma ba majje Jodio etii cuana quea quene poanaje. Jamajjeya Pabohua esohui huohui canijo mimicuijeanobiajea canaje cuaa Pabo. Oya cuana Jesosajo mimisho'i poanaje pea'ai. ⁴⁶Jamajjeya Pabohua, Benabeya pea'ai mete'ama Jodio etii cuana tecuea canaje jama ba'a: —¡Bacue! Eyacuiñajjiya ecuana huoojea canaje Jodio cuana huasijje ebionei Jesosaja esohui huohui coohua, eba'e tiitii mee'yojji onijje. Miquianaya ca ca oe jjashajja'ajjaqui sa po ajja. Shajja'ajja sa po'yo ajjajo cuaqui yasijje poquije'yo, eyahuasijje eba'e tiitii'yojji pojjeama, miquianaya. Jamajjeya ecuana poquije Jodio pojjeama cuana sohuihuohuiya. ⁴⁷E'e, Emeshi Mese neiya, Eyacuiñajjiya ecuana huohui canaje jama ba'a:

“Eyaya miya huoojeaje Jodio pojjeama cuana huasijje. ¡Ecuea esohui quea ja'a nee ba meecue! ¡Ojjaña cuana ojjaña meshijo ba'eca cuana enijje jjapeequi meesahuacue! Eyaya ojjañaja mimishi cuana cuijeaje'yo, enijje eyajo eba'e'yojji”.

Jamaya yahuajo Eyacuiñajji ecuana nijje poanaje —Pabohua acanaje.

⁴⁸Pabojja esohui shajja'ajja majje Jodio pojjeama cuana quea bihui nee nee poanaje. Oya cuaa Eyacuiñajji bihuia canaje ojaya esohui quea pame nee Jesosajo ba mee canajejojo. Ojjaña joya Eyacuiñajjiya babaca canaje onijje eba'e tiitii'yojji Jesosa nijje jjapeequi'yonaje, coya oja babaca'yo huiso tiya.

⁴⁹Majoya ojjaña Atioquia chipi neijo ba'eya Jesosaja esohui shajja'ajja canaje. ⁵⁰Jamatii Jodio etii cuaa epona cuana quea quene po mee canaje Pabo nijje. Ma epona cuanaja yahuajo nei Eyacuiñajji quea jea nee poanaje. Oya cuana Jodio etii cuanaja Atioquiajo ba'e cuanaja ehuanase cuana poanaje. Jodio etii cuaa jama acanaje ba'a: —¡A'a shajja'ajjajji Jesosaja esohui!

Jodio etii cuaa ojjaña quea quene nee nee po mee ca'yonaje Pabo nijje, Benabe nijje pea'ai. Iña majje oya cuaa Pabo Benabe pea'ai huoojea ca'yonaje. ⁵¹Majoya Pabohua Benabeya pea'ai ma shajjama' cuana tecueajea majje jiñajea ca'yonaje. Ojjaña ma cuiñajji ba'e ba mee canaje

o ya cuana shajjama' poanaje, quea mimishi. Majoya Pabo Benabe nijje poquinaje ejiojjijje pea cuiñajji yasijje, Iconio huasijje.

⁵² Edojjoshahua Pame o que dobiq'iyajo, ojjaña Jesosaja epeeji Atioquiajo ba'eca cuana quea bihui nee nee poanaje.

Iconio huasijje esohui huohui canaje Pabohua, Benabeya pea'ai

14 ¹ Majoya Pabo, Benabe nijje Iconio huasijje ba'eñaquinaje. Atioquiajo acanaje jayojja jama aca o'oyanaje Iconiojo pea'ai. E'e, Jodioja equi ojee ejjachichaquijji yasijje dobiquinaje. Eyacuiñajjija esohui quea pame nee Jesosajo huohui canaje quea ja'a nee. Jamajjeya quea huiso Jodio cuana, Jodio pojjeama pea'ai Jesosa nijje jjapeequinaje. ² Jamatii beca Jodio cuana shajja'ajja sa po'yo ajja poanaje. Maaya Jodio pojjeama cuana jama acanaje ba'a: —¡A'a jjapeequijji Jesosaja epeeji cuana nijje! ¡A'a Jesosaja esohui shajja'ajjajji! —jama niñebameya acanaje Pabo cuaa.

Jamajjeya quea huiso cuana Jesosaja epeeji cuana nijje jjapeequi'yo ajja poanaje. ³ Jamatii Pabo, Benabe nijje quea cahui huiso Iconiojo nequinaje. Mete'amaa Jesosajo huohui majamaja canaje, Emeshi Mese neijo jama ba'a: —Emeshi Mese neiya Jesosaa eseya quea jea nee acani, eseya jaahuana cani pea'ai —poanaje.

Jesosaa Pabo, Benabe pea'ai ma dejjaa ajjima acani ameesahua canaje. Ma ba majjeya ojjaña ba canaje Pabojja esohui Jesosajo e'e nei, Benabeja pea'ai. ⁴ Jamajjeya Iconiojo quea huiso cuana shajja'ajja sa poanaje Jesosaja huoojea'yo cuanaja esohui. Pea cuana ca ca Jodioja esohui jayojja jama a sa poanaje. Shajja'ajja sa po'yo ajja poanaje Jesosaja esohui.

⁵ Majoya beca Jodio pojjeama Jodio cuana nijje, ojaya emeshi mese cuana nijje jjachichaqui majje mimimiminaje. Jama poanaje ba'a: —¡Cua'a! ¡Pabo, Benabe pea'ai ejjacuijjeaquiqui, ejjasapa jajahuejjajaequiqui oe meiya! —poanaje.

⁶⁻⁷ Jamatii Pabohua, Benabeya pea'ai maya shajja'ajja canaje. Shajja'ajja majje quehua poquinaje Nicaonia meshi yasijje. Debe cuiñajji yasijje, Nisata cuiñajji yasijje pea'ai esohui quea pame nee Jesosajo huohui capoquinaje ba'e chejje cuana huasijje, cuiñajji sisi cuana huasijje pea'ai.

Nisatajo Pabo iña canaje cuaa

⁸ Nisata cuiñajjijo dejja jiojjijjajja ba'e'yonaje, jeo ajja. Oya jamatii cuaya, jiojjijjajja tii. ⁹ Pabohua esohui huohui canijo, jiojjijjajja shajja'ajja neinei ca'aninaje. Majoya Pabohua jiojjijjajja ba neinei canaje. Jjashahuabaquinaje jama ba'a: —Jiojjijjajja Jesosajo quea pame jjashahuabaquiani jama ba'a: “Jesosaa eya jeo mee caje'yo”. Jamajjeya eyaya oya jjajiojji jeapiihuiqui meeje'yo —Pabo poanaje.

¹⁰ Jamajjeya Pabohua oya jama acanaje ba'a: —Jiojjijjajja, ¡nequisohuacue! ¡Jeocue! —acanaje.

Jiojjijajja nequisohua cuajinaje. Jejeonaje. E'e, jiojjijajja jjajiojji jeapiihuiquinaje. ¹¹Ma ba majjeya quea huiso cuaa Pabo bihuia canaje. Onajaya emimijo, Nicaoniaja esohuijo jama poanaje ba'a: —E'e de. ¡Bacue Pabo, Benabe pea'ai! Eyacuiñajji cuana ecuana que jaoque'yonaje dejja jayojja, de —acanaje. Pabo, Benabe pea'ai eyacuiñajji poso acanaje cuaa.

¹²Jamajjeya Benabe eyacuiñajji nisho bajjani acanaje Jopite bajjani. Pabo mimi huicha'a huicha'anijo, oya pea eyacuiñajji nisho bajjani acanaje Meconio bajjani. ¹³Epana'yo huohuijji, epana'yo jaahuanajji ma epana'yo Jopite nequijji equijo nequinaje Nisata pejeje. Ohuaya ana'ai yahue cuana, eshasha quea huiso cuana pea'ai jjequi canaje cuiñajji esecue yasijje, Pabo que. Ohuaya pea cuana nijjeya ana'ai cuana, eshasha cuana pea'ai dahuajea sa acanaje Pabo bihuiajji, Benabe pea'ai bihuiajji; eyacuiñajji poso bihuia sa acanaje.

¹⁴Benabe, Pabo pea'ai ma ba majje quea mete poanaje. Poquicuajinaje dejja cuana jjachichaquiani yasijje. ¹⁵Jama taaame poanaje ba'a: —¿Apiojji acuaeya miquianaaya jama ña so'o? Ecuana aje dejja cuana miquiana jayojjaya. ¡A'a ecuana bihuiajji! Ecuana esohui quea pame Jesosajo huohuiaña. Jamajjeya ¡a'a eyacuiñajji nisho cuana bihuia majajji! ¡Pajea'yocue! Eyacuiñajji oe nei e'e jojo nei eshe tii nequi. ¡Oya oe nei bihuiaque! Ohuaya eyatahuatahua pana ca'ya poa. Meshi cuana, bae cuana pea'ai pana ca'ya poa. Ojjaña aquiana meshijo, eyajo, enajo pea'ai pana ca'ya poa ohuaya, Eyacuiñajjiya. ¹⁶Yahuajo nei nei ojjaña cuaa ojjaña meshijo ba'eya quea mimishi nee aca poa. Jamatii Eyacuiñajjiya oya cuana mimishi cuana pajea mee'yo jjima poa. ¹⁷Jamatii Eyacuiñajjiya yahuajo ojjaña cuana quea pame aca poa. Ojjaña ba mee ca poa oya eshe nequi. Jjeya ohuaya miquianaya quea pame nee acani pea'ai. Nayaja po mee ca'yani, eshequiaja po mee ca'yani, bobi tii mee ca'yani pea'ai. Jamaya ohuaya miquianaya quea bihui nee ba'e meesahua cani pea'ai —Pabohua acanaje.

¹⁸Jamaya Pabohua, Benabeya pea'ai huohui canaje. Jamatii ma dejja cuaa beshahua nei oya bihuia canaje. Ana'ai beshahua nei dahuajea canaje o bihuiajji. Dahuajea jjima; beshahua nei, de.

¹⁹Majoya Jodio cuana Atioquiajo ba'e, Iconiojo ba'e pea'ai poeyanaje Nisata huasijje. Oya cuaa Nisata dejja cuana sijje acanaje Pabojjo. Sijje acajje quea quene nee nee poanaje Pabo nijje. Majoya oya cuaa Pabo ña canaje; sapa jaja canaje meiya, dojocuayaqui canaje cuiñajji esecue yasijje. Pabo emano'yo poso jeajea canaje cuaa jomajo tii. ²⁰Jamatii quijje pishana Jesosaja epeeji cuana poeyanaje Pabo baa. Ojjaña o que jjachichaquiajo, Pabo shequi'yonaje. Shequi'yo majje huacuaya Nisata huasijje poe o'oyanaje. Majoya mecajjehua nei oya Benabe nijje poquinaje pea cuiñajji yasijje, Debe yasijje.

Pabo, Benabe nijje huacuaya poqui o'oyanaje, Atioquia huasijje

²¹Debe yasijje poqui majje Pabohua, Benabeya pea'ai Eyacuiñajjija esohui quea pame nee Jesosajo huohui cañaquinaje. Quea huiso cuaa shajja'ajja canaje. Jesosa nijje jjapeequinaje. Majoya, Pabo Benabe nijje huacuaya poqui o'oyanaje Nisata huasijje. Iconio huasijje pea'ai poqui o'oyanaje. Majoya Pisinia meshi yasijje Atioquia huasijje poqui o'oyanaje ojjaña Jesosaja epeeji eyacua cuana baa. ²²E'e, Pabohua, Benabeya pea'ai Jesosaja epeeji cuana ma cuiñajji cuanajo ba'eca cuana esohui huohui ca o'oyanaje jama ba'a: —¡Jesosa nijje jjapee neineiquicue! ¡A'a oya pajea'yojji! Eyajo Eyacuiñajji ojjaña huoojeajji poani. Eseyá onijje ba'e tiitii sa poanijo, onaaya, mimishi cuaa eseyá napa caje quea huiso. Quea camaja esejo poaje. Quea nee poaje pea'ai —Pabohua acanaje.

²³Majoya Pabohua, Benabeya pea'ai ma cuiñajji cuanajo Jesosaja epeeji quea pame babaca canaje Jesosaja epeeji cuana jaahuanajji epojji. Majoya ijji'a'ijjia jjima nequi Eyacuiñajji nijje mimi majamajanaje Jesosaja epeeji jaahuanajji cuanajo jama ba'a: —Emeshi Mese nei Jesosa, miya quea pame nee nee. Jiquio dejja cuana miquea epeeji nei cuana ecuaanaaya babacanaje miquea epeeji cuana jaahuanajji epojji. Jamajjeya ¡oya cuana miquea epeeji cuana jaahuana meesahuacue quea pame nee! —poanaje.

²⁴Jamajjeya Pabohua, Benabeya pea'ai Pisinia meshijo esohui huohuinana o'oya majje Panipinia meshi yasijje poqui o'oyanaje. ²⁵Majoya Eyacuiñajjija esohui quea pame nee Jesosajo huohui canana o'oyanaje Pene cuiñajji yasijje. Majoya oya cuana poquinaje Atania cuiñajji yasijje. ²⁶Jomajo Ataniajo bishe ai yasijje nequisohuaquinaje. Besapoqui o'oyanaje Atioquia huasijje. Jomajo yahuaajo pishana Jesosaja epeeji cuana Eyacuiñajji nijje mimi majje oya cuana huoojea canaje esohui huohuiya. Eyacuiñajji nijje miminaje pea'ai o jaahuanajji, esohui quea pame Jesosajo huohui canijo.

²⁷Jamajjeya Atioquia huasijje poe'yo majje Pabohua, Benabeya pea'ai ojjaña Jesosaja epeeji cuana iyaa canaje. Jjachichaqui'yajo Pabohua, Benabeya pea'ai quio o poquinaje huohui canaje. Majoya jama acanaje ba'a: —Ojaya esohui quea pame nee Jesosajo huohuinanañajo, Eyacuiñajjiya ecuaana quea pame nee acanaje. Eyacuiñajjiya quea huiso Jodio pojjeama cuana oja sohui ba meesahua canaje pea'ai —jamaya acanaje Pabohua, Benabeya pea'ai.

²⁸Oya cuana Atioquiajo nequi'yonaje Jesosaja epeeji cuana nijje quea huiso cahuime.

Jesosaja epeeji cuana ojee miminaje Jenosanenajo

15 ¹Majoya beca dejja cuana poeyanaje Atioquia huasijje. Oya cuana Jodio dejja, Jodea meshijo ba'e. Jamajjeya poe majje ohuaya Jesosa Quitoja epeeji cuana jama sohuihuohuime acanaje ba'a: —¡Etiquiana Moisesija

esohui etehue'yo jayojja jama acue! ¡Cuiishasha biso nei jehuissejjajeacue!

Jamaya ajjimajo Eyacuiñajjija miya emimishi cuijea'yojji pojjeama —acanjé.

²Shajja'ajja majje Pabo, Benabe pea'ai jjamimicuijea nobiajeaquinaje janobajjima nei, ma Jodio dejja cuana nijje quea huiso miminaje pea'ai.

Majoya Jesusaja epeeji cuaa jama acanjé ba'a: —Benabe, Pabo, pea Jesusaja epeeji cuana nijje capoquiahua Jenosanena huasijje. Jomajo Jesusaja huoojea'yo cuana nijje, Jesusaja epeeji etii cuana nijje pea'ai camimiahua Moisesija etehue'yojo, Jesusaja esohuijo pea'ai —poanjé.

³Majoya Jesusaja epeeji cuaa Atioquiajo ba'eya oya cuana huoojea canaje. Jenosanena huasijje poquijeya oya cuana Penisia meshijo, Samania meshijo pea'ai cuiñajji cuana yejje ca poquipoquinaje. Jesusaja epeeji cuana sohuihuohui capoquinaje jama ba'a: —Jodio pojjeama quea huiso cuana Jesosa nijje jjapeequiani —poanjé.

Ma esohui shajja'ajja majje ojjaña Jesusaja epeeji cuana quea bihui nee nee poanjé.

⁴Majoya oya cuana Jenosanena huasijje poe'yonaje. Jomajo ojjaña Jesusaja huoojea'yo cuana, Jesusaja epeeji etii cuana pea'ai quea bihui nee miminaje Pabo nijje, Benabe nijje pea'ai. Majoya Pabohua, Benabeya pea'ai huohui canaje ojjaña Eyacuiñajjiya oya cuana ameesahua canaje Jodio pojjeama cuanajo, pea meshi cuana huasijje.

⁵Jamatii beca Paniseo cuana ma Moisesija etehue'yo jaahuanajji poani nequisohua majje jama poanjé ba'a: —Chojja. ¡Jodio pojjeama cuana Jesosa nijje jjapeequi majje cuiishasha biso nei cajehuissejjaje cahua! Ojjaña Moisesija etehue'yo cuana jayojja jama ca'a cahua pea'ai —poanjé Paniseo cuana, Jesusaja epeeji cuana.

⁶Jamajjeya Jesusaja huoojea'yo, Jesusaja epeeji etii cuana pea'ai jjachichaquinaje Paniseoja esohuijo mimiya. ⁷Ma esohuijo quea huiso mimimiminaje. Ojjaña cuana mimi'yajo, Penohua nequisohua majje ojjaña jama acanjé ba'a: —Epeeji cuana, yahuajo Eyacuiñajjiya eya huoojea canaje esohui quea pame nee Jesusajo huohuiya Jodio pojjeama cuana huasijje. Shajja'ajja cajo, Eyacuiñajjiya oya cuana Jesosa nijje jjapeequi meesahua canaje. Edojjoshahua Pame huoojea canaje ona huasijje dobiquiya. Jamaya miqianajaya eba.

⁸Eyacuiñajjija eba ojjaña ejjashahuabaquijji. Ohuaya Jodio pojjeama cuana quea pame nee acanjé. E'e, yahuajo Eyacuiñajjiya eseya, Jodio cuana, quea pame aca poa jayojja jama jjeya ohuaya oya cuana acanjé pea'ai. E'e, Jodio pojjeama cuana quea pea'ai ohuaya Edojjoshahua Pame huoojea canaje ona huasijje dobiquiya. ⁹E'e, Eyacuiñajji jjashahuabaquinaje jama ba'a: “Jodio pojjeama cuana Jodio cuana jayojjaya” poanjé. Jamajjeya Jesosa nijje jjapeequianijo, ohuaya Jodio pojjeama cuanaja mimishi cuana cuijea ca'yonaje pea'ai. ¹⁰¿Yajjajo acuae mi Eyacuiñajji jayojja jjashahuabaquime mi poani so'o? Miquianaaya jama aña ba'a: “Jesusaja epeeji cuaa Moisesija etehue'yo jayojja jama ca'a cahua”. Chojja, quea camaja ca coma, de. Eseyaya etiiquiana cuanaja, eseyaya pea'ai Moisesija

esohui etehue'yo cuana jayojja jama a'yo jjiima poanaje. Quea camaja. ¹¹ ¡Chojja! Eseyaya ca ca Jesosaja esohui jayojja jama aña. Jamajjeya Emeshi Mese neiya Jesosaa eseya quea jea nee acani. Onijje jjapeequianijo, esejaya mimishi cuana cuijea'yo majje onijje ba'e tiiti mee caje'yo eyajo. Oya jayojjaya ohuaya acani Jodio pojjeama cuanajo, Jesosa nijje jjapeequianijo pea'ai —Penohua acanaje.

¹²Penó mimi'yajo ojjaña cuana mimi'yo ajja poanaje. Shajja'ajja canaje. Majoya Pabohua, Benabeya pea'ai huohui canaje jama ba'a: —Jodio pojjeama huasijje ojaya esohui huohuiqui'yajo, Eyacuiñajjiya ecuana ma dejja ajjima acani amesahua canaje quea huiso —acanaje. Majoya Pabohua, Benabeya pea'ai huohui canaje quea huiso.

¹³Majoya Pabo, Benabe pea'ai mimi pajea'yajo Satiaco jama poanaje ba'a: —Epeejji cuana, ¡shajja'ajjacue mo! ¹⁴Penohua jjeyahua nei eseya huohui canaje Eyacuiñajjiya Jodio pojjeama cuana quea jea nee acanaje pea'ai. Jamajjeya oya cuana Jesosa nijje jjapeequi meesahua ca'yonaje. Jamaya poanaje Penó. ¹⁵E'e, jamaya Eyacuiñajjiya esohui huohuijiya yahuajo nei nei huohui ca poa pea'ai. Jama tehueme aca poa ba'a:

¹⁶“Quijje eyaya Dabija osecua Emeshi Mese nei po meeje'yo. Equi e bihuiajji epajea'yo poa. Poe majje eyaya oya cuana bihuia meesahuaje o'oya. ¹⁷Jamajjeya pea cuana, Jodio pojjeama cuana, ojjaña meshijo ba'eca enijje jjapeequi sa poaje. Eya ojjañaja Emeshi Mese nei quea pame nee poaje'yo. ¹⁸Jamaya Emeshi Mese nei quea pame neeya huohui ca poa yahuajo nei. Ma esohui yahuajo ohuaya pea cuana ba meesahua ca poa”.

Jamaya yahuajo nei Eyacuiñajjiya esohui poa.

¹⁹—Jamajjeya eya jjashahuabaquiani jama ba'a: Jodio pojjeama cuana Jesosa nijje jjapeequianijo ¡a'a Moisesija etehue'yo jayojja jama ameejji! Chojja, maya quea camaja nee nee. ²⁰Jamajjeya Jodio pojjeama cuana huasijje esohui tehucue jama ba'a: “Jesosaja epeejji cuana, ¡noe eyacuiñajji nisho bihuiajji onaja dahua a'a ijjiyajji! ¡A'a pea cojjojji pojji pea'ai! ¡Noe na' cuaya meequi jjiima a'a ijjiyajji! ¡Ijjiacajji na' a'a ishijji! Jamaya miquiaa ajo Jodio cuana miquiana nijje quea quene nee nee poaje”. ¡Jamaya tehucue Jesosaja epeejji eyacuaja ebajji! —Satiacohua acanaje—. ²¹E'e ojjaña cuiñajjiyo Jodio dejja cuanaja esohui huohuiji cuaa Moisesija etehue'yo huohui cani Jodioja equi ejjachichaquijjiyo. Yahuajo nei huohui ca poa. Jjeya nei huohui cani pea'ai ojjaña epojja ejomishocajjiyo. Jamajjeya ¡a'a Moisesija etehue'yo jayojja jama ameejji! —acanaje Satiacohua.

**Jesosaja epeejji etii cuaa esohui tehue canaje Jodio pojjeama
cuanaja ebajji, Jesosaja epeejji eyacua cuanaja**

²²Majoya Jesosaja huoojea'yo cuaa, esohui huohuiji cuaa, Jesosaja epeejji etii cuaa, ojjaña Jesosaja epeejji cuana jomajo nequiya pea'ai Pabo nijje, Benabe nijje huoojea sa acanaje becanejjijji pea'ai epeejji cuana Atioquia huasijje.

Jamajjeya huoojea canaje Basabaja bacua ejja Joda. Onijje huoojea canaje pea dejja Sinasi bajjani. Oya cuana Jesosaja epeeji cuanaja huoojea'yo poanaje, quea pame nee nee. ²³Sinasi nijje, Joda nijje pea'ai esohui etehue'yo huoojea canaje Jesosaja epeeji cuanaja ebajji. Ma esohui etehue'yo jama poanaje ba'a:

“Epeeji cuana Atioquiajo ba'e, Sinia meshijo ba'e, Sinisia meshijo ba'e pea'ai, ecuaaya, Jesosaja huoojea'yo cuaa esohui huohuijjiya, Jesosaja epeeji etii cuaa pea'ai jiquio esohui etehue'yo huoojeaña miquiana huasijje, Jesosaja epeeji cuana Jodio pojjeama cuana huasijje. E'e, ecuaaya quea bihui nee tehuenaje miquiana huasijje. ²⁴¿Chajja a quiana ani, ecuanaja epeeji cuana? ¡Bacue! Miquiana huasijje beca dejja jiquiojo nequi tii cuaa Moisesija esohui huohui canaje. Moisesija esohui jayojja jama miquianaya ba'e meeme ajja. Quea camaja, de. Jamajjeya miquianaya quea yeno poanaje. Ecuana ma dejja cuana huoojea jjima miquiana que esohui huohuiya. ¡A'a shajja'ajjajji cuana! ²⁵Miquianaya quea yeno poanaje. Jamajjeya ecuaa jiquiojo tii quea huiso nee ojee jhashahuabaqui majje jama poanaje ba'a: Ecuaya miquiana que pea dejja cuana huoojeaña Benabe nijje, Pabo nijje pea'ai. E'e, Pabo, Benabe pea'ai ecuanaja epeeji cuana.

²⁶Oya cuana Emeshi Mese nei Jesosa Quitojo chacoconaje mete'ama. Onaaya oya cuana beshahua nei jajahuejjaje ca'yonaje, Jesosa nijje jjapeequianijojo. ²⁷Jamajjeya ecuaaya dejja quea pame becamejijji pea'ai huoojeaña miquiana que, Joda, Sinasi pea'ai. Oya cuaa ecuanaja etehue'yo huohui caje'yo miquianaja eshajja'ajjajji. ²⁸E'e, Edojjoshahua Pameya ecuaa jhashahuabaqui mee cani jama ba'a: Ecuaya miquianaya huohui ajja Moisesija esohui etehue'yo jayojja jama yajji. Chojja, jamaya miquianaaya ameeme ajja. Quea camaja. Jiquio jama acue miquianaaya ba'a: ²⁹¡Noe ma eyacuiñajji nisho bihuiajji onaja dahua a'a ijjiajji! ¡A'a pea cojjojji pojji! ¡Noe na' cuaya meequi jjima a'a ijjiajji! ¡Ijjiacajji na' a'a ishijji pea'ai! Jamaya miquiaa ajo Jodio cuana miquiana nijje quea quene nee nee poaje. Mahuiso ecuanaja esohui etehue'yo miquiana que. Jamajjeya jamaya añajo miquianaya quea pame nee ba'eje. Apoa.”

Jamaya Jesosaja huoojea'yo esohui huohuijji cuaa, Jesosaja epeeji etii cuaa pea'ai tehue canaje Jesosaja epeeji eyacua cuanaja ebajji.

³⁰Jamajjeya Pabo, Benabe nijje, becamejijji pea'ai dejja nijje poqui o'oyanaje Atioquia huasijje. Jomajo nequiñajji majje ojjaña Jesosaja epeeji iyaa canaje. Ojee jjachichaqui'yajo, etehue'yo ba mee canaje. ³¹Ma esohui etehue'yo ba majje ojjaña Jesosaja epeeji eyacua cuana quea bihui nee nee poanaje.

³²Joda, Sinasi pea'ai Jesosaja esohui huohuijji poanaje. Jamajjeya oya cuaa Jesosaja epeeji cuana sohuihuohui canaje quea huiso nee. Quea huiso Jesosa nijje jjapeequi meesahua canaje quea ja'a nee. ³³Quea cahui huiso Atioquiajo esohui huohui canaje. Majoya Jesosaja epeeji cuaa Atioquiajo ba'eya oya cuana huoojea ca'yonaje Jenosanena huasijje, Jesosaja huoojea'yo esohui huohuijji

cuana huasijje. Quea bei nee poqui'yonaje. ³⁴Sinasi ca ca nequinaje Atioquiajo tii. Poqui sa po'yo ajja poanaje. ³⁵Pabo, Benabe pea'ai Atioquiajo nequinaje. Quea huiso pea cuana nijjeya Emeshi Mese nei Jesosaja esohui huohui tiitii canaje. Ojjaña Jesosaja epeeji eyacua cuana esohui ba neinei meesahua canaje.

Pabo Benabe nijje poqui pajea'yonaje

³⁶Majoya Pabo Benabe nijje jama poanaje ba'a: —Cua'a, Jesosaja epeeji cuana ojjaña cuiñajji yasijje ejjabaquiqui o'oya, ma yahuajo eseya Jesosaja esohui huohuiquinaje yasijje. E'e pojja'a esejaya esohui pajea ca'yonaje. E'e pojja'a pajea'yo jjima; ba'ajja —poanaje Pabo.

³⁷—E'e —poanaje Benabe—. Jamaya quea pame. Huani Macoso ese nijje ejjadojoqui pea'ai, ma yahuajo ese nijje poqui'ajjanaje.

³⁸—Chojja —acanaje Pabohua—. Yahuajo Panipinia meshijo Huani Macosohua eseya jiña ca'yonaje. Chacochaco jjima ese nijje. Huacuaya poqui'yonaje Jenosanena huasijje. Eya o dojo sa po'yo ajja.

³⁹Jamajjeya Pabo, Benabe nijje jjamimicuijaja nobiajeaquinaje. Ojee poqui pajeanaje. Majoya Benabe besapoquinaje Chipe nasi ai yasijje. Huani Macoso dojo canaje onijje echacojji. ⁴⁰Pabohua ca ca Sinasi babaca canaje onijje epoquijji Jesosaja esohui huohuisahuajji. Jamajjeya Jesosaja epeeji cuana ojee Eyacuiñajji nijje miminaje Pabobo, Sinasijo pea'ai jama ba'a: —Eyacuiñajji, ¡Pabo, Sinasi pea'ai poqui meesahuacue miquea esohui huohuiya! ¡Oya cuana jaahuanacue! —poanaje.

⁴¹Majoya Pabo Sinasi nijje poqui o'oyanaje Sinia meshi yasijje, Sinisia meshi yasijje pea'ai. Jesosaja esohui huohui capoqui o'oyanaje. Ojjaña Jesosaja epeeji cuana Jesosa nijje jjapeequi meesahua canaje quea ja'a nee.

Timoteo poquinaje Pabo nijje, Sinasi pea'a nijje

16 ¹Majoya Pabo Sinasi nijje poqui o'oyanaje Debe yasijje, Nisata huasijje pea'ai. Jomajo ohuaya Jesosaja epeeji shacuima' nequi ba canaje Timoteo bajjani. Timoteoja enaese Jodio pona poanaje, Jesosaja epeeji pea'ai. Ojaya ejeajji ca ca Jieno dejja poanaje. ²Ojjaña Jesosaja epeeji cuaa Nisatajo ba'eya, Iconiojo ba'eya pea'ai Timoteojo quea bihui nee huohui canaje jama ba'a: —Timoteo quea pame nee, Jesosaja epeeji quea ca'a nee oya, de —poanaje.

³Jamajjeya Pabohua Timoteo dojo sa acanaje onijje esohui huohuiya. Quea huiso Jodio cuana ma meshijo ba'enaje; ojjañaja eba Timoteoja ejeajji Jodio pojjeama, Jieno dejja. Jamajjeya ebacua ejja Timoteo Jieno cuana jayojja jama tiil'yonaje; Moisesija etehue'yo jayojja jama cuiishasha biso nei jehusejjajaja jjima poanaje. Jamajjeya Jodio cuana tecue'ama onijje epojji Pabohua Timoteo cuiishasha biso nei jehusejjajaja mee canaje.

⁴Majoya oya cuana poquinaje ojjaña cuiñajji cuana huasijje. Ojjaña Jesosaja epeeji cuana huohui capoquinaje esohui etehue'yo ma Jesosaja hoojea'yo

esohui huohuijji cuaa, Jesosaja epeeji etii cuaa Jenosanenajo tehue canaje. Ojjaña ma etehue'yo ba mee canaje: —E'e, ¡ma etehue'yo jayojja jama acue miquianaaya! —acanaje Pabohua, Sinasiya pea'ai. ⁵Jamajjeya Jesosaja epeeji cuana Jesosaja esohui jayojja jama ba'e meesahua canaje. Yahuajo oya cuana quea ja'a pishana ba'enaje. Jjeyahua nei ca ca Jesosaja epeeji quea ja'a nee ba'enaje Jesosajo. Quea huiso cuana Jেসosa nije jjapeequi poquipoquinaje pea'ai.

Pabo jjacahuibaquinaje Eyacuiñajji onijje miminaje

⁶Jamatii Edojjoshahua Pameya oya cuana Asia meshi yasijje poqui mee jjima acanaje. Jomajo esohui huohui mee jjima acanaje. Jamajjeya oya cuana Pichia meshi yasijje poquinaje, Janata meshi yasijje pea'ai poquinaje. ⁷Majoya oya cuana poeyanaje Misia meshi yasijje. Jomajo oya cuana jjashahuabaquinaje Bitinia meshi yasijje epoquijji. Jamatii Edojjoshahua Pameya oya cuana ma meshi yasijje poqui mee jjima acanaje. ⁸Jamajjeya oya cuana Misia meshije jjayejequinaje. Toasa cuiñajji yasijje poquinaje, bae ai sahua huasijje. ⁹Jomajo Eyacuiñajjiya Pabo jjacahuibaqui mee canaje jama ba'a: Jjacahuibaquianijo Pabohua oe dejja cahui ba canaje Masenonia meshijo ba'e. Oya Pabo nije miminaje jama ba'a: —Pabo, ¡poecue Masenonia meshi yasijje, ecuanaja meshi yasijje! ¡Ecuana Jesosaja esohui huohuihuacue! —jamaya acanaje Masenonia dejjaa.

Majoya Pabo shequi'yonaje. ¹⁰Jamajjeya shequi'yo majje Pabo Masenonia meshi yasijje ecuaña nije besapoqui sa poanaje. Jama jjashahuabaquime poanaje ba'a: —Eyacuiñajjiya eseya huoojea cani Masenonia meshi yasijje esohui quea pame nee Jেসosajo huohuiya, ojjaña Masenonia meshijo ba'e sohuihuohuiya.

Jamajjeya ecuaña aquiana cuana chicha majje besapoquinaje.

Pabo, Sinasi pea'ai Pinipo cuiñajji yasijje besapoquinaje

¹¹E'e Teopino, eyaya, Nocaa pea esohui Jেসosaja epeeji cuanaja, ma eyaya banaje eyaya tehueaña miquea ebajji jama ba'a: Majoya Toasa huasijje poe majje ecuaña bishe ai yasijje nequisohuaquinaje. Besapoquinaje Samatasia nasi yasijje. Majoya pea mecahuaje besapoquinaje Neaponi cuiñajji yasijje, bishe aijo. ¹²Majoya Neaponijo nequi ecuaña poquinaje quea huesha nee, Pinipo cuiñajji yasijje ejiojjijje Masenonia meshi ebio dojjojo. Pinipojo Shomano dejja cuana ba'yani quea quemo cuiñajji. Jamajjeya quea huiso dejja Pinipo huasijje poeyani anicuaa. Jamajjeya ecuaña Pinipojo nequinaje quea cahui huiso. ¹³Majoya Jodioja epojja ejomishocajji ecuaña cuiñajji esecue yasijje poquinaje cuei sahua huasijje. Jama jjashahuabaquime poanaje ba'a: —Jomajo Jodio cuana Eyacuiñajji nije mimiani ba'ajja.

Jomajo quea huiso epona ejjachichiqui ani banaje. Jamajjeya Pabo, ojaya epeeji cuana pea'ai anioquenaje. Esohui huohui canaje epona cuanaja eshajja'ajjajji. ¹⁴Oe eponaa Ninia bajjaniya quea ja'a nee shajja'ajja canaje. Oya

Tiatina pona, Tiatina cuiñajjijo ba'e, daqui huo'o quiajji pea'ai, daqui huo'o quea pame nee nee quiajji. Oya Ninia Eyacuiñajjija epeeji yahuajo poanaje. Jamajjeya Emeshi Mese neiya oya shajja'ajja meesahua canaje Paboya esohui quea pame nee Jesusaja. ¹⁵Jamajjeya Ninia, oja huapa pojjeama cuana pea'ai Jesosa nijje jjapeequi'yonaje. Onaaya oya Eyacuiñajjijo besa mee canaje enajo. Majoya Niniaa Pabo jama acanaje ba'a: —Miquea eba eya Emeshi Mese nei Jesusaja epeeji nei, ojaya esohui jayojja jama año. Jamajjeya jecuea equijo ba'ecue! —poanaje Ninia. Jamajjeya ecuana Niniaa ja'a cajjequinaje ojaya equijo eba'ejji.

Pabo, Sinasi pea'ai jeanobiajea canaje cuaa

¹⁶Quijje ecuana poqui o'oyanaje cuei yasijje Eyacuiñajji nijje mimiya. Poquijeya ecuaya banaje oe epona ahuema' ani. Ohuaya chaco cani sosema' niñepoqui yajjejojo. Jamajjeya eshahuaa esapajo nequiya epona huohui meesahua canaje ohuaye nei ma quijje onaa acaje. Maya huohui capoquinaje quea huiso bejjo sosejje. O chacomeejji poaniya quea huiso bejjo jjeshe canaje epona niñepoquiya huohui cani sosejje. ¹⁷Ma epona niñepoqui Pabo quishishijji poquinaje. Taaa poquinaje jama ba'a: —Jiquio dejja cuana Eyacuiñajji quea ca'a neeja echacojji poani. Onaaya miquianaya huohui cani esohui quea pame nee Jesusajo, ma ohuaya mimishi cuana cuijea'yo majje miquianaya ba'e tiitii mee caje'yo eyajo —jama taaa nishomeya poanaje ecuana quishishijji poquije.

¹⁸Jama taaa majamaja nishomeya epona popoquinaje quea huiso cahuijo. Quijje Pabo quea quene po majje, jjanojjaquicuaji majje eshahua eponajo nequi huoojeacuayajea ca'yonaje jama ba'a: —¡Eshahua eponajo nequi cuayaqui'yocue! ¡A'a dobiqúi o'oyajji! Jesosa Quito nijjeya eyaya miya huoojeacuayajea'yaña —Pabohua acanaje.

Jjeyahua nei eshahua eponaja yamijo nequi cuayaqui'yonaje.

¹⁹Ma ba majje eponaja echacomeejji poani quea quene nee nee poanaje Pabo nijje, Sinasi nijje pea'ai. Jama poanaje ba'a: —¡De! Jjeya epona shahuama'yo. Jamajjeya ojaya ba'yo jjima poaje ojaye nei ma onaa quijje nei acaje. Onajaya ecuana esosequia'yojji pojjeama ma eponaa huohui cani sosejje —poanaje epona chacomeejji poani.

Jamajjeya epona chacomeejji poaniya Pabo, Sinasi pea'ai iña canaje. Dojo canaje ojjaña aquiana quiajji equi yasijje. Jomajo Pinipo emeshi mese nijje miminaje, etii cuana nijje. ²⁰Shomano emeshi mese huohui'ajja cañaquinaje jama ba'a: —¡Bacue! Jiquio Jodio dejja cuaa, Pabohua, Sinasiya pea'ai ojjaña cuana ecuanaja cuiñajjijo ba'e quea quene nee nee po mee cani. ²¹E'e, oya cuaa pea ejjashahuabaqui'yojji huohui canaje. Pea eba'ejjijo huohui canaje. Jamaya pojjeama ecuanaja emeshi meseja esohui. Jamaya pojjeama Shomano dejja cuanaja esohui pea'ai. Ecuana Shomano dejja cuana, jamajjeya Paboya esohui jayojja jama yajji, ¿yajja e'ajji?

²²Majoya ojjaña dejja cuana cuajicuaji jebejenaje Pabo que. Quea quene nee ojjaña poanaje Pabo nijje, Sinasi pea'ai nijje. Emeshi mese

cuana pea'ai quea quene po majje Paboya daqui Sinasija daqui pea'ai oja ehusho ba'e ña'isajea canaje. Huohui canaje jama ba'a: —¡Pabo, Sinasi pea'ai cuiasejja neineicue acui sisiya! ¡Majoya oe jeanobiajea meequicue ejjajeanoiaquijji equi yasijje! —acanjje Pinipo emeshi mese cuaa.

²³Jamajjeya Pabo, Sinasi pea'ai janobajjima nei cuiasejja huicha'a huicha'a canaje cuaa. Majoya oya cuana dojo canaje ejjajeanoiaquijji equi yasijje jeanobiajeaa. Ejjajeanoiaquijji equi cuiñajji jama acanjje ba'a: —¡Jiquio dejja cuana jaahuana neineicue! ¡A'a cuayaqui mee'yojji! Poquiquehuajo aje mi oe cuiajea caje'yo emeshi mese cuaa —acanjje.

²⁴Jamajjeya ejjajeanoiaquijji equi cuiñajjiya ma esohui shajja'ajja majje quea mete poanjje. Pabo, Sinasi pea'ai ejjajeanoiaquijji equi dojjo nei yasijje jeanobiajea canaje; quibo jeyochicha canaje acui tejjee.

²⁵Jamatii mecashono Pabo, Sinasi pea'ai Eyacuiñajji nijje mimi jaanjje. Sohuicuaya jaanjje pea'ai. Ojjaña cuaa ejeanobia jaaa shajja'ajja canaje sohuicuaya jaa. ²⁶Majoya meshi huehuahuehuanaje janobajjima nei. Mei jjiyo cuana huehuahuehua neineinaje pea'ai. Esecue cuana jamatii nequi jjaca'apejojeaquinaje. Ojjaña dejja cuana ejeanobia jaa jpapichojeaqui'yonaje baa jjonno cuana, de. ²⁷Oja ejeanobia cuiña po'ani aje oe shequi'yonaje. Shequi'yo majje ba canaje ojjaña esecue cuana ejjaca'apejoqui'yo nequi. Ojjaña dejja ejeyojaa poqui'yonajejo poso metejeanje. Baa ña canaje ejaacuaqui'yojji nisho. ²⁸Jamatii Pabo jama taaame poanjje ba'a: —¡A'a oe jjaacuaqui'yojji! Ecuana yani ojjaña tii; poqui'yo jjima —Pabo poanjje.

²⁹Paboya esohui shajja'ajja majje equi ejjanobiaquijji cuiñajji taanjje jama ba'a: —¡Cuaquijji oe yecue! —poanjje.

Cuaquijji ña majje ejjajeanoiaquijji dojjo huasijje cuajicuaipoquinaje Pabo baa. Pabo ba majje ecui'oshajjajo nequinaje. Quea mete jjejojo piopionequinaje. Ojaya eba Pabo, Sinasi pea'ai Eyacuiñajji epeeji cuana. Jamajjeya oya cuanjjo quea mete nee poanjje. ³⁰Majoya ohuaya Pabo, Sinasi pea'ai ejjajeanoiaquijji dojjojo nequi dojocuayaqui ca'yanaje. Oja equi yasijje dojjo canaje. Huohui'ajja cañaquinaje jama ba'a: —Epeeji cuana, ¿aya acuae ecuea mimishi cuana cuijea caje'yo so'o? ¿Yajja po majje acuae mo poquije'yo eyahuasijje? ¿Yajja acuae po cajji cuaqui yasijje poqui'yo jjima epojji? —acanjje ejjajeanoiaquijji cuiñajji poaniya.

³¹—E'e —Pabo poanjje—, Emeshi Mese nei quea pame Jesosa Eyacuiñajji huojea'yo ojjaña jaahuanajji. ¡Onijje mimicue, onijje japee neineiicue! ¡Ojaya esohui jayojja jama ba'ecue! Jamajjeya ohuaya miquea mimishi cuana cuijea caje'yo. Ojjaña miquea huapa pojjeama cuaa miquea equijo ba'eya jamaya ca'a cahua pea'ai. Jamajjeya mimishi cuijea'yo majje Jesosa miquianaya ba'e tiitii mee caje'yo eyajo onijje —Pabohua acanjje.

³²Majoya Pabohua, Sinasi nijjeya esohui quea pame nee Jesusajo, Emeshi Mese neijo huohui canaje ojjaña ma equijo ba'eca cuanaja eshajja'ajjaji.

³³Shajja'ajja majje ejjajeanoiaquijji cuiñajjiya ecua sii Paboya edaasa, Sinasija edaasa pea'ai shacua canaje. Shacua majje shicui canaje mechashono nei. Majoya

oya, ojjaña ojaya huapa pojjeama cuana nijje pea'ai Jesosa nijje jjapeequinaje. Majoya oya, ojaya huapa pojjeama cuana pea'ai Eyacuiñajji besa mee canaje enajo. ³⁴Majoya ohuaya Pabo, Sinasi pea'ai oja equi yasijje dojobodiaqui majje oya cuana bobia canaje. Oya, ojaya huapa pojjeama cuana pea'ai quea bihui nee nee poanaje Jesosa nijje jjapeequi majje, Eyacuiñajji nijje pea'ai.

³⁵Majoya mecajjeahua nei Shomano emeshi mese cuaa sohuinano cuana huoojea canaje ejjajeañobiacuijji equi yasijje jama huohuime yajji ba'a: —¡Pabo, Sinasi pea'ai pichojea'yocue!

³⁶Jamajjeya ejjajeañobiacuijji cuiñajjiya Pabo huohui canaje jama ba'a: —Pabo, Shomano emeshi mese cuaa miqianaya pichojea mee ca'yonaje. ¡Jjeyahua nei esecue yasijje cuayaqui'yocue! ¡Quea bei nee poquicue, Pabo, Sinasi! —acanaje ejjajeañobiacuijji cuiñajjiya.

³⁷—Chojja —Pabo poanaje—. Ecuana mimishi'ama. Jamatii Pinipo emeshi meseya ecuana iña mee canaje. Jeanobiajea mee canaje pea'ai. Ojjaña ba caquinaje onaa janobajjima nei cuiaseja caqui. Ecuana ca ca Shomano dejja pea'ai. Jamajjeya jjeyahua nei ecuana quehuajje nei huoojea sa acani. Chojja, de. Oya cuana capoe'yahua, oya tii. Shomano emeshi meseya ecuana capichojea ca'yahua, ecuana cadojocuayaqui ca'yahua esecue yasijje ojjañaja ebajji —Pabo poanaje.

³⁸Jamajjeya sohuinano cuana poquinaje. Shomano emeshi mese cuana huohui cañaquinaje Paboya esohui. Shajja'ajja majje Shomano emeshi mese cuana quea mete nee nee poanaje: —E'e de, Pabo, Sinasi pea'ai Shomano dejja cuana, de. Jamaya ecuanaja ba jjima. Shomano emeshi mese etiya ecuana tecuea ca chana' —poanaje Pinipo emeshi mese cuana.

³⁹Jamajjeya Pinipo emeshi mese cuana ma Pabo cuiaseja meejji epo poquinaje Pabo baa, Sinasi baa pea'ai. Quea bei nee nee huohui canaje jama ba'a: —Pabo, Sinasi, ecuana quea yeno nee nee miqiana cuiaseja mee epojjiyojo. ¡A'a che ecuana nijje quea quene nee pojji! ¡Jjeya quea bei cuayaqui'yocue! ¡A'a jiquio cuiñajjiyojo esohui huohui o'oyajji! —acanaje Pinipo emeshi mese cuaa.

Majoya oya cuaa Pabo, Sinasi pea'ai pichojea ca'yonaje. Jama acanaje ba'a: —E'e pojja'a miya pea meshi yasijje poquije esohui huohuiya —jama amajjeya huoojea canaje quea beiya.

⁴⁰Jamajjeya Pabo, Sinasi pea'ai ejjajeañobiacuijji equijo nequi poqui o'oyanaje Niniaja equi yasijje. Ojjaña Jesusaja epeejji cuana ba o'oya majje ojjaña nijje miminaje; poquinaje. —E'e, poquia iña. ¡Jesosa nijje quea pame nee jjapeequicue mete'ama! —Pabo poanaje, Sinasi pea'ai.

Pabo Tesanonica cuiñajji yasijje poquinaje

17 ¹Jamajjeya Pabo, Sinasi pea'ai Pinipojo ani poquinaje Tesanonica cuiñajji yasijje. Poquijeya Apiponi cuiñajji yejje canananaje, majoya Apononia pea'ai yejje canananaje. Tesanonica huasijje poqui majje aniñaquinaje. Jomajo

Jodioja equi ojee ejjachichaquijji yani. 2-3Ma equi yasijje Pabo poquinaje Sinasi nijje. Ojjaña ejomishocajji pojajajo Jesosaja esohui huohui huicha'a huicha'a canaje. Jodio cuana nijje jjamicuicuaaje nobiajeaquinaje pea'ai. Beshahua nei oe ba'ime Eyacuiñajjija esohui huohuijji yahuajo nei ba'ea esohuijjo ohuaya Tesanonica dejja cuana jjabahuejjaqui mee canaje. Jama acanaje ba'a: —Eyacuiñajjija huoojea'yo ojjaña jaahuanajji esejo quea nee poanaje. Mano'yonaje eseja mimishi cuijea'yoyji. Mano'yo majje shequi o'oyanaje. Eyacuiñajjija huoojea'yo ojjaña jaahuanajjijo, Jesosajo, eyaya huohuiaña miquianajaya eshajja'ajjaji —Pabohua acanaje.

4Pabojaja esohui shajja'ajja canaje quea huiso Jodio cuaa. Jjapeequi'yonaje Jesosa nijje. Pabo nijje, Sinasi nijje pea'ai jjapeequinaje. Quea huiso Jieno cuana ma yahuajo nei Eyacuiñajjija epeeji epo cuana Pabo nijje jjapeequinaje, Sinasi nijje pea'ai. Etii cuanaja ehuanae cuana Jesosa nijje jjapeequi'yonaje pea'ai. 5Jamajjeya quea huiso nee Pabo nijje jjapeequiani ba majje Jodio etii cuana quea quene poanaje. Quea huiso dejja mimishi cuana iyaa canaje. Quea huiso jjachichaqui mee canaje. Ojjaña quea quene, quea shajjaquijjo nee nee po mee canaje. Majoya ojjaña cuana Jasonija equi yasijje cuajicuaajjibebeaje Pabo, Sinasi pea'ai cuiaa nisho. 6E'e, oya cuaa Pabo, Sinasi pea'ai sa'ajja canaje. Chama' ba majje equi mese Jasoni bajjani iña canaje. Jesosaja epeeji cuana iña canaje pea'ai. Dojo canaje dejja etii cuana huasijje tecueaa. Janobajjima nei taaa majamajanaje jama ba'a: —Pabohua, Sinasiya pea'ai quea huiso cuana pea esohui huohui canaje. Oya cuana jiquiacua poeyanaje pea'ai esohui huohuiya. 7Jasoniya ca ca oma oya cuana oja equijo ba'e mee canaje. Oya cuana ecuanaja emeshi mese etijja, Sesa bajjanija esohui shajja'ajja sa po'yo ajja. Oya cuaa ca ca huohui canaje pea emeshi mese nei yani, Jesosa bajjani —jama siajje ameya acanaje Jodio cuaa Tesanonicaajo ba'e cuaa.

8Ojjaña Tesanonicaajo ba'e, cuiñajji mese cuana pea'ai quea mete nee nee poanaje ma esohui shajja'ajja majje. 9Jamajjeya Tesanonica mese cuaa Jasoni, oja epeeji cuana pea'ai tecuea canaje jama ba'a: —¡Pabo, Jesosaja epeeji cuana pea'ai a'a miquea equi yasijje dobi mee o'oyajji! ¡Huoojeacue oe!

Majoya Jasoni, ojaya epeeji cuana pea'ai bejjo sose quia mee canaje ejeacuaya'yoyji. Ma sosequia majje Jasoni ojaya epeeji cuana nijje poqui'yonaje.

Pabo, Sinasi pea'ai Benea meshi yasijje poquinaje

10Jamajjeya ma mecajje tii Tesanonicaajo ba'ecaa, Jesosaja epeeji cuaa Pabo, Sinasi pea'ai huoojea canaje Benea meshi yasijje. Benea cuiñajji yasijje poqui majje Pabo, oja epeeji cuana nijje poquinaje Jodioja equi ejjachichaquijji yasijje. Esohui huohui ca o'oyanaje. 11Jodio cuana Beneajo ba'e quea pame nee, Jodio cuana Tesanonicaajo ba'e jayojja jama pojjeama. Oya cuaa ca ca oe Pabojaja esohui quea bihui nee nee shajja'ajja canaje, Sinasi esohui pea'ai. Majoya Eyacuiñajjija esohui yahuajo nei tehue ba neinei canaje. Jama poanaje ba'a: —E'e, Pabojaja esohui e'e nei. Jamaya Eyacuiñajjija esohui yahuajo nei tehue poani e'e jojo nei —poanaje cuana.

¹²Jamajjeya quea huiso nei Beneajo ba'eca Jesosa nijje jjapeequi'yonaje. Quea huiso Jieno cuana jomajo ba'e pea'ai Jesosaja epeeji cuana poanaje. Jieno epona cuana quea huiso pea'ai Jesosa nijje jjapeequi'yonaje, epona quea pame nee cuana, etii cuanaja ehuanase cuana.

¹³Jamatii Jodio dejja cuana Tesanonicajo ba'e onaaya huohui canaje jama ba'a: —Pabohua Jesosaja esohui huohui cani Beneajo pea'ai.

Ma shajja'ajja majje oya cuana poeyanaje Benea huasijje; Pabo ocuena canaje ecuijji nisho. ¹⁴Ma ba majje ca ca Jesosaja epeeji cuaa Beneajo ba'eya Pabo quehuadojo canaje bae ai yasijje. Sinasi ca ca Beneajo tii nequi'yonaje Timoteo nijje. ¹⁵Jamajjeya Jesosaja epeeji cuaa Pabo dojo canaje, Atena cuiñajji yasijje besapoquinaje. Majoya Pabohua oya cuana huohui canaje jama ba'a: —¡Ecuca epeeji Sinasi, Timoteo pea'ai huojeacue jiquiacua jjeyahua nei! Oya poeyajo eyaya ishoaje jiquiojo —Pabo poanaje.

—E'e, huohuiñaquije'yo aje ecuaaya. Poqui'ya iña —amajje oya cuana poqui o'oyanaje Benea huasijje.

Atenajo Pabohua esohui huohuiqui canaje

¹⁶Jamajjeya Pabohua Atenajo aniya ojaya epeeji ishoa'ajja canaje, Sinasi, Timoteo pea'ai. Atenajo aniya Pabohua ba canaje quea huiso nee nee eyacuiñajji nisho, epana'yo cuana bihuia cani. E'e, ojjaña ma cuiñajji ba'eca cuaa pea epana'yo bihuia caqui ba majje Pabo quea quene nee nee poanaje. ¹⁷Jamajjeya Jodioja equi ejjachichaquijji yasijje Pabohua esohui huohui huicha'a huicha'a canaje. Quea huiso miminaje Jodio cuana nijje, Jodio pojjeama nijje pea'ai joya Eyacuiñajji esohui bajji cuana nijje. Ojjaña pojja aquiana quiajji equi yasijje poqui majje Pabohua esohui huohui canaje ojjaña cuana huasijje. ¹⁸Majoya pea cuana Epiconeoja esohui shajja'ajja, Esitoicoja esohui huohuijji pea'ai onijje miminaje quea huiso. Jjamimicuijje nobiajequinaje. Pabo nijje mimi majje beca cuana jama poanaje ba'a:

—Jiquio dejjaa Pabo bajjaniya pea esohui huohui cani, de. ¿Ajeo shai oya mimiani so'lo? Ecuanaajaya Paboya esohui shajja'ajja jjima. Quea quehua, de.

Pea cuaa ca ca jama acanaje ba'a: —Ohuaya pea eyacuiñajji cuanajo huohui cani pojja'a, ma eyacuiñajji ecuanaja ba jjimajo —acanaje cuaa.

Pabohua Jesosajo huohui canaje jama ba'a: —Eyacuiñajjiya Jesosa emano'yojaa shequi mee ca o'oyanaje. Jamajjeya ohuaya dejja cuana shequi mee caje'yo —Pabohua acanaje.

Ma esohui Atena cuanaja quea quehua, yahuajo shajja'ajja jjimajojo.

¹⁹Jamajjeya ohuaya Pabo dojo canaje Aneopaco eyiyo huasijje esohui huohui meeya. E'e, ma eyiyo huasijje ojjaña cuana jjachichaquinaje ojjaña huohui caje esohui shajja'ajja. Jamajjeya Pabo poeyajo, jama acanaje cuaa ba'a: —E'e, ecuana miquea esohui shajja'ajja sa poani. ²⁰Ma ehuhui'yo eyacua pojja'a. ¡Ojjaña huasijje huohui neineicue! —acanaje cuaa—. E'e, qui'ajjaya ecuanaja esohui ba jjima yahuajo. ¡Ba meecue mo oe! —poanaje.

²¹ (E'e, ojjaña Atenajo ba'eca cuana, ojjaña joya Atena huasijje poeyani anicuaa pea'aiya ehuhui'yo eyacua shajja'ajja sa acanaje ojjaña pojajajo. Esohui eyacua huohui canequinaje quea huiso neeya. Jamatii mimimiminequinaje ojjaña cuana, chacochocho jjima poanaje.)

²² Jamajjeya Pabohua Aneopaco eyiyojo nequiya ojjaña huohui canaje jama ba'a: —Dejja cuana Atenajo ba'e cuaa, ¡shajja'ajjacue jiquio eya huohuije, miquianaaya! Miquianaya quea huiso nee jjashahuabaquiani eyacuiñajji cuanajo. Jamaya ecuea eba. ²³ E'e, eya po'ayequequinaje. Eyaya banaje quea huiso epana'yo cuana, ma miquianaa bihuiaña. Majoya eyaya banaje pea'ai mei e'iyasohua ao ani pea'ai eyacuiñajji bihuiajji; ma miquianaaya “Bajjani ba jjima” tehuenaje. Miquianaaya maya Eyacuiñajji bihuiaña, jamatii miquianajaya oya ba jjima. Ma Eyacuiñajji nejjo eyaya esohui huohuiaña miquianajaya ebajji. ²⁴ E'e, yahuajo nei nei Eyacuiñajjiya jiquio meshi pana ca poa. Ojjaña aquiana cuana oja pana pea'ai, de, ojjaña tii. Oya ca ca oe Emeshi Mese nei, ojjaña huoojea'yojji, ojjaña eyajo ani, ojjaña meshi cuanajo nequi huoojea'yojji pea'ai. Jamajjeya Eyacuiñajji equijo ba'e ajja, eseja iya equijo ba'e ajja oya. ²⁵ Eseyaya oya jaahuana ajja, de; oya esejaya eba'esahuajji pojjeama pea'ai. Chojja, ohuaya ca ca oe eseya ojjaña cuana eshe po mee ca'yani; ba'e meesahua cani. Ojjaña aquiana cuana, bobi pea'ai ohuaya quia cani eseya. ²⁶ Yahuajo nei nei Eyacuiñajjiya oe dejja pana ca poa. Ma dejja ojjaña jeajji poa; ojjaña cuana ojjaña meshi cuanajo ba'eca cuanaja baba. Tehuetehue cuanaja baba, pea dejja cuanaja baba, ojjaña ese ejja cuanaja baba pea'ai poanaje Adana. Eyacuiñajjiya ojjaña cuana jjaba'echejjequi mee ca poa ojjaña meshi cuana huasijje. E'e, yahuajo nei Eyacuiñajjiya huohui ca poa jama ba'a: “Ma dejja cuana ba'e caje ma meshijo, pea jomajo. Ma shequiaja huisome tii pea meshi cuanajo ba'e caje cuana” aca poa Eyacuiñajjiya.

²⁷ Jamaya Eyacuiñajjiya amee canaje ojjaña cuana ojo ejjashahuabaquijji, onijje ejjapeequijji. Jamaya Eyacuiñajjiya eseya sa cani ojaya epeeji pojji. Jamatii oya huesha'ama, quea chipi nee ani tii tii, ojjaña ese chipi nei ani.

²⁸ E'e, yahuajo miquianajaya esohui tehuejjiya tehue ca poa jama ba'a:

“Eyacuiñajji yanijo eseya eshe nequi. Ohuaya eseya ba'e meesahua cani, chaco meesahua cani pea'ai. Oja pana jjima jjemo eseya chama' pome. Ojjaña eseya Eyacuiñajjiya bacua cuana, oja pana pea'ai”.

Jamaya yahuajo nei tehue ca poa —Pabo poanaje.

²⁹ —Jamajjeya eseya oja bacua cuana poaniya, oja pana poaniya ¿apiojji acuae oya miquianaaya ba jjima aña so'o? ¿Apiojji acuae Eyacuiñajji mei hu'o'o epana'yo, mei oshe epana'yo, mei ca'a epana'yo jayojja jama poso aña so'o miquianaaya? Chojja, Eyacuiñajji miquianajaya epana'yo jayojja jama pojjeama. ¡Meshi epana'yo nequi jayojja jama poso a'a ajji, de! ³⁰ Yahuajo nei dejja cuanaja Eyacuiñajji ba jjima poa. Jamatii Eyacuiñajjiya oya cuana napa jeyojeyo jjima poa oja mimishi cuanajo. Jjeya ca ca ohuaya ojjaña cuana huohui canaje jama ba'a: “¡Miquea mimishi cuana pajea'yocue! ¡Enijje jjapeequicue! ³¹ E'e, quijje eyaya ecue

huoojea'yo ojjaña jaahuanajji Jesosa huoojeaje. Ojjaña ojaya eba quea ja'a nee. Jamajjeya ohuaya ojjaña sosequia caje ma oya cuaa acanaje sosejje. Joya quea pame nee ba'enaje ohuaya quea bihui nee ba'e tiitii mee caje'yo. Mimishi cuana ca ca oe quea nee nee tii tii poaje'yo" aca poa Eyacuiñajjiya —Pabo poanaje.

—Jamajjeya Jesosa mano'yajo Eyacuiñajjiya oya shequi mee ca o'oyanaje. Jamaya ohuaya ojjaña cuana ba mee canaje jiquio esohui Jesosajo e'e nei —Pabo poanaje.

³²Eyacuiñajjiya dejja cuana shequi mee ca o'oyanaje Pabo poajo shajja'ajja majje quea huiso dejja cuana soa neineinaje shajja'ajja sa po ajja jjejojo. Pea cuaa ca ca Pabo huohui canaje jama ba'a: —Quijje ecuaaya miquea esohui shajja'ajjaje o'oya —acanaje cuaa.

³³Majoya Pabo esohui huohuina'yo majje poqui'yonaje. ³⁴Beca cuana Pabo nijje poquinaje. Ojaya esohui shajja'ajja majje Jesosa nijje jjapeequi'yonaje. E'e, Aneopaco meshi cuiñajji Dionisio bajjani, oe epona Damanisi bajjani, pea cuana pea'ai Jesosa nijje jjapeequi'yonaje.

Pabo Conitio huasijje poquinaje

18 ¹Majoya Pabo Atenajo nequi poquinaje Conitio cuiñajji yasijje ejiojjijje. ²Conitiojo ohuaya Jodio dejja Aquina bajjani ba canaje. Aquina aje Jodio dejja, Ponito meshijo cuaya. Yahuajo Ponito meshijo ba'e oya poquinaje Itania meshi yasijje. Shoma cuiñajji ba'enaje. Majoya Itania meshi meseya Canio bajjaniya ojjaña Jodio cuana Shomajo ba'e huoojea canaje pea cuiñajji cuana huasijje: —Jodio cuana, Shomajo ja'a ba'ejji! ¡Poquicue miquianaya ojjaña! —acanaje Shoma meshi mese Caniohua.

Jamajjeya Aquina oja huanase Pisina nijje poeyanaje Conitio huasijje ba'eya. Jamajjeya Pabo Conitio huasijje poe majje poquinaje Aquina baa. ³Pabo daqui moo equi socojji poanaje; Aquina pea'ai daqui moo equi socojji. Jamajjeya Pabohua Aquina nijjeya daqui equi cuana soco canaje ojaya equijo, Aquinaja equijo. ⁴Ojjaña epojja ejomishocajji Pabo Jodioja equi ejjachichaquijji yasijje poquinaje esohui huohuuya. Eyacuiñajji esohui Jesosajo huohui canaje Jodio cuana huasijje, Jodio pojjeama cuana huasijje pea'ai. Jama acanaje ba'a: —Jesosa Eyacuiñajji huoojea'yo ojjaña jaahuanajji e'e jojo nei —Pabohua acanaje.

⁵Majoya Paboya epeejji Sinasi, Timoteo nijje Masenonia meshijo nequi Benea cuiñajji esohui huohui ponequinaje, poeyanaje Conitio huasijje Pabo baa. Timoteo, Sinasi pea'ai poeyajo, Pabohua Eyacuiñajji esohui Jesosajo huohui majamaja canaje Jodio oo pana huasijje: —Jodio cuana, ¡bacue! Jesosa e'e jojo nei Eyacuiñajji huoojea'yo ojjaña jaahuanajji —Pabohua huohui tiitii canaje.

⁶Jamatii Jodio dejja cuana Pabo nijje jjamimicuijje nobiajeaquinaje ma esohuijo. Pabo nijje mimijajinaje pea'ai. Jamajjeya quea tecue po majje Pabohua oja daqui ao jjequi'yaja canaje. Jamaya ohuaya ojjaña ba mee canaje ma Jodio dejja cuana quea mimishi nee nee, shajjama'

nei nei. Majoya Pabohua jama acanaje ba'a: —Shajjama' nei nei ca mi coma. ¡Shajjama' poanijo Eyacuiñajjiya miquianaya canapa cahua! Eyaya miquianaya ojjaña Eyacuiñajjiya esohui e'e nei Jesosajo huohuinaje. Jamajjeya mi jashajja'ajjaquaijo eyaya miquianaya jeajejanaje'yo. Jjeyahua nei eya poquije'yo Jodio pojjeama cuana sohuihuohuiya —Pabohua acanaje.

⁷Jamajjeya Jodioja equijo nequi cuayaqui'yo majje Pabo poquinaje Tito Jositoja equi yasijje. Tito Eyacuiñajjiya epeejji Jodio pojjeama. Ojaya equi Jodioja equi ojee ejjachichaquijji pejeje nequi che chipi nei. ⁸Jodioja equi ejjachichaquijji cuiñajji Quisipo ca ca Emeshi Mese nei Jesosa nijje jjapeequi'yonaje. Oja huapa pojjeama cuana oja equijo ba'e cuana pea'ai Jesosa nijje jjapeequi'yonaje. Quea huiso cuana Conitiojo ba'e pea'ai Pabojaja esohui shajja'ajja majje Jesosa nijje jjapeequi'yonaje. Jamajjeya pea cuaa oya cuana besa mee canaje Eyacuiñajjiyo enajo.

⁹Majoya oe mecajje Pabo cahuijaajo, Emeshi Mese neiya Jesosaa oya jjacahuibaqui mee canaje jama ba'a: —Pabo, ja'a quea mete pojji! ¡Ecuea esohui a'a huohui pajea'yojji! ¡Huohui titiicue! ¹⁰Eya minijje nequianijo, pea cuaa miya enapajji pojjeama. Esapa jajahuejjajeajji pojjeama. E'e, jiquio cuiñajjiyo ecuea epeejji quea huiso yani —jamaya Jesosaa Pabo jjacahuibaqui mee canaje.

¹¹Jamajjeya Pabo Conitiojo nequinaje; beshahua nei becanejjijji pea'ai daqui sheme epo nequinaje. Eyacuiñajjiya esohui Jesosajo huohui canaje quea huiso cuana jomajo ba'eja eshajja'ajjajji.

¹²Majoya dejja Canio bajjani Acaya meshi mese poanaje, Shomano emeshi meseja echacojji. Ma pojajajo Jodio cuana quea huiso mimijaji sa poanaje Pabo nijje. Jjachichaqui majje Pabo iña canaje; dojo canaje emeshi mese Canioja equi yasijje Canioja enapa meejji nisho. Esohui huohuijijjojo Pabo niñeba canaje cuaa jama ba'a: ¹³—Jiquio dejjaja Pabo bajjanija esohui eyacua. Ecuanaja etiiquiana Moisesija esohui jayojja jama pojjeama ohuaya ojjaña cuana Eyacuiñajji bihuia mee sa acani. Moisesija esohui pajea mee sa acani pea'ai —acanaje Jodio etii cuaa.

¹⁴Pabohua beshahua nei saja'a canijo emeshi mese Caniohua Jodio cuana tecuea canaje jama ba'a: —Jodio cuana, ¡shajja'ajjacue mo! Jiquio dejja Pabo quea mimishi poani jojjemo eyaya miquianaya shajja'ajja'yome. ¹⁵Jamatii oya mimishi ajjima'; eya onijje quea quene pojjeama. Miquianaya ca ca oe quea quene poani oja esohuijo. Miquea etiiquianaja esohui cuanajo ca ca oe miquianaya mimipanajajiani onijje. Jamajjeya ¡poquicue! Eyaya ehuohuijji pojjeama Pabojaja. Miquea esohui o tecueajji shajja'ajja sa po'yo ajja. ¡Miquianajaya ejjashahuabaqui'yojji jayojja jama acue Pabojaja! —acanaje emeshi mese Caniohua.

¹⁶Caniohua quea tecuea nee po majje Jodio cuana huoojeacuayajea ca'yonaje esecue yasijje. ¹⁷Esecue yasijje cuayaqui'yajo Jodio pojjeamaa Jodioja equi ejjachichaquijji cuiñajji Sosetene iña canaje. Cuiasejja neinei canaje Canio cojja nei. Jamatii emeshi mese Canio mimijajiqui baja sa po ajja poanaje: —Jamatii —poanaje oya.

Pabo Antioquia huasijje poqui o'oyanaje

¹⁸Jamajjeya Pabo oja epeeji cuana nijje Conitiojo esohui huohui ponequinaje quea cahui huiso nee. Majoya ohuaya Aquina nijjeya, Pisina pea'ai nijjeya ojjaña Jesusaja epeeji cuana Conitiojo ba'e jiña ca'yonaje: —Poquia iña —amajje oya cuana poquinaje bae sahua huasijje. Ebishe mese sosequia canaje Sinia meshi yasijje ebesapoqui'yojji, quea huesha nee. Bishe ai yasijje ani jjimahuaa Pabohua ehooja dedejea mee canaje. E'e, ohuaya yahuajo huohui canaje jama ba'a: —Eyaya esapa dedepojijeaje ojjaña ebajji eyaya ma ecua eya yahuajo Eyacuiñajji nijje miminaje jayojja jama ajeyo'yonaje —Pabohua acanaje. Jamaya yahuajo nei Jodio cuaa acaninaje.

¹⁹Majoya Pabo, Aquina nijje, Pisina pea'ai nijje Epeso cuiñajji yasijje besapoquinaje bishejje. Paboya epeeji cuana Aquina, Pisina pea'ai nequinaje Epesojo. Pabo Jodioja equi ejjachichaquijji yasijje poqui majje dobiquinaje Jodio dejja cuana esohui quea pame nee Jesusajo huohuiya. ²⁰Shajja'ajja majje Jodio cuana onijje jama poanaje ba'a: —Pabo, jiquiojo ecua nijje nequicue! ¡Ecuana sohuihuohuicue quea cahui huiso nee! —poanaje ma Jodio cuana.

Jamatii Pabo nequi jjima poanaje. ²¹Poqui jjimahuaa oya cuana huohui canaje jama ba'a: —Eyacuiñajjiya huoojea cajje eya poeje o'oya miquiana baa. Quijje poeje o'oya —acanaje Pabohua.

Majoya bishe ai yasijje ani o'oya majje Pabo Epesojo esohui huohui poequi besapoquinaje Jodea meshi yasijje.

²²Sesanea huasijje ba'eñaqui majje Pabo etaja huasijje nequisohuaquinaje. Majoya poquinaje Jenosanena huasijje. Jenosanena bañaqui majje Jesusaja epeeji cuana ba canaje. Pabohua oya cuana huohui canaje quea bei neeya: —E'e, ¿achajja a nequiana ani so'o? —poanaje Pabo.

Majoya ma ba majje oya Jenosanenajje jjayejjequinananaje. Poqui'yonaje Atioquia huasijje ejiojjijje. ²³Quea cahui huiso nequinaje Atioquiajo. Majoya oya poqui o'oyanaje Janata meshi yasijje, Pichia meshi yasijje pea'ai. Ma meshi cuanajo Jesusaja epeeji cuana esohui huohui o'oya majje ojjaña quea ja'a nee jjapeequi meesahua canaje Jesosa nijje.

Aponohua esohui huohui canaje Epesojo

²⁴Pea Jodio dejja Apono bajjani poeyanaje Epeso cuiñajji yasijje. Yahuajo Apono Anejanía cuiñajji ba'e. Oya esohui huohuijji quea pame nee; Eyacuiñajji esohui etehue'yo ojaya eba nei nei. ²⁵Yahuajo onaaya oya huohui canaje esohui quea pame nee Emeshi Mese nejjo, Jesusajo. Majoya ohuaya bicho'ama esohui huohui canaje e'e jojo nei Jesusajo. Jamatii Huanija, ma ona besameejji poanija esohui ca ca oe ojaya eba, Aponoja. ²⁶Ohuaya esohui huohui canaje Jodioja equi ejjachichaquijji quea huiso nee. Oja esohui shajja'ajja majje Paboya epeeji Aquinaa, oja huanaseya pea'ai Apono dojo canaje equi yasijje. Majoya ohuaya

Apono ojjaña Eyacuiñajjija esohui Jesusaja epoe'yojjijo huohui canaje. Yahuaajo Aponoja ba jjima poanaje ojjaña Jesusaja esohui. ²⁷Quijje pishana Apono Acaya meshi yasijje poqui sa poanaje. Jesusaja epeeji cuaa Atioquiajo ba'eya oya poqui meesahua canaje. Esohui quea pame nee ojo tehue canaje Jesusaja epeeji cuana Acaya meshijo ba'eya ebajji. Majoya Acaya meshi yasijje poqui majje Aponohua Jesusaja epeeji cuana Jesusaja esohuijo jjashahuabaqui mee canaje. Ojjañaa joya Eyacuiñajjija Jesosa nijje jjapeequi meesahua canajeya, ojaya quea jea nee neeya shajja'ajja canaje. ²⁸Jamajjeya pea cuaa ba canijo, Aponohua quea ja'a nee Jodio dejja cuana huohui canaje Jesusajo. Apono quea mimi ja'a nee poanaje. Jamajjeya ohuaya Jodio cuana mimicuiajejanobiajea ca'yonaje. Aponohua Eyacuiñajjija etehue'yo huohui neinei majje ojjaña ba mee canaje Jesosa e'e jojo nei Eyacuiñajjija huoojea'yo ojjaña jaahuanajji poani.

Pabo Epeso huasijje poqui o'oyanaje

19 ¹Apono Conitiojo nequijo Pabo eyiyo huasijje poquinaje, pea cuiñajji cuana huasijje. Esohui huohui capoquinaje. Majoya oya Epeso huasijje poqui o'oyanaje. Epesojo Pabohua Jesusaja epeeji cuana ma jjeya nei onijje jjapeequinaje ba cañaquinaje. ²Ba majje Pabohua oya cuana huohui'ajja canaje jama ba'a: —Epeeji cuana, ¿a'a Edojjoshahua Pame miquiana que dobiqiu'yonaje Jesosa nijje jjapeequianijjo?

—Chojja —saja'ame acanaje cuaa—, onajaya ecuana huohui jjima Edojjoshahua Pamejo.

³Jamajjeya Pabohua huohui'ajja ca o'oyanaje: —E'e. ¿Ajea ehuhui jayojja jama po majje onaaya miquianaya Eyacuiñajjijo besa mee canaje enajo?

Onaaya jama acanaje ba'a: —Huanija esohuijo onaaya ecuana Eyacuiñajjijo besa mee canaje —acanaje cuaa.

⁴Majoya Pabohua jama acanaje ba'a: —Yahuaajo mimishi cuana pajea ca'yajo, Huaniya pea cuana Eyacuiñajjijo besa mee canaje enajo. Jamaya ohuaya acanaje ojjaña ebajji enajo ebesa cuaa mimishi pajea ca'yonaje. Huaniya ojjaña cuana huohui canaje jama ba'a: “Quijje eya esohui huohuijeyo'yajo, pea dejja poeje. Oya Eyacuiñajjija huoojea'yo ojjaña jaahuanajji, Jesosa. ¡Onijje jjapeequicue!” jamaya Huaniya huohui canaje Jesusajo —Pabohua acanaje.

⁵Paboya esohui shajja'ajja canaje dejja cuaa. Shajja'ajja majje peaa oya cuana Eyacuiñajjijo besa mee canaje enajo Jesosa nijje jjapeequianijjo. ⁶Majoya Pabohua onaja esapa biaje eme huana majje Eyacuiñajji nijje miminaje Edojjoshahua Pame ojjaña que edobiquijji. Dobiqiu majje Edojjoshahua Pameya oya cuana pea esohui mimi mee canaje. Eyacuiñajjija esohui huohui mee canaje pea'ai. ⁷Ma dejja cuana, Jesusaja epeeji cuana, ma jjeya nei onijje jjapeequinaje ome miji becanejijji pea'ai huisome poanaje, 12 huisome.

⁸Majoya Pabo poquinaje Jodio cuanaja equi ejjachichajijji yasijje. Dobiqiu majje ohuaya Eyacuiñajjija esohui quea pame nee Jesusajo huohui canaje quea ja'a nee, mete'ama. Pea beca peejjima ba'ime ohuaya huohui huicha'a huicha'a

canaje jama ba'a: —Eyacuiñajji huojea'yo ojjaña jaahuanajji poeyanaje. Oya, Jesosa ojjaña huojea'yojji quijje poaje Eyacuiñajji nijje.

⁹Quea huiso Jodio cuana quea sapa ca'a poanaje; shajja'ajja sa po'yo ajja. Oya cuana quea mimishi poanaje. Jesosa niñeba canaje ojjaña dejja cuana ma equijo nequija eshajja'ajjajji. Jamajjeya Pabohua ma dejja cuana jeajeana'yo majje Jesusaja epeeji cuana dojo canaje pea equi yasijje, esohui huohuijji Tinano bajjanija equi yasijje. Jomajo oya cuana sohuihuohui neinei canaje ojjaña pojajajo, Pabohua. ¹⁰Jamaya Pabo poanaje becanejijji pea'ai shequijame. Jamajjeya quea huiso cuaa Asia meshijo ba'eya Emeshi Mese nei Jesusaja esohui shajja'ajja canaje. Quea huiso Jodio cuaa, quea huiso Jodio pojjeama cuaa pea'ai shajja'ajja canaje.

Esemaja ebacua ejja cuana eshahua huojecacuayajeajji nisho poanaje

¹¹Eyacuiñajjiya ohuaye nei ma dejja cuanaja ba jjima Pabo ameesahua canaje quea huiso. ¹²E'e, Pabo emanojaa cuana huaquia meesahua ca'yonaje, jjaajaqui meesahua ca'yonaje. Eshahua dejjajo nequi huojecacuayajea mee ca'yonaje pea'ai. E'e, pea cuaa Pabojaja eja sisi cuana, pañoeno dojo canaje emanojaa cuana huasijje. Maya emanojaa cuana biajje huana canaje cuaa ehuaquia mee'yojji. Quea aja nee po'yonaje ojjaña cuana. Eshahua cuana, o niñepoqui meejji poani pea'ai Jesusaa Pabo huojecacuayajea mee canaje Pabojaja eja sisi niñepoqui biajje iya cajo. ¹³Jamajjeya Jodio cuaa pea'ai poquinananiya eshahua cuana dejja niñepoqui meejji poani ecuaya meequi'yojji nisho acanaje. Oya cuana ca ca Jesosa nijje jjapeequi jjima. Jamajjeya eshahua cuana ohuaya jama huohuime acanaje ba'a: —Eshahua cuana, ecuaaaya Pabo jayojja jamaa miya huohuiaña. Emeshi Mese neiya Jesusaa miqúanaya huojecacuayajea mee cani. ¡Jjeyahua nei cuayaqui'yoque! —acanaje Jodio cuaa.

¹⁴E'e, Jodio Eyacuiñajji nijje emimijji etii Esemaja bajjanija bacua ejja cuaa, me oejje beca cuaa eshahua cuana jamaya ehuojeacuayajea meejji nisho acanaje. ¹⁵Eshahuaa ca ca Esemaja bacua ejja cuana jama acanaje ba'a: —Jesosa ecuea eba quea ca'a nee nee, Jesusaja epeeji Pabo ecuea eba pea'ai. Ecuea miya eba ca'a'ama, jamatii —acanaje eshahuaa.

¹⁶Majoya jiquio eshahuaa dejja niñepoqui Esemaja bacua ejja cuana iña mee canaje, cuiajeabichajea mee ca'yonaje, onajaya daqui isajea ca'yonaje pea'ai. Jamajjeya Esemaja bacua ejja cuana esecue yasijje cuayaquinananaje daquima', quea nee pea'ai.

¹⁷Ma shajja'ajja majje ojjaña Jodio cuana, Jodio pojjeama cuana pea'ai Epesojo ba'e quea ajjajja nee nee poanaje jama ba'a: —E'e, ee. Jesusaa ohuaye nei eshahua cuana huojecacuayajea cani. Oya quea ca'a nee nee poani. Ohuaya ojaya epeeji nei Pabo eshahua cuana huojecacuayajea meesahua cani —jamaya Emeshi Mese nei Jesosa bihuia canaje quea huiso cuaa.

¹⁸Majoya Jesusaja epeeji cuana quea bicho nee poanaje oja mimishi cuanajo, eshahua cuana nijje jjapeequianijo pea'ai. Jesusaja epeeji cuana

jjachichaqui'yo majje mimishi cuana huohui canaje; quea bicho poanaje ojjaña: —¡Ecuana mimishi cuana pajea meesahua'yocue! —acanjaje cuaa.

¹⁹Joya yahuaajo edasiajji poanjeya, eyamiquecua cuaa pea'aiya ojaya esohui etehue'yo ejjadasiaquijji cuana, esahua nijje acanijo pea'ai chicha'yo majje dahuajea ca'yonaje. Ojjaña pea cuaa ba canaje. Ma papeni etehue'yo cuana quea nahue nee nee, quea sose huiso nee nee poanjaje. (E'e, quea sose huiso nee, quea huiso nee nee huaca sosejje jayojja poanjaje, 100 huaca yahue sosejje jayojja poanjaje.) ²⁰E'e, quea huiso cuaa, quea huiso meshijo ba'eca cuaa Eyacuiñajji esohui Jesosajo shajja'ajja canaje. Quea huiso nee Emeshi Mese nei Jesosaja epeejji poanjaje.

Epesojo ba'e cuana Pabo nijje quea quene poanjaje

²¹Majoya Pabohua jjashahuabaqui majje jama poanjaje ba'a: —E'e, Masenonia meshi yasijje eya poquije o'oya, Acaya meshi yasijje pea'ai ojjaña Jesosaja epeejji cuana baa. Majoya eya Jenosanena huasijje poqui o'oya sa poani pea'ai. Jenosanena huasijje poqui majje eya poqui sa poani Shoma cuiñajji yasijje pea'ai, e'e jojo nei —Pabo poanjaje.

²²Jamajjeya Pabohua ojaya echacosahuajji cuana Timoteo, Enasato pea'ai huoojaja canaje Masenonia meshi yasijje. Pabo ca ca nequinaje Epesojo, Asia meshijo. ²³Pabo oe nei nequijo oja huohui'yo Jesosajo quea huiso cuana Epesojo ba'e quea quene nee nee poanjaje onijje. ²⁴E'e, jama poanjaje ba'a: oe dejja Demetio bajjani mei oshe pana nejji Epesojo ba'enaje. Ohuaya o chacosahuajji cuana nijjeya quea huiso epana'yo sisi cuana Diana nisho bajjani ne canaje. Maya Epesojo ba'e cuaa bihuia canaje, eyacuiñajji poso acanjaje cuaa. Demetiohua, o chacosahuajji cuaa pea'ai Diana nisho quea huiso ne canaje. Ne majje quea huiso ejjeshejji jjeshe canaje Diana nisho sosejje. ²⁵Jamajjeya Demetiohua o chacosahuajji cuana iyaa canaje o que. Pea cuana o jayojja jama epana'yo nejji epo iyaa canaje pea ai. Jjachichaquiyajo Demetiohua oya cuana huohui canaje jama ba'a: —Epeejji cuana, ¡shajja'ajjacue mo! Ecuanaaya epana'yo sisi ne majje quea huiso bejjo jjesheaña epana'yo cuana sosejje. Jamaya miquianajaya eba. ²⁶Miquea eba Pabojaja esohui pea'ai. Ohuaya jama acani ba'a: “Epana'yo cuana dejjaja pana, Eyacuiñajji pojjeama. ¡A'a epana'yo cuana bihuiajji! ¡Eyacuiñajji oe nei bihuiajji!” Pabohua acani. Pabojaja esohui shajja'ajja majje quea huiso cuana Epesojo ba'e, Asia meshijo ba'e pea'ai epana'yo cuana jjeshe maja sa po'yo ajja poanjaje. ²⁷E'e pojjaja ojjaña eseja nejo mimijaji caje. Epana'yo cuana bihuia pajea caje'yo pojjaja. Epana'yo quea quemo nee Diana bajjani bihuia pajea caje'yo, oja equi yasijje poqui pajeaje. Jjeya ojjaña cuaa Asia meshijo ba'eya, ojjaña meshijo ba'eca cuaa pea'ai epana'yo Diana bihuia cani, eyacuiñajji poso acani Diana —jamaya huohui canaje Demetiohua. Jamatii ojaya esohui siajje, de.

²⁸Demetioja esohui shajja'ajja majje ojjaña cuana quea quene nee nee poanjaje. Jama taaame poanjaje ba'a: —Diana eyacuiñajji jayojja quea pame nee. Epesojo enequi oya —jamaya taa neinei nequinaje ojjaña.

²⁹Jamajjeya ojjaña cuana Epesojo ba'e cuajicuajijebenaje taaquii baa. Ojjaña quea shajjaquijjo nee nee, quea mase nee nee poanaje. Paboja epeeji iña majje dojocuajijea ca'yonaje equi esohui huohui cani yasijje. Ma epeeji cuana Jayo bajjani, pea Anitaco. Oya cuana Masenonia meshijo ba'e. ³⁰Shajja'ajja majje Pabo poqui sa poanaje dejja quea quene yasijje mimiya. Jesusaja epeeji cuaa ca ca oya nahue canaje. Jama poanaje ba'a: —Chojja, Pabo, ¡a'a poquijji jocuama! Miya shajja'ajja jjima acaje cuaa. Cuia ca chana' cuaa mi —acanjje.

³¹Pea cuana emeshi meseja meshi cuiñasahuajji cuana Asia meshijo ba'e Paboja epeeji cuana poanaje. Ohuaya esohui tehue majje huoojea canaje Pabo que jama ba'a: —¡A'a poquijji miya esohui huohui cani yasijje! —jamaya tehue canaje Paboja epeejiya, emeshi meseja echacojji cuaa.

³²Dejja cuana ma equijo ejjachichaqui nequi quea shajjaquijjo nee nee taaa canaje. Quea huiso cuana oe esohui taaa canaje. Pea cuana ca ca pea esohui taaa canaje. Quea huiso cuana jamatii jjachichaquinaje. Jama poanaje ba'a: —¿Ajeo acuae ojjaña taani? ¿Ajeo jjachichaquinaje eseya so'o? —acanjje.

³³Majoya Jodio cuaa Anejano huoojea canaje; ojjaña ejjatanacuaquijji ehui dojojji nequinaje. Onaa Anejano taaa canaje; huohui canaje ojjaña ehuhuijji. Jamajjeya Anejanohua tanacua canaje; eme' jeasohua majje jama acanjje ba'a: —¡Quea bei pocue! ¡Jayo, Anitaco pea'ai jja oe pichojea'yocue jja oe, de! ¡A'a jja cuiajji! —acanjje Anejanohua.

³⁴Jamatii oya Jodio pea'ai ba majje ojjaña cuana taaa o'oyanaje. Taaa tiitii nequinaje jama ba'a: —¡Diana eyacuiñajji jayojja quea pame nee Epesojo nequi. ¡Oya bihuiaque! —Jodio cuana epana'yo bihuia ajja neinei jjejojo jamaya taaa canaje Epeso dejja cuana.

³⁵Quijje nei Epeso cuiñajji meseya ojjaña tanacua canaje. Majoya jama acanjje ba'a: —Dejja cuana Epesojo ba'e, ¡shajja'ajjacue mo! Ojjaña cuanaja eba eseyaya Epesojo ba'eya epana'yo Dianaja equi quea quemo jaahuanaña. Ojjañaja eba yahuajo nei oe mei eyajo nequi oquea poa jiquio meshi yasijje. Ma mei ecuanajaya eyacuiñajji Diana pojji aca poa, ma mei eyajje oque. ³⁶Jamajjeya ¡a'a quea quene pojji, quea shajjaquijjo a'a pojji! ¡A'a quea mimishi pojji! ³⁷E'e, miquianaaya jiquio dejja cuana iñanaje; jiquiacua jjequinaje. ¿Apiojji acuaeya jiquiacua yenaje so'o? ¿A'a cuae jja oe siipojji so'o? Chojja, oya cuanaja aquiana Dianaja equijo sii jjima. Epana'yo Dianajo jjaniñebaqui jjima pea'ai. ³⁸Jamajjeya Demetiohua, o chacosahuajji cuaa pea'ai jiquio dejja cuana niñeba sa acanijo, emeshi mese yasijje cadojo cahua. Emeshi mese chaco canijo cahuohuiqui cahua. Majo tii cajjaniñebaquiahua cuana. ³⁹Jamajjeya miquianaya jiquio dejja cuana nijje mimi o'oya sa poanijo ¡emeshi meseja equi yasijje mimiqui o'oyacue quijje! ¡Emeshi meseja esohui jayojja jama pocue! ¡A'a quea shajjaquijjo pojji! ¡A'a quea quene nee pojji! ⁴⁰E'e, onaaya Shomano emeshi mese etii huohui ca chana! Onaa oya huohui cajo, emeshi mese etii ecuana nijje quea quene po chana! “¿Apiojji quea shajjaquijjo poani so'o? ¿Apiojji ecuea esohui jayojja jama ajjima!, e que poe

jjimaa?” ohuaya eseya aca chana'. Jamaya Shomano emeshi meseya acajo, ¿yajja sohui saja'ame aje so'o? —acanaje Epeso cuiñajji meseya.

⁴¹Jamajjeya jama huohui majje ohuaya ojjaña huoojea canaje equi cuana huasijje. Majoya dejja e'iña nequi pichojea ca'yonaje.

Pabo poqui o'oyanaje Masenonia meshi yasijje, Acaya meshi pea'ai yasijje

20 ¹Majoya ojjaña cuana equi yasijje poqui'yo majje, quea shajjaquijjo popajea'yo majje Pabohua Jesosaja epeeji cuana iyaa canaje. Poeyanaje. Pabohua oya cuana quea bei huohui canaje jama ba'a: —E'e, eya poquije o'oya Masenonia meshi yasijje esohui huohui o'oyaa. Jamatii Jesosa miqiuana nijje nequi, miqiuana jaahuanajji. ¡A'a quea mete pojji! Poquia iña —amajje Pabo poqui o'oyanaje Masenonia meshi yasijje.

²Masenonia meshijo poquijeya quea huiso esohui Jesosajo huohui canananaje ojjaña Jesosaja epeeji cuana huasijje. Ojjaña quea bihui nee po meesahua canaje. Jomajo esohui huohui'yo majje Pabo Acaya meshi yasijje poqui o'oyanaje. ³Acaya meshijo oya nequinaje pea beca peejjima ba'ime. Majoya oya jjashahuabaquinaje Sinia meshi yasijje ebesapoquijji bishe aijo. Sinia meshi yasijje ebesapoquijji nisho poaniya Pabohua shajja'ajja canaje Jodio dejja cuaa oya ishoa'ajja cani equecua'yojji. Jamajjeya huacuaya poqui o'oyanaje Masenonia meshi yasijje, ejiojjijje. ⁴Jesosaja epeeji quea huiso cuana Pabo nijje poquinaje. Oya cuana ma bajjani ba'a: Pinisija bacua ejja Sopatene, ma Beneajo ba'e, Anitaco, Seconino pea'ai, ma Tesanonicajo ba'e; pea Jayo ma Debejo ba'e; pea Timoteo; pea Tiquico, Topimo pea'ai ma Asia meshijo ba'e. Mahuiso poquinaje Pabo nijje Masenonia meshi yasijje. ⁵Majoya beca cuana besapoquinaje Toasa huasijje. Toasajo onaaya Pabo, ecuanaya pea'ai ishoa canaje. ⁶Ecuana Pabo nijje ejiojjijje poqui o'oyanaje Pinipo cuiñajji yasijje. Pinipojo nequinaje. Majoya Jodio cuana jjachichaqui majje ojee ijia'ijjianaje quea bihui nee epojji. Pahui shejje mee jjima ijjianaje ecuaaya. Ojee pahui ca'a ijia majje ecuana Pinipojo ani bishe ai yasijje ani'yo majje besapoquinaje. Me oeje cahuime po majje ecuana ba'eñaquinaje Toasajo. Toasajo nequinaje me oeje becanejjijji pea'ai cahuime, 7 cahuime.

Toasajo nequiya Pabohua esho'i shequi mee ca'yonaje

⁷Ebionei epojja ejomishocajjijo, nomicojo, sinecua Pabo Jesosaja epeeji cuana nijje jjachichaquinaje Jesosaja bobi ijiajji. Mecajjeahua nei poqui sa poanaje. Pabo quea huiso sohuihuohui poequi tii jjamecashonoquinaje. ⁸Ecuana jjachichaquinaje equi ejama coo eya equecuayijjijo. Quea misi nee poanijo, cuaquijji quea huiso cuana dedonaje ecuaaya. ⁹Jomajo oe esho'i Eotico bajjani equi jiyo huejjajo anioquenaje. Pabohua esohui huohui majamaja caquijo, esho'i quea cojja cahui nee nee poanaje. Jiyo huejjajo cahui'yo majje quea ao oquequi'yonaje meshi yasijje. Oya baqui majje: —E'e, ee, mano'yonaje chahua, chama'yo tii —taaanaje.

Onaaya oya dojo canaje equi yiye dojjo huasijje emano'yojaa. ¹⁰Jamajjeya Pabo jaaoquequinaje esho'i baa. Esho'i huojje canaje

Pabohua. Jama acanaje ba'a: —¡A'a quea yeno pojji! ¡Oya eshe, emano'yo pojjeama! —Pabohua acanaje.

¹¹Majoya Pabo jaasohuaqui o'oyanaje equecuayijji yasijje. Ojjaña ecuaaya Emeshi Mese nei Jesosaja bobi ojee ijjanaje. Majoya Pabo pea cuana nijje mimi o'oyanaje. Jamatii esohui huohui poequi tii jjapojjaquinaje. Mecajjeahua nei eshequi jaasohua pishanajo Pabo poquinaje.

¹²Majoya esho'ija epeeji cuaa oya dojo canaje equi yasijje. Oya eshe o'oyajo, quea aja nee neejo ojjaña quea bhui nee poanaje.

Pabo besapoquinaje Mineto huasijje

¹³Majoya Pabohua ecuaa huojea canaje Asoni cuiñajji yasijje: —E'e, ¡miquianaya bishe oe dojo huioque Asoni yasijje! ¡Jomajo ishoañaquicue iña! Eya jjeya nei poquije ejiojjijje Asoni yasijje. Majoya mo bishe yasijje aniquije —poanaje.

¹⁴Jamajjeya Pabo Jesosaja epeeji cuana nijje ejiojjijje poquinaje Asoni yasijje. Nequiñaqui majje oya bishe ai yasijje aninaje ecuaa nijje. Majoya ecuaa poquinaje Mitinene cuiñajji yasijje cahuiya. ¹⁵Mitinenejo cahui majje mecajjeahua nei ecuaa bishejje besapoqui o'oyanaje. Oe cahuime po majje ecuaa ba'eñaquinaje Quio nasi chipi nei yasijje. Jomajo cahuiñaquinaje Samosi nasijo. Pea cahuijo ba'eñaquinaje Mineto huasijje. ¹⁶Majoya Pabohua Epeso yejje canaje, Asia meshijo quea cahui huiso nequi sa po aja poanaje. Oya poquicuajicuaji sa poanaje Jenosanena huasijje. Ba'eñaqui sa poanaje Jodioja bobi chichajji shejo, Petecote shejo. Ojjaña Jodio cuana ma pojja cuanajo quea bhui nee ojee ijja'ijjiani ojjaña bobi chicha'yo majje. Ma pojajajoya Pabohua Jenosanenajo Eyacuiñajji bhui sa acanaje.

Pabohua pea esohui esohui huohuijji Epesojo ba'e huohui canequinaje.

¹⁷Jamajjeya Minetojo ba'eñaqui majje Pabohua Jesosaja esohui huohuijji cuana Epesojo ba'e iyaa canaje. ¹⁸Poeyajo Pabohua oya cuana jama huohuime acanaje ba'a: —Epeeji cuana, eya Asia meshi yasijje poeyajo, miquianaaya eya banaje quea pame nee chacoconaje; ecuea esohui miquianaaya shajja'ajjanaje pea'ai. ¹⁹Miquea eba eya Emeshi Mese nei Jesosa Quitoja echacoji poani. Jesosajo eya miminaje quea pame nee. Eya quea miminaa pojjeama. Miquea eba eya pa neineinaje Jesosaja epeeji quea mimishi ba'yanijo. Miquea eba pea'ai Jodio etii cuaa eya quecua sa acanajo ejo quea camaja poanaje. ²⁰E'e, eyaya ojjaña Jesosaja esohui mete'ama huohui majamajanaje equi cuana huasijje, ojjaña jjachichaquiajo pea'ai. Ojjaña ba meesahuanaje. Maya miquea eba. ²¹E'e, eyaya ojjaña huasijje esohui huohui neineinaje Jodio cuana, Jodio pojjeama cuana huasijje pea'ai. Ojjaña jama anaje ba'a: “¡Miquea mimishi cuana pajea'yocue! ¡Eyacuiñajjija esohui shajja'ajjacue! ¡Jesosa nijje jjapeequicue e'e jojo nei! Oya Emeshi Mese nei” eyaya anaje. ²²Jjeyahua eya Edojjoshahua

Pameya huoojea caje Jenosanena huasijje. ¿Yajja shai Jodio cuaa eya acaje so'o? Ecuea ba jjima. ²³Jamatii Edojjoshahua Pameya eya ba mee cani jama ba'a: “Pea cuaa miya iña caje o'oya. Ejjajeanobiaquijji yasijje miya jeanobia caje'yo. Mijo quea camaja poaje. Miya quea nee nee poaje” jamaya ojjaña cuiñajji yasijje poqui majanijo Edojjoshahua Pameya eya ba mee cani —Pabohua acanaje—. ²⁴E'e, onaaya eya sapa jajahuejjajea ca chana'. Jamatii eya mete'ama. Emeshi Mese nei, Jesosa e huoojea'yojji poani. Ojjaña ojaya ehuohui jayojja jama eya a sa poani. Ohuaya eya huoojea canaje esohui quea pame nee Jesosaja huohuiya jama ba'a: “Eyacuiñajjiya ojjaña cuana quea jea nee acani. Ojjaña Jesosaja epeejji cuanaja mimishi cuana cuijea ca'yani. Oya cuana ba'e tiitii mee caje'yo eyajo. Pabo, ¡jamaya huohuime acue!” eya acanaje Jesosaa. ²⁵Jamajjeya eyaya ojjaña miquianaya huohuinananaje Jesosajo: “Jesosa Eyacuiñajji nijje ojjaña huoojeajji oe nei poaje'yo” eyaya anaje. Jjeyahua nei ca ca eya poquije'yo. Ecuea eba miquianajaya eya eba o'oyajji pojjeama. ²⁶Jamajjeya jjeyahua nei eyaya miquianaya e'e jojo nei huohuiña jama ba'a: E'e pojja'a beca cuana miquiana nijje nequi shajja'ajja sa po'yo ajjajo cuaqui yasijje poquije'yo; cuaquijo nequi tiitije'yo mano'yo majje. Jamatii eyaya esohui huohuinaje ojjaña cuana huasijje. Onaya mimimimi mee ajja jama ba'a: “Ecuea Jesosaja esohui shajja'ajja jjima poanaje. Paboja eya huohui jjima”. Chojja, ehuohui poanaje.

²⁷—E'e, eyaya ojjaña Eyacuiñajjiya esohui huohui neineinaje miquianajaya eshajja'ajjajji. ²⁸Jamajjeya ¡miquianaya oe jjajaahuanaquicue! ¡Jesosaja epeejji cuana jaahuanacue quea pame nee pea'ai! E'e, Edojjoshahua Pameya mi huoojeajji poaniya miquianaya Jesosaja epeejji jaahuanajji po mee canaje. Jamajjeya ¡oya cuana jaahuana neineicue! Eyacuiñajjiya oja Bacua Ejja oe nei huoojea canaje oja epeejji epojjijo mano'yohua. Eyacuiñajjiya ojaya epeejji cuanaja mimishi cuijea ca'yonaje. Jesosaja epeejji cuanaja mimishi cuana cuijea ca'yajje oja bacua cuana po mee canaje, Eyacuiñajjiya. ²⁹Jamatii ecuea eba eya poqui'yajo beca cuana, eshahua epeejji cuana quea mimishi poaje. Jesosaja epeejji cuana poquiquehua mee sa acaje. Jesosaja esohui pajea mee sa acaje pea'ai. E'e, jiquio ecua ibia quea maseya ñajjajja poquiquehuajeanaanana mee cani, chama'yo tii po mee cani jayojja jama eshahua epeejji cuaa Jesosaja epeejji cuana aca chana'. ³⁰Jjeya beca cuana miquiana nijje nequi minijje jjapee nishoquije. Quijje ohuaya Jesosaja epeejji cuana siajje acaje; Eyacuiñajjiya esohui e'e nei huohui ajja. Jesosaja epeejji cuana oe pojji poquiquehuaje ma siajjepojji cuana nijje. ³¹Jamajjeya ¡jjashahuabaquicue oe! ¡Ecuea esohui a'a pajea'yojji miquianaaya! E'e, pea beca peejjima shequijame eyaya miquianaya esohui huohui neineinaje epojjajo, mecajje pea'ai huohui majamajanaje eyaya. Huohupoquia majje eyaya niñeshe'apouqianaje. Miquianajo eya quea yeno popoquinaje —Pabo poanaje.

³²—Jjeya eya poquije'yo. Eyacuiñajji nijje miquianajo mimije jama ba'a: “Eyacuiñajji, ¡Jesosaja epeejji cuana jaahuanacue! ¡Miquea esohui a'a pajea mee'yojji! Miquea esohuijo oya cuana miquea epeejji quea ja'a nee poaje'yo. Jamajjeya miquea epeejji quea ca'a nee poaje. ¡Oya cuana

quea pame nee acue! Jamaya miyaya ña ojjaña Jesusaja epeeji cuanajo. Eyajo minijje ba'e tiitii meeje'yo pea'ai. Jamaya ecuea eba". E'e, jamaya eya Eyacuiñajji nijje mimiani miquianajo.

³³—E'e, miquianajaya eba pea'ai onajaya daqui cuana, onajaya bejjo pea'ai ecuea jea ba jjima. ³⁴Chojja, ecuea bobijo, ojjaña ecuea eba'ejjijo pea'ai eya chacochaco nequinaje. Ecuea epeeji cuana enijje poquiani eyaya bobianaje pea'ai. Maya miquianajaya eba. ³⁵Jamaya eyaya miquianaya ba meenaje ojjaña quea pame nee chacocue! ¡Aema! ba'e meesahuacue pea'ai! Jamajjeya ¡jamaya acue miquianaaya! ¡Emeshi Mese nei Jesusaja esohui pea'ai a'a pajea'yojji! Jama ba'a: "Pea cuana aquiana quia majje miya quea bhui poaje. Joya miya aquiana quiaña quea bhui pishana poaje" jamaya Jesosa poanaje —Pabohua acanaje.

³⁶Majoya Pabo, ojaya epeeji cuana pea'ai Eyacuiñajji nijje ojee miminaje ecui'oshajjajo nequi majje. ³⁷Paboya epoqui'yojji ojjaña ojaya epeeji cuana pa canaje. Pabo cuiapashi ca'yonaje, poquije'yo ba canaje. ³⁸Quea yeno poanaje Paboya esohuijo: —E'e de, ecuanaja Pabo eba o'oyajji pojjeama pa jiquio meshijo —oya cuana poanaje.

Jamajjeya ojaya epeeji cuana quea yeno poanaje. Ojjaña cuana onijje bishe yasijje poquinaje. Besapoquije'yo ba canequinaje.

Pabo Jenosanena huasijje poqui o'oyanaje

21 ¹Jamajjeya bishe ai yasijje ani majje ecuanaja epeeji cuana jeana'yonaje. Epi nei besapoquinaje Cosi nasi yasijje cahuiya. Mecajjeahua nei besapoqui'yonaje Shona nasi yasijje. Majoya besapoquinaje Patana cuiñajji yasijje. ²Patanajo ecuaaya pea bishe ai sa'ajjanaje Penisia meshi yasijje ebesapoquijji. Bishe ai jaa ba majje ecuana nequisohuaquinaje bishejo aninaje. Majoya besapoqui o'oyanaje. ³Besapoquijeya, Chipe nasi chipi nei besapoquijeya meshi banaje. Chipe nasi ai ebianeí mijijje yejjenaje Sinia meshi yasijje besapoquijeya. Tino cuiñajji bañaquí majje ba'eñaquinananaje. Ebishe ai meseya aquiana quea huiso nee bishejo ani jeasohuaqui canaje etaja huasijje. Pabo ecuana nijje etaja huasijje nequisohuaquinaje. ⁴Tino huasijje poquinaje Jesusaja epeeji cuana baa. Ba majje ona nijje nequinaje me oeje becanajjijji pea'ai cahuime, 7 cahuime. Edojjoshahua Pameya oya cuana Pabo huohui meesahua canaje jama ba'a: —¡Jenosanena huasijje poquijjo Jodio cuaa miya iña ca chana! Jamajjeya ¡a'a jocuama poquijji, Pabo! —acanaje cuaa.

⁵Jamatii bishe ai apoa poajo Pabo ecuana nijje poquinaje bishe yasijje. Jesusaja epeeji cuana, yahue cuana, ehuanase cuana, esho'iquiana pea'aiya bishe ai yasijje poquinaje ecuana nijje Pabo poquije'yo baa. Meshijajjijo, bae sahuajo Eyacuiñajji nijje ojee miminaje ecui'oshajjajo nequi majje. ⁶Majoya ecuana: —E'e, besapoquia iña —amajje bishe aijo ani o'oyanaje ebesapoquijji Ojjaña Jesusaja epeeji cuaa Pabo poquije'yo ba canequinaje. Majoya oya cuana equi cuana huasijje poqui o'oyanaje.

⁷Jamajjeya Tino cuiñajji jeana'yo majje ecuana besapoquinaje Tonemaina cuiñajji yasijje. Ba'eñaqui majje Jesusaja epeeji cuana jomajo ba'e baquinaje. Ojjaña nijje miminaje quea bihui nee. Ona nijje nequinaje oe cahuime. ⁸Majoya mecajjeahua nei ecuana poqui o'oyanaje bishe yasijje. Besapoqui o'oyanaje Sesanea huasijje. Ba'eñaqui majje esohui huohuijji Penipe bajjanija equi yasijje jaasohuaquinaje; onijje ba'enaje. Oya Penipe yahuajo nei Jesusaja epeeji cuaa Jenosanenajo ba'eya babaca canaje me oejje becanejjijji pea'ai, 7 pea cuana nijje Eyacuiñajjija echacojji epojji, e'ahuemano bobi quiajji. ⁹Penipeja ebeca pee pea'ai ebacuase ahuemana'ani, bii ani oja equijo ba'e. Oya cuana Eyacuiñajjija esohui huohuijji pea'ai poanaje. ¹⁰Pabo, Penipeja equijo oe pojji cahuime nequiyajo, Eyacuiñajjija esohui huohuijji poeyanaje Acabo bajjani, ma Jodea meshijo ba'e. ¹¹Pabo que poe majje Acabohua Paboya ejjacomayijji quijji jjeshe majje jjajiojji jeyoqui'yonaje, eme' cuana pea'ai. Majoya Pabo huohui canaje jama ba'a: —Edojjoshahua Pame enijje jama poanaje ba'a: “Jiquio ejjacomayijji quijji mese Jenosanena huasijje poqui'yajo jamaya Jodio cuaa oya jeyo caje'yo. Jeyo majje oya quia caje Jodio pojjeama huasijje; quea nee nee poaje” poanaje —Acabohua acanaje.

¹²Acabohua esohui shajja'ajja majje ecuaaya, pea epeeji cuaa jomajo ba'eya pea'ai Pabo pa'aniya tii huohuinaje jama ba'a: —Pabo ja'a oe poqui'yojji Jenosanena huasijje! Jodio cuaa miya iña ca chana' —poanaje.

¹³Jamatii Pabohua ecuana jama acanaje ba'a: —¿Apiojji acuae quiana pani so'o? ja'a eya quea yeno po meeji! Jodio cuaa Jenosanenajo ba'eya jeyo cajje mo mete'ama poaje. Emeshi Mese nei Jesosa nijje jjapeequianijjo onaa quecua ca'yajje, jamatii eya mete'ama —Pabohua acanaje.

¹⁴E'e, ecuaaya Pabo nahue'ajjanaje: —ja'a poqui o'oyajji! —amajamaja'ajjanaje.

Jamatii Pabo jama poanaje ba'a: —Chojja, eya jocuama capoquiahua. Jamaya yahuajo Edojjoshahua Pameya eya acanaje.

Jamajjeya ecuana jama poanaje ba'a: —E'e Pabo, ja'eyacuiñajjija ejjashahuabaquijji jayojja jama acue! —ecuana poanaje.

¹⁵Jamajjeya quea cahui huiso pishana Penipeja equijo ani majje ecuanaja aquiana cuana bio majje: —Epeeji cuana, poqui'ya iña —po majje ecuana Jenosanena huasijje poqui'yonaje ejjojijje. ¹⁶Jesusaja epeeji cuana Sesaneajo ba'e ecuana nijje poquinaje. Jenosanenajo nequiñaqui'yajo ohuaya ecuana dojo canaje Masonija equi yasijje ba'eya. Yahuajo Masoni Chipe nasijo ba'enaje. Oya Jesusaja epeeji poanaje yahuajo nei.

Pabo poquinaje Satiaco baa o'oya

¹⁷Ecuana Jenosanena huasijje poe'yajo, Jesusaja epeeji cuana ecuana ba majje quea bihui nee poanaje. ¹⁸Mecahuajje Pabo ecuana nijje poquinaje Satiaco baa. Jomajo ojjaña Jesusaja epeeji etii cuana, esohui huohuijji cuana pea'ai jjachichaquinaje. ¹⁹Pabo ojjaña nijje esohui quea bei nee miminaje. Ohua chaco canajejo huohui canaje jama ba'a: —Eyacuiñajjiya eya esohui quea pame nee Jesusajo Jodio pojjeama cuana huasijje huohui meesahua canaje. Eyacuiñajjiya ohuaye nei ma dejjaa ajjima acani eya ameesahua canaje Jesusaja esohui huohuiañajo —Pabohua acanaje.

²⁰Jesosaja epeeji etii cuaa Paboya esohui shajja'ajja majje Eyacuiñajji bihuia canaje. Pabo jama acanaje ba'a: —Jamaya quea pame nee, epeeji. ¡Bacue! Jjeyahua nei quea huiso nee nee, quea huiso mil Jodio cuana Jesosa nijje jjapeequiani. Jamatii Jodio cuaa ojjaña Jesusaja epeeji cuana huohui cani jama ba'a: “Moisesija etehue'yo jayojja jama acue!” acani. ²¹Pea cuaa oya cuana quea huiso sijje acani mijo. Jama acani ba'a: “Pabohua Jodio cuana Jodio pojjeamaja meshijo ba'e huohui cani jama ba'a: —¡Moisesija etehue'yo jayojja jama a'a ajji! ¡Jodio cuanaja etiiquianaja ehuhui'yo jayojja jama a'a pojji! ¡Miquianajaya bacua a'a cuiishasha jehuissejjajea meeji pea'ai! —acani Pabohua”. Jamaya onaaya mijo sijje acani, Pabo. Jamajjeya Jodio cuana jiquiojo ba'e minijje quea quene. ²²E'e jojo nei onaaya oya cuana huohui caje jama ba'a: “Pabo pa jjaja poe'yonaje Jenosanena huasijje”. Jamaya acajoya ojjaña cuana jjachichaquije. Majoya ¿yajja shai miya acaje, de? ²³Jamajjeya ¡ecuanaja esohui jayojja jama acue, Pabo! —poanaje Satiaco—. Jiquiojo yani ebeca pee pea'ai Jodio dejja Eyacuiñajji nijje miminaje. Ma ecua oya yahuajo Eyacuiñajji nijje miminaje jama amajje huojjaña dedejea mee caje. ²⁴Jamajjeya ¡onijje poquicue Eyacuiñajji equi quea quemo huasijje! ¡Esejaya etiiquiana Moisesija etehue'yo jayojja jama acue quea boejea'yo jayojja epojji, ona nijje! ¡Ojjañaja huojja dedejea jjimahuajo sosequiacue! ¡Miyaya onajaya huo cuana jjeshecue! ¡Jjeshe majje dahua meecue Eyacuiñajji bihuiajji! Jamajjeya ojjaña Jodio dejja cuaa ba caje miya pea Jodio cuana jayojja jama poani. Moisesija etehue'yo jayojja jama poani pea'ai. ¡Jamaya ojjaña ba meecue pea cuaa mijo sijje acanaje! —poanaje—. ²⁵¡Jodio pojjeama Jesusaja epeeji poani ca ca Moisesija etehue'yo jayojja jama a'a ameeji! Chojja. Yahuajo eseyaya Jodio pojjeama huasijje esohui tehuenaje jama ba'a: “¡Noe ma onaa dahua canaje eyacuiñajji nisho bihuiajji'ya a'a ijjiiajji! ¡Noe na' cuaya meequi jjima a'a ijjiiajji! ¡Ijjiacajji na' a'a ishijji pea'ai! ¡A'a pea cojjojji pojji!” jamaya yahuajo eseyaya Jodio pojjeama cuana huasijje tehuenaje, mahuiso —jamaya acanaje Satiacohua.

²⁶Jamajjeya mecajjeahua nei Pabohua ma Jodio dejja cuana nijje poquinaje Eyacuiñajjija equi quea quemo huasijje. Ejiojji cuana, eme cuana pea'ai topo neinei canaje. Majoya oya cuana Eyacuiñajjija equi quea quemo huasijje dobiquinaje. Eyacuiñajji nijje emimijji huohui canaje jama ba'a: —Oe pojji cahui po majje, ecuana quea boejea nee nee po majje eyaya huo jjesheje ecuea, ecue epeeji cuanaja pea'ai. Jiquiacua yeje, dahua meeje Eyacuiñajji bihuiajji —Pabo poanaje.

Pabo iña canaje cuaa Eyacuiñajjija equijo nequi

²⁷Me oeje becanejjiji pea'ai, 7 cahui po majje Pabo oja epeeji cuana nijje poqui o'oyanaje Eyacuiñajjija equi quea quemo huasijje. Moisesija etehue'yo jayojja jama ponequinaje. Pabo Eyacuiñajjija equijo nequi Jodio dejja cuaa Asia meshijo ba'eya oya ba canaje. Oya cuana Pabo nijje quea quene nee poanaje. Ojjaña cuana Pabo nijje quea quene nee po mee canaje. Pabo iña mee canaje cuaa. ²⁸Oya cuana taanaje. Jama siajje pome poanaje Pabojjo ba'a: —Isaeni dejja cuana, ¡pocue! ¡Jiquio dejja mo ñasahua meecue! Ohuaya ojjaña meshi yasijje poquijeya huohui canananaje jama ba'a: “¡A'a Moisesija etehue'yo jama pojji!” Ohuaya Eyacuiñajjija equi niñeba cani. Isaeni cuana niñeba cani pea'ai. Jyehua nei ohuaya Jodio dejja pojjeama dojodobiaqui canaje Eyacuiñajjija equi yasijje. Jamaya ohuaya jiquio equi quea jehue jayojja po mee cani —jamaya Pabojjo siajje poanaje Jodio cuana. Jama mimime po majjeya Pabo iña canaje.

²⁹E'e, yahuajo onaaya Topimo ba canaje Pabo nijje Jenosanenajo nequi. Topimo aje oe Jodio pojjeama, Epesojo ba'e. Oya Eyacuiñajjija equi quea quemo huasijje dobiqui jjima. Jamatii Jodio cuaa Pabohua Jodio pojjeama Topimo bajjani Eyacuiñajjija equi quea quemo huasijje dojodobiaqui canaje poso acanaje. Jamajjeya quea quene nee nee poanaje. ³⁰Jamajjeya quea huiso Jodio cuana Jenosanenajo ba'e cuajicuajjibenaje Pabo que. Miminaanaa majje Pabo iña canaje. Dojocuayaqui canaje Eyacuiñajjija equi secue jjani yasijje. Pabo dojocuayaqui cajo, esecue ca'a canaje. ³¹Oya cuana quea quene nee nee, quea mase nee nee poanaje. Pabo sapa jahuejjajea sa acanaje meiya. Onaaya ca ca Shomano emeshi meseja sohuinano huoojeajji poani que cuajicuajjipoquinaje; huohuiqui canaje jama ba'a: —¡Bacue oe! Ojjaña Jenosanenajo ba'eca quea shajjaquijjo nee nee poani, cuajicuaji canaje jjachichaquiequi baa —poanaje.

³²Jamajjeya sohuinano huoojeajjiya pea sohuinano huoojeajji cuana, sohuinano cuana pea'ai iyaa majje dojocuajicuaji canaje Jodio cuana quea quene jjachichaquiequi yasijje baa. Sohuinano cuana, sohuinano huoojeajji nijje poeje ba majje Jodio cuaa Pabo cuia pajea canaje.

³³Sohuinano huoojeajjiya Pabo que poe majje oya iña mee canaje. Jeyo mee canaje baa jono becaa. Majoya Jodio cuana huohui'ajja canaje: —¿Ae bajjani oya? ¿Yajja acuae jja so'o? ¿Yajjajo acuae jjaya cuiaña?

³⁴Beca Jodio cuaa oe esohui huohui canaje. Pea cuaa pea esohui huohui canaje. Ojjaña quea shajjaquijjo poanajo, sohuinano huoojeajjiya shajja'ajja meeme ajja

ae shai Pabohua acanaje. Jamajjeya ohuaya sohuinano cuana huoojea canaje Pabo do johua sohuinano cuanaja equi quea quemo huasijje. ³⁵Sohuinanoja equi ejiojji ejaasohuaquijji yasijje poeyajo, Jodio cuaa Pabo iña sa acanaje. Jamajjeya sohuinano cuaa oya jjequisohua majje dojo canaje equi yasijje. ³⁶Jodio cuana sohuinano huoojeajji quiquishijji poeje taaajebenaje jama ba'a: —¡Quecuajeacue oe! ¡Quecuajeacue oe! ¡Camano'yahua oya! —taaame pojebenaje.

Pabohua Jodio equenequene cuana saja'a canaje

³⁷Sohuinano cuaa oya equi quea quemo huasijje beshahua nei ohua do jodobiaqui caniya Pabohua sohuinano huoojeajji jama acanaje ba'a: —Eya minijje mimi sa poani.

Ohuaya Pabo saja'a canaje jama ba'a: —¿A'a miquea Jieno cuanaja esohui eba? ³⁸Jamajjeya miya Ejito dejja quea mimishi pojjeama, ma yahuajo emeshi mese quecuapanajji epo pojjeama. Ohuaya quea huiso nee nee, ebeca pee pea'ai mil dejja emeje do joji cuana quehua dojo canaje meshi quima huasijje. Ojo onaya ojjaña quea mete poanaje. ¿A'a miya oya pojjeama? —acanaje sohuinano huoojeajjiya.

³⁹Pabohua jama acanaje ba'a: —Chojja. Eya Jodio, Sinisia meshijo ba'e. Eya Tanasojo cuaya. Jomajo tiinaje. Ma cuiñajji quea quemo, ojjañaja eba. ¡Che mo jjeya eya mimi meecue Jodio cuana nijje! —Pabohua acanaje.

⁴⁰Jamajjeya sohuinano huoojeajjiya Pabo saja'a canaje jama ba'a: —¡E'e, mimicue! —acanaje.

Majoya Pabo nequinaje ejiojji ejaasohuaquijjiyo. Eme jeasohua canaje. Ojjaña cuana tanacua canaje. Tanacua'yo majje Pabo miminaje Jodio cuana nijje ojaya esohuijo, Emeoja esohuijo.

22 ¹Pabohua jama acanaje ba'a: —Ecuea epeeji cuana, etii cuana pea'ai, ¡shajja'ajjacue mo! Eyaya miquianaya huohuije —acanaje.

²Pabo onajaya esohuijo, Emeoja esohuijo mimiani shajja'ajja majje ojjaña Jodio cuaa jecaje canaje. Jamajjeya Pabo miminaje jama ba'a: ³—Eya Jodio miquiana jayojjaya. Tanasojo eya cuayanaje, Sinisia meshijo. Majoya Jenosanena huasijje poeyanaje esohui huohuijji Jamanie bajjanija esohui baa. Ohuaya eya sohuihuohui canaje. Jiquiojo eya tiinaje. Jamanieya Eyacuiñajji esohui esejaya etiiquianaja eya sohuihuohui canaje. Eya Eyacuiñajji epeeji poanaje. Joya ecua miquianaaya jjeya bihuiaña jayojja jama eyaya Eyacuiñajji bihuanaje. ⁴E'e, yahuajo eyaya Jesusaja epeeji cuana iñanaje Jesusaja esohui ehuohui ca poani jjejojo. Ejjajejanobiaquijji yasijje jeanobiajeanaje dejja cuana, epona cuana pea'ai. Oya cuana mano mee'yo sa anaje eyaya. ⁵Jodio etii cuanaja, joya Eyacuiñajji nijje miminequianija eba ecuea esohui e'e nei. E'e, ohuaya eya esohui etehue'yo quia canaje Jodio dejja Damascojo ba'e yasijje equiajji jama ba'a: “¡Pabo Jesusaja epeeji cuana iña meesahuacue! ¡Jeyo meesahuacue cadenaaa Jenosanena huasijje edojji, ejeanobiajeajji Jesusaja esohui huohuijjiyo!” jamaya Jodio etiiya tehue canaje —Pabo poanaje.

6—Majoya Damasico chipi nei nequiñaqui majje eshequi biacojjajja nequijo eyajo ejijijji quea ja'a neeya eya jeaja'a canaje. 7Eya quea ajjajja jjejojo oquequinaje meshi yasijje. Majoya eyaya shajja'ajjanaje eyajo enijje mimije jama ba'a: “Sanoni, Sanoni, ¿apiojji acuae miyaya eya napaña so'o?” eyajo aniya eya acanaje. 8“¿Ae bajjani miya?” eyaya anaje. “Eya Jesosa, ma Nasanenajo ba'enaje. Miyaya aje oe eya napaña” acanaje Jesosaa eyajo aniya.

9—Dejja cuaa enijje poquianiya ejeajijijji quea ja'a nee ba canaje. Onajaya ca ca Jesusaja esohui enijje shajja'ajja jjima, ojaya quea quehua. 10Majoya eyaya huohui'ajjanaje: “Emeshi Mese nei, ¿ae sa poani miya?” Ohuaya eya saja'a canaje jama ba'a: “¡Nequisohuacue! ¡Damasico huasijje poquicue! Jomajo peaa miya huohui caje miquea echacojji ma miyaya ejo quijje aje. ¡Ma esohui jayojja jama acue ejo!” eya acanaje.

11—Majoya eya nequisohua'yonaje; cojjama!. Jesusaa jeaja'a cajje cojja quijjo'yonaje. Jamajjeya ecuea epeeji cuaa eya mepejjejea canaje Damasico huasijje.

12—Jomajo oe dejja Anania ba'enaje. Ohuaya Moisesija etehue'yo jayojja jama atitii canaje. Oya ojjaña Jodio cuanaja quea boti nee poanaje, Damasicojo ba'aja. 13Ohuaya e jaa huasijje poe majje eya huohui canaje jama ba'a: “Ecuea epeeji Sanoni, ¡quea cojja ja'a po o'oyacue!” Ohua huohui cajje jjeyahua nei eya quea cojja ja'a po o'oyanaje. Anania banaje eyaya. 14Majoya ohuaya eya jama acanaje ba'a: “E'e, Eyacuiñajji esejaya etiiquianaa bihuia ca poa. Ohuaya miya babaca ca poa oja huoojea'yo ojjaña jaahuanajji quea pame nee nee baa. Jjeyahua nei miyaya oya, Jesosa shajja'ajjanaje; minijje miminaje. Eyacuiñajjiya miya ba mee caje ojaya ejjashahuabaqui'yojji pea'ai. 15Ma miya jjeya banaje, ma miya shajja'ajjanaje pea'ai miya huohui meesahua caje Eyacuiñajjiya ojjaña cuana ojjaña meshijo ba'e yasijje. 16Jamajjeya ¡ja' a ishoa majajji! ¡Jjeya nei Eyacuiñajji nijje mimicue miquea mimishijo! ¡Jesosa nijje jjapeequi'yocue! Ohuaya miquea mimishi cuana cuijea caje'yo. Majoya eyaya miya besa meeje Eyacuiñajjijo” eya acanaje Ananiaa.

17—Majoya eya poe o'oyanaje Jenosanena huasijje. Poe majje eya poquinaje Eyacuiñajji equi quea quemo huasijje onijje mimiya. Eyacuiñajji nijje mimianijo, Jesusaa eya jjacahuibaqui mee canaje. 18Ohuaya eya jama huohuime acanaje ba'a: “¡Jenosanena esecue yasijje poquicue jjeyahua nei! Jiquiojo ba'e cuaa miquea esohui ejo shajja'ajja jjima acaje” eya acanaje. 19“Jesosa” eyaya oya saja'anaje, “miquea eba yahuajo eyaya Jodio cuanaja equi ejjachichaquijji yasijje dobiqui majje, miquea epeeji iña majje jeyonaje baa jjonohua. Cuiasejjajejanaje. 20Yahuajo pea cuaa miquea esohui huohuijji Estema sapa jajahuejjajea canajejo, eyaya chipi nei nequiya banequinaje. E'e, oya cuana Estema nijje quea mase poanijo eya quea bihui nee poanaje pea'ai. Dejja cuaa oya sapa jajahuejjajea canijo, eyaya onajaya daqui ao jaahuananaje, Estema sapa jajahuejjajejji epo cuanaja daqui” jama saja'ameya eyaya Jesosa anaje. 21Majoya Jesusaa eya huoojea canaje jama ba'a: “¡Poquicue, Pabo! Eyaya miya huoojeaje quea huesha nee Jodio pojjeama cuana huasijje esohui huohuiya ejo” eya acanaje Jesusaa —Pabo poanaje.

Sohuinano huoojeajjiya Pabo nahue canaje

²²Jodio cuaa Paboya esohui shajja'ajja canaje. Ojaya esohui Jodio pojjeamajo oya cuana shajja'ajja sa po ajja. Quea quene nee poanaje. Janobajjima nei taaa o'oyanaje jama ba'a: —¡Oya dojo'yocue! ¡Oya quecuajeacue oe! ¡Oya quea taijo quecuajeacue! —taaame poanaje Jodio cuana.

²³Jodio cuaa quea queneya jjejojo daqui jeasohuajea canaje eyahuasijje. Meshi pohui jeasohuajea canaje pea'ai. Taaa neineinaje. ²⁴Jamajjeya sohuinano huoojeajjiya sohuinano cuana huoojea canaje jama ba'a: —¡Pabo eyiye dojo huasijje dojecue! ¡Oya janobajjima nei cuiacue! ¡Achajja oya ba'e ba'ajja socue! ¡Yajjajo Jodio cuaa oya niñeba cani ba'ajja socue! ¿Ajeo quea quene nee nee taaani? ¡Ba'ajja socue! —acanaje sohuinano huoojeajjiya.

E'e, oya jshahhuabaquinaje jama ba'a: —Pabo sijje poani. Eya cuiajje oya sijje popajeaje —poso acanaje sohuinano huoojeajjiya.

²⁵Jamajjeya sohuinano cuaa Pabo jeyo canaje ecuiasejjajajji. Jeyo cajo Pabohua sohuinano huoojeajji quea chipi nee nequi jama acanaje ba'a: —Eya miquea ba jjima. Eya Shomano dejja pea'ai. Jamajjeya emeshi meseya miquianaya eya cuia mee ajja quea mimishi po jjimajojo, achajja eya ba'e ba jjimajojo. Jamaya emeshi meseja esohui —Pabohua acanaje.

²⁶Ma shajja'ajja majje ma sohuinano huoojeajji quea mete poanaje. Poquicuajinaje sohuinano huoojeajji etii huohuiya. Jama huohuiñaquime acanaje ba'a: —¡Bacue! ¿Apiojji acuae miyaya jiquio dejja Pabo napa meeña so'o? Oya ca jja ca oma Shomano dejja, de —acanaje.

²⁷Jamajjeya sohuinano huoojeajji etiiya ma shajja'ajja majje metenaje, Pabo que poquicuajinaje. Oya huohui'ajja canaje jama ba'a: —¿A'a miya Shomano dejja e'e jojo nei? ¡Huohuicue mo oe!

—E'e —Pabohua oya saja'a canaje—, eya Shomano dejja, de.

²⁸Majoya sohuinano huoojeajji etiiya jama acanaje ba'a: —E'e pojja'a, de. ¡Bacue! Eyaya quea huiso bejjo quia majje Shomano dejja po'yonaje. Sosequianaje quea huiso nee nee, de —acanaje ohuaya; oja chii Shomano dejja pojjeamajojo oya pea.

Jamajjeya Pabohua jama acanaje ba'a: —Ecuea ca ca ecue chii Shomano dejja poanaje. Jamajjeya eya ca ca Shomano dejja cuayanaje —acanaje Pabohua.

²⁹E'e de, sohuinano cuaa beshahua nei Pabo cuiasejja canaje. Ma shajja'ajja majje ca ca ohuaya Pabo pichojea ca'yonaje. Oya Pabo Shomano dejja ba majje sohuinano huoojeajji quea mete nee poanaje ecuiajji. Jamajjeya ojaya esohuijo pea cuaa Pabo jeyo canaje baa jjonohua. Jamaya Shomano dejja ameemee ajja achajja oya ba'e ba jjimahujajo.

Pabo Jodio etii cuana nijje mimi o'oyanaje

³⁰Majoya mecajjeahua sohuinano huoojeajji ba sa poanaje jama ba'a: —¿Ajeo shai Pabo nijje Jodio cuana quea quene nee nee poanaje?

Jamajjeya mecajjeahua ohuaya Pabo pichojea mee canaje ma ejeanobiajaa ejeyo nequi. Majoya ohuaya Jodio cuana Moisesija esohui etehue'yo huohuijji poani, Eyacuiñajji nijje emimijji cuana pea'ai iyaa canaje. Jjachichaqui'yajo, sohuinano huoojeajji etiya Pabo dojo canaje esecue yasijje Jodio cuana nijje mimiya. Pabo mete'ama nequinaje. Dejja cuana cojja ba canaje mete'amaa jjejojo.

23 ¹Pabohua Jodio etii quea huiso cuana cojja ba majje jama acanaje ba'a: —Epeeji cuana, ¡shajja'ajjacue mo! Eyacuiñajjija eba eya mimishi'ama ba'enaje yahuajo, jjeja pea'ai. Jamajjeya eya bicho'ama.

²Ma shajja'ajja majje Eyacuiñajji nijje mimiani etiya Ananiaa pea Pabo chipi nei nequi jama acanaje ba'a: —¡Joya Pabo naba cuiasejjajecue miyaya!

³Jamajjeya Pabo onijje jama poanaje ba'a: —Eyacuiñajjiya miya cuia caje pea'ai. Miya ejjadasiaquiiji. ¿Apiojji acuae miya Moisesija etehue'yo jayojja jama po ajja? Miyaya eya pea cuia meeaña. Jamaya pojjeama Moisesija etehue'yo —Pabo poanaje.

⁴Pea Pabo chipi nei nequiya oya jama acanaje ba'a: —¡A'a jja oe Eyacuiñajji nijje mimiani etii nijje mimijajijji, de!

⁵Pabohua majoya ojjaña saja'a canaje jama ba'a: —Epeeji cuana, ecuea ba jjima oya Eyacuiñajji nijje mimiani etii. E'e, Eyacuiñajjija esohui etehue'yo jama poani ba'a: “¡Miquea emeshi mese nijje a'a mimijajijji!” —Pabohua acanaje.

⁶Pabojja eba quea huiso Jodio cuana jomajo nequi Sanoseo cuana poanaje. Pea cuana ca ca Paniseo cuana. Jamajjeya Pabohua etii cuana jama acanaje ba'a: —Epeeji cuana, eya Paniseo. Ecue chii Paniseo poa. Paniseoja esohui jayojja jama eyaya huohuiaña jama ba'a: “Quijje Eyacuiñajjiya emano'yo cuana shequi mee caje o'oya. Ojjaña cuana eshe o'oya poaje”. Jama ehuhui poaje jjejojo eya pea cuaa iña canaje —Pabohua acanaje.

⁷Pabojja esohui shajja'ajja majje Paniseo cuana jjamimicuiajejanobiajea neineiquinaje Sanoseo cuana nijje. ⁸Paniseo jayojja jama pojjeama Sanoseo cuana aje oe jama poani ba'a: “Dejja cuana mano'yo majje eshequi o'oyajji pojjeama tii. Chama' Eyacuiñajjija esohuidojojji cuana”. Oya cuana poani: “Eshahua cuana chama' pea'ai” jamaya Sanoseo cuaa huohui cani. Paniseo cuaa ca ca jama acani ba'a: “E'e jojo nei ojjaña eseya shequi mee caje o'oya. Eyacuiñajjija esohuidojojji cuana enequi, de. Eshahua cuana enequi pea'ai” jamaya e'e jojo nei huohui cani Paniseo cuaa. ⁹Jamajjeya Jodio etii cuaa quea shajjaquiijo nee nee mimicuiajejanobiajea canaje. Majoya Moisesija etehue'yo huohuijji cuaa, Paniseo cuaa nequisohua majje jama taaame acanaje ba'a: —Jiquio dejja Pabo mimishi'ama. E'e pojja'a Eyacuiñajjija esohuidojojji onijje miminaje e'e jojo nei. ¡A'a oya napajji! —taaame poanaje.

¹⁰Majoya ojjaña Jodio etii cuana janobajjima nei jjamimicuiajea nobiajeaquianijo, esohuinano mese quea mete poanaje. Pabo nahue canaje; sohuinano cuana huoojea canaje Pabo dojoya sohuinano cuanaja equi quea quemo huasijje: —E'e de, Jodio cuaa Pabo jajahuejjajea ca chana', de, meiya —sohuinano cuana poanaje.

¹¹Mecajje Emeshi Mese nei Jesosa eyajo nequi nequioquenaje Pabo que. Oya miminaje Pabo nijje jama ba'a: —Pabo, ja'a quea mete pojji! Jenosanenajo miya ecuea esohui huohuijji poanaje. Quijje miyaya ecuea esohui huohuiquije quea huesha nee, Shoma cuiñajji yasijje —acanjaje Jesosaa.

Jodio cuana ojee jjashahuabaquinaje Pabo quecuajji

¹²Majoya mecajjeahua nei Jodio dejja cuana jjachichaquinaje. Ojee jjashahuabaquinaje Pabo quecuajji. Quea huiso cuaa jama acanjaje ba'a: —E'e jojo nei Pabo cuiajea jjimahuaajo ecuaaya ena e'ishijji pojjeama, bobi cuana e'ijjiajji pojjeama, Pabo cuiajea'yo majje ecuaana ijji'a'ijjiaje'yo. Siajje poani jjemoya aje ca iña oe Eyacuiñajjiya ecuaana mano mee ca'yome —acanjaje cuaa jjashahuaba taiqui majje.

¹³E'e, quea huiso nee nee dejja cuaa jamaya acanjaje, 40 huisomeya. E'e pojja'a pea cuaa jamaya acanjaje pea'ai, ecuea ba jjima. ¹⁴Majoya Eyacuiñajji nijje mimiani etii que, Jodio etii cuana que pea'ai poqui majje huohui cañaquinaje jama ba'a: —E'e, ecuaaya ena ishi jjimahuaajo, ijji'a'ijji jjimahuaajo pea'ai Pabo cuiajea neineje'yo. Pabo cuiajea jjima yajji jojjemo aje ca iña oe Eyacuiñajjiya mano mee ca'yomeya. ¹⁵Jamajjeya imiquianaaya, etii cuaa pea'ai esohuinano mese dasiacue! Jama nisho acue ba'a: “¡Pabo jjequi o'oyacue! Ecuaaya oya ba o'oya sa aña, oja sohui eshajja'ajjajji” nisho acue. Majoya oya jjequi cajo, ecuaaya Pabo cuiajeaje, sapa jajahuejjajaje meiya jiquiacua poe jjimahua —acanjaje dejja mimishi cuaa.

¹⁶Paboya jjo'yaseja ebacua ejjaa, oja boeya ca ca shajja'ajja canaje Jodio cuaa Pabo sapa jajahuejjajaje caje'yo. Jamajjeya Paboya boeya sohuinano cuanaja equi quea quemo huasijje dobiqui majje Pabo huohuiqui canaje Jodio cuanaja esohui. ¹⁷Majoya Pabohua sohuinano huoojeajji iyaa majje huohui canaje jama ba'a: —¡Jiquio esho'i ecue boe dojoya sohuinano etii que! Oya esho'i onijje mimi sa poani.

¹⁸Majoya sohuinano huoojeajjiya esho'i dojoya canaje esohuinano mese que. Poe majje jama acanjaje ba'a: —Pabohua eya iyaa canaje. Ohuaya jiquio esho'i huoojea canaje mi que. Oya minijje mimi sa poani.

¹⁹Esohuinano meseya esho'i mepejjejea canaje dejja chama huasijje. Majoya oya jjapashineijje huohui'ajja canaje jama ba'a: —E'e, ¿ae shai miyaya eya huohui sa aña? —acanjaje.

²⁰Esho'ia jama acanjaje ba'a: —Jodio dejja cuana ojee miminequinaje. Mecahuajje pa miya dasia caje pa. Miya pa jama anisho caje ba'a: “¡Pabo jjequi o'oyacue Jodio etii cuana huasijje! Ecuaaya oya ba o'oya sa aña” jamaya miya siajje acaje pa. ²¹Jamajjeya ja'a oya cuana shajja'ajjajji! Quea

huiso nee nee, 40 huisome ejja'aniquehuaqui ani ejiojji sahuajo Pabo cuiajea'yojji. E'e, oya jama poanaje ba'a: "Ena ishi jjima amajje ijia'ijjia jjima po majje pea'ai ecuaaya Pabo cuiajeaje'yo. ¡Pabo cuiajea jjima yayji jojjemo Eyacuiñajjiya ecuaana napa ca'yome!" jama mimimeya poanaje. Jjeya nei miya isho'ajja cani cuaa. Jama poani ba'a: "E'e, jjeyahua nei esohuinano meseya Pabo jjequi caje ba'ajja" poani oya cuana —jamaya esho'i poanaje.

²² Majoya esohuinano mese jama poanaje ba'a: —E'e, jamajjeya ecuea eba pea cuaa eya edasiajji nisho acaje ma e miya huohuinaje. ¡A'a oe huohuijji cuana!

Jamaya huohui majje ohuaya esho'i quehuajje huoojea canaje equi yasijje.

Pabo huoojea canaje Shomano emeshi meseja huoojea Peni ani yasijje

²³ Majoya esohuinano meseya iyaa canaje beca sohuinano huoojeajji. Poeyajo jama huohuime acanaje ba'a: —¡Miquea aquiana cuana, sohuinano cuanaja aquiana pea'ai chichacue epoquijji! ¡Mecajje quea misi nee poajo, poquicue Sesanea cuiñajji yasijje! ¡Quea huiso nee nee, 200 huisome sohuinano cuana ejiojjijje dojocue! ¡Pea sohuinano quea huiso nee mejejji dojocue pea'ai! ¡Pea sohuinano cuana mapichi aija edaasa biajje ani dojocue minijje pea'ai, 70 huisome! ²⁴ ¡Pabo dojocue pea'ai pea mapichi aija edaasa biajje ani! ¡Oya Pabo dojocue emeshi meseja huoojea que, Peni que! ¡Pabo jaahuana neineicue! ¡A'a Jodio cuana oya napa meejji! —acanaje esohuinano meseya, Canio Nisia bajjaniya.

²⁵ Majoya esohuinano meseya esohui tehue canaje Penija ebajji jama ba'a:

²⁶ "Emeshi meseja meshi cuiñajji Peni: Ecuea epeejji Peni, mijo eya quea bihui nee. Eyaya, Canio Nisiaa jiquio esohui tehuenaje miquea ebajji jiquio dejjajo, Pabojo. Jama poa ba'a: ²⁷ Jodio cuaa jiquio dejja Pabo bajjani iña canaje. Beshahua nei oya cuiajea ca'yonaje cuaa. Oya Shomano dejja ba majje eyaya oya nahuenaje; sohuinano cuana huoojeanaje o nahuejji.

²⁸ Eya ba sa poanaje apiojji Jodio cuana onijje quea quene nee nee poanaje. Jamajjeya eyaya oya dojonaje Jodio etii cuana que. ²⁹ Jodio etii cuanaja esohui shajja'ajja majje eyaya banaje Pabo mimishi'ama, de. Mimishi po jjiimajo Jodio cuana oya sapa jajahuejjajee mee jjima anaje meiya; jeyo mee jjiima anaje ejanobiajjeajji. Oya Shomano dejja. Paboya ehuohuijo ca ca oe Jodio cuana onijje quea quene nee nee poanaje. Onijje mimijajinaje Jodio cuanaja etiiquianaja ehuohui'yojo, ma ohua huohui canijo. ³⁰ Majoya Jodio cuaa eya dasia majje Pabo quehuajje sapa jajahuejjajee sa acanaje. Ma ba majje eyaya oya huoojeanaje mi que. Jodio dejja cuana, Pabo huohuijji epo, eyaya huoojeaje mi que pea'ai. ¡Miyaya oe huohui neineicue ache acue oe quea mimishi poani! Mahuiso ecuea esohui, epeejji Peni. Eyaya, Canio Nisiaa ecue sohui tehuenaje miquea ebajji. Apoa".

Jamaya tehue canaje. ³¹ Tehue majje esohuinano meseya Caniohua oja tehue huoojea canaje emeshi mese Peni que.

Jamajjeya sohuinano cuaa Canioja ehuohui'yo jayojja jama acanaje; Pabo dojo canaje mecajje Atipati cuiñajji yasijje cahuiya. ³²Majoya mecajjeahua nei sohuinano mapichima' huacuaya poe o'oyanaje Jenosanena huasijje, sohuinano cuanaja equi quea quemo huasijje. Joya mapichijjiya ca ca oe Pabo dojo canaje Sesanea huasijje. ³³Sesanea huasijje poe majje Shomano emeshi meseja huoojeaja equi yasijje, Penija equi yasijje nequiñaquinaje. Majoya sohuinano cuaa Pabo quia canaje Peni que. Esohuinano mese Canioja esohui etehue'yo pea'ai quia canaje. Majoya oya cuana poqui'yonaje. ³⁴Canioja esohui etehue'yo ba neinei majje Peniya Pabo huohui'ajja canaje jama ba'a: —Pabo, ¿ache meshijo ami ba'e, ache mijijje?

—Eya ca ña Sinisia meshijo ba'e —saja'ame acanaje Pabohua.

³⁵—E'e. Jamajjeya Jodio cuana ma mi huohuijji epo poeyajo, eyaya miquea esohui shajja'ajjaje —poanaje Peni.

Majoya Peniya pea sohuinano cuana iyaa canaje. Poeyajo jama huohuime acanaje ba'a: —¡Bacue! Jiquio dejja Pabo bajjani. ¡Oya emeshi mese Enodeja equi quea quemo neejo jaahuana neineicue! ¡Nahuecue oe! —acanaje.

Jodio cuaa emeshi mese Peni siajje acanaje Pabobo

24 ¹Majoya me oejje cahuime po majje Jodio Eyacuiñajji nijje mimiani etii Anania poquinaje Sesanea huasijje Pabo niñebaa, Pabo huohuiya. Jodio etii quea huiso pishana Anania nijje poquinaje. Pea dejja, emeshi meseja etehue bajji poani Tetono bajjani onijje poquinaje pea'ai. Sesaneajo nequiñaqui majje oya cuana emeshi meseja huoojea Peni ba cañaquinaje. Majoya oya cuana Pabobo mimimiminaje. ²Majoya Peniya Pabo iyaa canaje. Poeyajo Tetonohua huohui canaje jama ba'a: —Emeshi mese Peni, miya quea ca'a, quea pame nee, ecuea epeeji pea'ai. Miya ecuana huoojeajji quea pame nee. Quea huiso shequiaja miquea esohuijjo ojjaña quea bei po meenaje jiquio meshijo. Quea huiso dejja mimishi miyaya jjabahuejjaqui meenaje. Jamajjeya ecuana jiquio meshijo quea pame nee ba'yani. ³E'e, miyaya quea pame añajo, ecuana quea bhui nee poani, ojjaña cuiñajji ba'eca cuana pea'ai. Miya ecuanaja quea boti nee. ⁴Miquea pea echacojji quea huiso yanijo eyaya oe pojji esohui huohuije. Jamajjeya ¡ecuea esohui che shajja'ajja socue! —poanaje Tetono—. ⁵Jiquio dejja Pabo quea mimishi nee po tiitiani. Jodio cuana ojjaña meshijo ba'e quea quene nee nee po mee cani. Ohuaya Jesusaja ma Nasanenajo ba'ya poaja esohui huohui majamaja cani. E'e, oya Jesusaja epeeji cuana huoojeajji poani. ⁶Ohuaya ca ca Eyacuiñajji equi quea quemo quea jehue jayojja acanijo, ecuanaaya oya ñanaje. Jodio cuanaja etiquianaja tehue jayojja jama oya amee sa anaje; ohua huohui tai canijo oya sapa jajahuejjajea sa anaje. ⁷Jamatii esohuinano mese Canio Nisia cuajicuajjebenaje Pabo nahueya; Pabo dojo canananaje. Oya quea quene nee nee poanaje ecuana nijje, de. ⁸Majoya Canio Nisiaa ecuana mi que huoojea canaje Pabo huohuiya. E'e, Pabo nijje mimi majje miyaya baje ecuanaja esohui e'e nei —acanaje Tetonohua.

⁹Majoya pea Jodio deja cuaa Peni siajje aca o'oyanaje Pabojo jama ba'a: —E'e jojo nei Tetonoja esohui Pabojo e'e nei. Pabo quea mimishi nee nee poanaje —Peni acanaje cuaa.

Pabohua emeshi mese Peni huohui ca'yonaje ojaya eba'ejjijo

¹⁰Majoya Peniya Pabo jama acanaje ba'a: —E'e pojja'a. ¿Pabo, yajjajje acuae minijje quea quene poani cuana so'o? ¡Huohuicue mo oe!

Jamajjeya Pabohua jama acanaje ba'a: —Emeshi mese Peni, ecuea eba miya jiquio meshijo ona huoojeajji poani quea shequiaja huiso. Jamajjeya ojjaña miquea eba. Jamajjeya ecuea eba'ejjijo eyaya mete'ama huohuije. ¹¹Miquea eba ecuea esohui e'e nei. Jjeya nei eya Jenosanena huasijje nequiñaqui o'oyanaje Eyacuiñajji bihuiaa ome miji pea'ai beca cahuime poanaje. ¹²Jodio deja cuaa eya ba canaje Eyacuiñajjija equijo nequi. Eya ca ca ña deja nijje jjamimicuiajea nobiajeaqui ajja. Ecuea Jodio cuana quea quene po mee jjima Jodioja equi ejjachichaquijjijo ani, ejiojji cuanajo nequi pea'ai, equi cuanajo ani pea'ai. Jama ajjima Jenosanenajo ecuea cuana. ¹³Ojjaña eba Jodio cuana ejo siajje poani. Eya mimishi'ama. ¹⁴Jodio cuanaja etiiquiaa cuaa Eyacuiñajji bihuia ca poa. Eyaya Eyacuiñajji bihuiaña pea'ai. Jamatii eyaya Jesosaja esohui jayojja jama ña pea'ai. Jiquio Jodio cuana ca ca siajje poani jama ba'a: “Jesosaja esohui etiiquianaja esohui jama pojjeama” jama poso acani. Chojja, ecuanaja etiiquiana Moisesija etehue'yo jayojja jama ña; Eyacuiñajjija esohui huohuijji yahuajo nei ba'e cuanaja esohui etehue'yo jayojja jama ña pea'ai eyaya. Ohuaya jayojjaya eyaya jama huohuime ña ba'a: ¹⁵Ojjaña eseya mano'yajo quijje Eyacuiñajjiya shequi mee caje o'oya; mimishi cuana, deja quea pame poani cuana pea'ai eshe poaje o'oya. Ecuea eba, jiquio Jodio cuanaja eba pea'ai Eyacuiñajjiya jamaya acaje'yo. ¹⁶Jamajjeya eya quea pame nee ba'e sa tii poani. Eyacuiñajjija eba eya mimishi'ama. Jiquio Jodio cuanaja eba pea'ai eya bicho'ama, mimishi'ama —Pabo poanaje.

¹⁷—Eya pea meshi cuana huasijje poquinaje esohui huohuiya. Quea huiso shequiaja po majje jjeya eya quea huesha nequi Jenosanena huasijje poe o'oyanaje. E'e, Jesosaja epeeji cuana pea meshijo ba'eca cuaa ejjesheji huoojea canaje Jodio aema' cuana bobiaa. E'e, eyaya maya ejjesheji ye majje Jodio cuana quianaje. Eyaya huo dahua meenaje pea'ai Eyacuiñajji bihuiajji. ¹⁸Jamajjeya eya Eyacuiñajjija equi quea quemo huasijje poquinaje. Jomajo nequiya eyaya eme shacua neineinaje quea bojea jayojja epojji. Jamaya poanijo, Jodio cuaa Asia meshijo ba'e cuaa eya ba canaje Eyacuiñajjija equijo oe nei nequi. Quea huiso deja cuana enijje nequi jjima poanaje. Quea shajjaquijjo pojjeama eya poanaje. ¹⁹Ma Jodio cuana Asia meshijo ba'e poe jjima jiquiacua. E huohui sa poanijo oya cuana capoe'yahua minijje mimiya. ²⁰Esohuinano meseya Canio Nisiaa eya nequi mee canaje Jodio etii cuana cojja nei. Jiquio Jodio cuaa ecuea esohui Jodio etii nijje shajja'ajja canaje pea'ai. Jodio etiiya eya quea mimishi eba jojjemo jjeyahua nei huohui ca'yome ecue mimishi. ²¹E'e, jomajo eyaya etii cuana huohuinaje jama

ba'a: “Quijje Eyacuiñajjiya emano'yo cuana shequi mee caje o'oya. Ojjaña eseya shequi mee caje o'oya. Eya jamaya ehuohui poaje jjejojo pea cuaa eya iña canaje” jamaya eyaya etii anaje. E'e, ma esohuijo jiquio Jodio cuaa eya niñeba cani, huohui cani pea'ai. Mahuiso ecuea esohui, emeshi mese Peni. Apoa —Pabohua acanaje.

²²Emeshi mese Penija eba Jesosaja epeeji cuanaja ehuohui'yo.

Jamajjeya ohuaya jama acanaje ba'a: —E'e, quijje esohuinano mese Canio Nisia poe'yajo eyaya huohuije ecuea ejjashahuabaquijji Pabojo. Mahuiso. Apoa —poanaje Peni.

Majoya Jodio cuana esecue yasijje huojeacuayajea majje Peniya sohuinano huojeajji huohui canaje jama ba'a: ²³—;Sohuinano cuana huojeacue Pabo nijje! ;Oya jaahuana neineicue! ;Ojaya epeeji cuaa aquiana, bobi pea'ai o que caye cahua! ;O que ca'anicuahua pea'ai! —acanaje emeshi meseya Peniya.

Pabohua Peni, oya huanase Nosiya pea'ai sohuihuoime acanaje

²⁴Majoya quijje pishana Peni oja huanase nijje, Nosiya nijje poe o'oyanaje Pabo baa. Nosiya aje oe Jodio epona poanaje. Jamajjeya ohuaya Pabo iyaa mee majje jama acanaje ba'a: —Pabo, ¡Jesosa Quitoja esohui mo huohucue Jesosa Quito nijje jjapeequianijo! Eyaya shajja'ajja sa aña.

²⁵Jamajjeya Pabohua Jesosaja esohui huohui canaje jama ba'a: —¡Eyacuiñajjiya esohui jayojja jama ba'ecue quea pame nee! ¡Jashahuabaquicue! ¡A'a quea mimishi tii pojji! Quijje poe o'oya majje Jesosaa ojjaña cuana sosequia caje'yo, ma eseya eshe nequiahuaa anequinaje sosejje. Mimishi cuana quea nee nee po tiitii mee caje'yo, quea mimishi ba'enaje sosejje. Ojaya epeeji quea pame cuana ca ca ohuaya quea bihui nee ba'e tiitii mee caje'yo onijje eyajo Eyacuiñajjiya —jama huohuimeya Pabohua acanaje cuana.

Paboya esohui shajja'ajja majje Peni quea mete nee nee poanaje. Jama acanaje ba'a: —E'e, mahuisoya jjeya. Quijje eyaya miya iyaaje o'oya, ecuea pea echacojji chama' poajo.

²⁶Peni jjashahuaba taiquinaje jama ba'a: —Eyaya Pabo iyaaje o'oya enijje emimijji. E'e pojja'a ohuaya eya sosequia caje o pichojea mee'yo sosejje.

²⁷Jamatii Pabo emeshi mese Enodeja ejjajejanobiaquijji equijo nequinaje beca shequajame. Majoya Shomano emeshi meseya pea dejja Posio Pesito bajjani huojea canaje meshi cuiñasahuajji epojji. Oya Pesito emeshi mese Enodeja equijo ba'enaje. Jamajjeya Peni oja huanase Nosiya nijje poquinaje. Jamatii Penija Jodio etii cuana onijje quea bihui nee epojji Pabo pichojea mee'yo jjima poanaje. Jamatii ejjajejanobiaquijji nequi tii Pabo jiña ca'yonaje.

Pabohua emeshi mese eyacua Pesito sohuihuohui canaje

25 ¹Jamajjeya Shomano emeshi cuiñasahuajji eyacua Pesito Sesanea cuiñajji nequinaje. Pea beca peejjima cahuime po majje oya poquinaje Jenosanena huasijje. ²Jomajo Eyacuiñajji nijje mimiani etii cuaa, Jodio etii cuaa

pea'ai Pabo niñeba canaje emeshi cuiñasahuajji Pesitoja eshajja'ajjaji. ³Pesito nijje mimi huicha'a huicha'anaje jama ba'a: —Emeshi mese Pesito, ¡che oe Pabo huoojeacue Jenosanena huasijje ecuana nijje mimiya! —nisho acanaje Jodio cuaa. Oya cuana aje oe jjashahuaba taiquinaje Pabo cuiaje'yojji ejiojjijje poquianijo.

⁴Pesitohua Jodio cuana saja'a canaje jama ba'a: —Chojja. Pabo jiquiacua epoejji pojjeama. Eyaya oya cuiñaña Sesaneajo mei equi ejjajejanobiaquijjijo. Quijje pishana eya poquije o'oya Sesanea huasijje. ⁵¡Pabojo mimi sa poanijo miquianajaya etii cuana huoojeacue enijje Sesanea huasijje! Jocuama ohuaya Paboja mimishi cahuohui cahua. E'e pojja'a oya mimishi'ama, caba'ajja —poanaje Pesito.

⁶Majoya Pesito nequinaje Jodio cuana nijje Jenosanenajo me oejje pea beca peejjima, 8 cahuime. Majoya oya poqui o'oyanaje Sesanea huasijje. Oe cahuime po majje oya anioquenaje pea equijo, etii ojee chacochacoani equijo. Majoya ohuaya pea dejja huoojea canaje Pabo jjequiya. ⁷Pabo poe'yajo Jodio etii cuana ma Jenosanenajo ba'e cuana o que jjanequichipiquinaje; oya panajajinaje. Pabojo quea huiso siajje poanaje, de.

⁸Majoya Pabohua huohui canaje jama ba'a: —Eya quea mimishi pojjeama poani. Jodio etiiquiana cuanaja esohui etehue'yo pajea'yo jjima ecuea. Eyacuiñajjija equi quea jehue jayojja po mee jjima. Shomano emeshi mese ecuea niñeba jjima pea'ai —poanaje.

⁹Majoya Pesitohua Jodio cuana quea bihui nee po mee sa acanijo huohui'ajja canaje jama ba'a: —Pabo, ¿a'a miya Jenosanena huasijje poqui sa poani? Jomajo Jodio etii cuanaja esohui mijo eyaya shajja'ajjaje, miquea esohui shajja'ajjaje pea'ai. Ojjaña shajja'ajja majje eyaya mijo jjashahuabaqui majje huohuije ecuea ejjashahuabaquijjijo —poanaje Pesito.

¹⁰—Chojja —saja'ame acanaje Pabohua—, eya jiquiojo tii yani, Shomano etijja equijo. ¡Jiquio Shomano etiiya, miyaya pea'ai onaja esohui ejo shajja'ajja majje huohucue miquea ejjashahuabaquijjijo! Eya Shomano dejja. Jamajjeya Jodio cuanaja eya ecuiaje'yojji pojjeama. Ecuea Jodio cuana quea mimishi ajjima, de. Jamaya miquea eba. ¹¹Ecuea emeshi meseja etehue'yo jama ajjima jojjemo, mimishi ya pea'ai jojjemo eya mano mee'yomeya. Ecuea mimishi ajjima jjojya ca ca miyaya e equia meejji pojjeama mimishi cuanaja ecuiaje'yojji. Jamaya emeshi mese etijja esohui poani. Eya ca ca ñña Shomano emeshi mese etii nijje mimi sa poani, Sesa nijje. Ecue sohui shajja'ajja majje ohuaya cahuohui cahua ojaya ejjashahuabaquijji ejo —Pabohua acanaje.

¹²Majoya Pesito o chacosahuajji nijje ojee mimi majje Pabo huohui canaje jama ba'a: —E'e, eyaya miquea esohui jayojja jama aje: Miya huoojeaje Shomano emeshi mese etii yasijje, Sesa que. Miya shajja'ajja majje ohuaya huohui caje ojaya ejjashahuabaquijji mijo —jamaya po majje Pesitohua ojjaña huoojeacuaya ca'yonaje.

**Pabo miminaje Jodio meshi mese Anipa nijje
Anipaja jjo'yase Menise nijje pea'ai**

¹³Quijje pishana Jodioja emeshi mese etii Enodeja osecua Anipa bajjani oja jjo'yase Menise nijje poeyanaje Sesanea huasijje Pesito baa, emeshi cuiñasahuajji eyacua baa. Pesito nijje quea bihui nee mimiminaje jama ba'a: —E'e Pesito, miya emeshi cuiñasahuajji eyacua Sesaneajo. Jamaya quea pame nee. ¡Quea bihui nee pocue! —ohuaya Pesito acanaje.

¹⁴Majoya Anipa Pesito nijje nequinaje oe pojji cahuime. Pesitohua Anipa huohui canaje Pabojo jama ba'a: —Emeshi mese Anipa, yahuajo e poe jjimahuajo pea emeshi cuiñasahuajjiya Peniya Jodio dejja Pabo bajjani jiña canaje ejjajejanobiaquijji joo, jiquio ejjajejanobiaquijji joo. ¹⁵Eya Jenosanena huasijje poquiyajo, Jodio Eyacuiñajji nijje mimiani etii cuaa, Jodio etii cuaa pea'ai Pabo niñeba neinei canaje. Jama amajamaja canaje ba'a: “¡Pabo quea mimishi nee nee po titiiani! ¡Oya oe cuiajea'yocue!” acanaje cuaa. ¹⁶Eyaya Jodio cuana jama anaje ba'a: “Ecuana ca ca pea, Shomano dejja cuana. Miquianajaya ehuohui ca ca oe shajja'ajja majje eyaya oya equiajji pojjeama miquea ecua'yoyji. Chojja. Pabohua miquiana cojja nei nequi majje cahuohui cahua pea'ai. E'e, Shomano emeshi meseja etehue'yo jama ba'a: “Dejjaa peaja ehuohui ojo shajja'ajja majje ohuaya cahuohui pea'ai cahua, ona cojja nei nequiya”. E'e pojjaa' a miquianaya Pabojo sijje poani” jamaya eya poanaje. ¹⁷Jamajjeya Jodio etii cuana jiquiacua poe majje, oe cahuime po majje eya anioquenaje etii cuana nijje. Majoya eyaya Pabo iyaa meenaje huohui pohua. ¹⁸Majoya Pabo poeyajo Jodio etii cuana nequinaje huohui epojji. Jamatii oya cuanaja Pabo quea mimishi nei poanaje huohui jjima. Ecuea ejjashahuabaquijji jama huohui jjima, Jodio etii cuanaja. ¹⁹Jodio etiiquianaja etehue'yojo ca ca janobajjima nei Pabo mimicuiajejanobiajea canaje. Jesosajo, ma yahuajo mano'ya poajo pea'ai mimicuiajejanobiajea canaje. Pabohua pa huohui canaje Jesosa shequi o'oya poa. ²⁰Ma esohui Jesosajo ecuea ba jjima. Jiquiojo ba meeme aija. Jamajjeya eyaya Pabo huohui'ajjanaje jama ba'a: “Pabo, ¿a'a miya Jenosanena huasijje poqui sa poani? Jomajo eyaya huohuije ecuea ejjashahuabaquijji mijo, Jodio etii cuana shajja'ajja majje” eyaya a'ajjanaje. ²¹Jamatii Pabo Jenosanena huasijje poqui sa po aija. Ohuaya eya huohui canaje jama ba'a: “Eya ca iña emeshi mese etii nijje mimi sa poani, Sesa nijje. Ohuaya ecuea esohui shajja'ajja majje cahuohui cahua ojaya ejjashahuabaquijji ejo” jamaya eya acanaje. Jamajjeya eya jama poanaje ba'a: “E'e, quijje eyaya miya huoojeaje emeshi mese etii que, Sesa huasijje” eyaya oya anaje —jamaya Pesitohua Jodio emeshi mese Anipa acanaje.

²²Majoya Anipaa jama acanaje ba'a: —E'e Pesito, eya Pabo shajja'ajja sa poani.

—E'e, emeshi mese —poanaje Pesito—, ¡mecahuajje miyaya Pabo shajja'ajjacue!

²³Jamajjeya mecajjeahua Anipa oja jjo'yase Menise nijje poeyanaje daqui quea nahue nee nee, emeshi meseja daqui huosho majje. Ojjaña cuaa oya cuana bihuia canaje, quea shajjaquijjo sajeame acanaje. Equi quea quemo huasijje, ma etii cuana chacochoconi yasijje dobiquinaje Pabo shajja'ajjaa. Sohuinano huoojeajji, etii cuana, Sesanea cuiñajji mese nijje ma equi yasijje dobiquinaje pea'ai. Ojjaña anioque majje Pesitohua pea dejja huoojea canaje Pabo iyaa. ²⁴Pabo poe'yajo Pesito jama poanaje ba'a: —Emeshi mese Anipa, ojjaña etii jiquiojo nequi pea'ai, ¡shajja'ajjacue mo! Ojjaña Jodio cuaa jiquio cuiñajji ba'eya, Jenosanenajo ba'eya pea'ai jiquio dejja Pabo niñeba cani. Oya cuana taaa majamajani jama ba'a: “¡Pabo cuijaja'yocue! Oya quea mimishi nee nee po tiitiiani”. ²⁵Jamatii Pabo shajja'ajja majje eyaya banaje oya mimishi'ama. Jamajjeya eyaya pea cuana oya cuia mee jjima anaje. ¿Yajjajo jja ecua'yojji? Oya mimishi'ama. Majoya Pabohua eya jama acanaje ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahubaquijji ejo” jamaya Pabohua eya acanaje.

—Jamajjeya eyaya oya huoojeaje Shomano emeshi mese etii yasijje huohuiya. ²⁶Jamatii oya mimishi po jjimajo, ¿yajja tehueme shai eyaya Shomano emeshi meseja ebajji aje? Jamajjeya eyaya oya ye meenaje miquiana que. ¡Oya shajja'ajja majje eya huohucue miquea ejjashahuabaquijji ojo! Emeshi mese Anipa, Jodio cuanaja ehuohui'yo miquea eba nei nei. Jamajjeya miquea ehuohui Pabojoy eyaya tehueje Shomano emeshi mese etii yasijje, ojaya ebajji. ²⁷Eya ca iña jjashahuabaquiani jama ba'a: Ecuea Pabo ehoojeajji pojjeama ojaya mimishi cuana tehue'yo jjimajo. Chojja, jama po ajja ca iña —poanaje Pesito.

Pabo emeshi mese Anipa nijje miminaje

26 ¹Majoya Anipa Pabo nijje miminaje jama ba'a: —E'e Pabo, ¡mimicue! ¡Miquea mimishi chamajo ecuanaya huohucue ecuanaja ebajji! —acanaje Anipaa.

Jamajjeya Pabohua eme jeasohua majje ojaya eba'ejjijo huohui canaje jama ba'a: ²—Emeshi mese Anipa, ojjaña miquea eba. Jodio etii cuanaja esohui ejo miyaya shajja'ajjanaje. Jamajjeya ecue sohui shajja'ajjanajo, eya quea bihui nee. ³E'e, Jodio etiiquianaja etehue'yo, ehuohui'yo cuana pea'ai miquea eba, ojjaña. Miquea eba pea'ai jjeyahua nei Jodio cuana jjamimicuijaja nobiajeaquiani esohui quea pame nee Jeosajo. Jamajjeya ¡ecuea esohui quea bei shajja'ajja socue! ⁴Ecuea eba'ejji eya esho'yahua ojjaña Jodio cuanaja eba. E'e, ecuea cuiñajji ba'yahua, Jenosanenajo ba'e pea'ai eya ojjaña Jodio cuanaja eba. ⁵Yahuajo eya Paniseo jayojja ba'enaje e'e jojo nei. Jamaya ojjañaja eba. Jamaya cahuohui cahua, ca ohuaya huohui'yo sa amajje —Pabo poanaje.

⁶—Yahuajo nei nei Eyacuiñajjiya esejaya etiiquiana huohui ca poa jama ba'a: “Ojjaña emano'yojaa cuana eyaya shequi meeje o'oya quijje” poa.

Jamaya eseya sa poani. Ma esohui huohuiañajo, Jodio etii cuaa eya iña canaje. Jiquiacua eya jjequi canaje cuaa minijje emimijji.

7—Ecuanaja, Jodio cuanaja 12 etiquiaa maya ehuohui'yo shajja'ajja ca poa yahuajo nei nei. “E'e jojo nei ojjaña eseya mano'yo majje shequije o'oya. Jamaya amee caje o'oya Eyacuiñajjiya” Jodio etiquiaa aca poa. Jamajjeya ecuaya, Jodio cuaa Eyacuiñajji bihuia tiitiñaña ojjaña pojja, mecajje pea'ai. Jamatii eyaya maya huohuiañajo Jodio cuaa aje oe eya niñeba cani jjeja, tecuea cani pea'ai. 8Emeshi mese Anipa, miya Jodio dejja pea'ai. ¿Apiojji acuae miqianaaya, Jodio cuaa jjabahuejjaqui ajja Eyacuiñajjiya emano'yo cuana shequi mee caje o'oya? —Pabohua acanaje.

9—E'e Anipa, yahuajo nei eyaya pea'ai Jesusaja epeeji cuana napa majamajanaje quea huiso, ma Nasanenajo ba'ya poaja epeeji cuana. Eya jjashahuaba taiquinaje jama ba'a: “Jesusaja epeeji napajji cuana quea pame poani”. 10Jamajjeya eyaya Jesusaja epeeji Jenosanenajo ba'e napanaje quea huiso. E'e, Eycuiñajji nijje mimiani etii cuaa eya esohui etehue'yo quia canaje Jesusaja epeeji cuana jeanobiajea meejji. Majoya eyaya Jesusaja epeeji cuana iñanaje, jeanobiajeanaje ejjajeantobaiquijji yasijje pea'ai. Onaaya Jesusaja epeeji cuiajea canajejo, eyaya jama anaje ba'a: “E'e, ¡cuiajea'yocue!” anaje eyaya. 11E'e, yahuajo eya poqui majamajanaje ojjaña Jodioja equi ejjachichaiquijji cuana huasijje Jesusaja epeeji cuana cuiajea, Jesosa nijje ejjapeequi pajea'yojji nisho. Eya quea quene nee nee ona nijje po majje poquinaje pea cuiñajji cuana huasijje, pea meshi yasijje Jesusaja epeeji cuana napaa.

12—Majoya Eyacuiñajji nijje mimiani etii cuaa eya huoojea canaje Damasico huasijje Jesusaja epeeji napaa. Eya quia canaje esohui etehue'yo jama ba'a: “Pabo Jesusaja epeeji cuana iña meesahuacue”. Majoya eya poquinaje Damasico huasijje. 13Emeshi mese Anipa, Damasico huasijje ejiojjijje poquijeya, eshequi biacojjajja nequijo eyaya eyajo banaje ejeajijijji quea jiji nee nee, eshequi jayojja jama pojjeama, quea jiji ja'a nee nee. Dejja cuana enijje poquiani jeaja'a neinei canaje pea'ai. 14Jamajjeya ecuana meshi yasijje oquequinaje quea mete nee nee jjejojo. Majoya eyaya pea eyajo enijje mimiani shajja'ajjanaje. Enijje miminaje Emeo esohuijo jama ba'a: “Sanoni, Sanoni, ¿apiojji acuae miyaya eya napaña? Quea bicho nee nee poaje ecuea epeeji cuana napa majje. ¡A'a quea sapa ca'a pojji!” poanaje. 15Majoya eyaya jama anaje ba'a: “Emeshi Mese, ¿ae bajjani acuae miya?” Jesosa eyajo aniya eya jama saja'ame acanaje ba'a: “Eya Jesosa. Miyaya eya napaña, ecuea epeeji cuana pea'ai. 16¡Jamajjeya nequisohuacue jjeyahua nei! Eya mi que jjanequipanaquinaje mi jjabahuejjaqui meejji. Miya enijje chacochoje, ecue sohui huohuijji poaje. Ecuea esohui jjeyahua nei miyaya shajja'ajjanaje, eya banaje pea'ai. Quijje pishana eyaya miya quea huiso ba meeje ejo. Maya miyaya huohuije ojjaña huasijje. 17Jodio cuaa napa cajo eyaya miya jaahuanaje. Eyaya miya huoojeaje Jodio pojjeama cuana huasijje. Onaa mi napa cajo, eya mi jaahuanajji poaje. 18E'e, eyaya

miya Jodio pojjeama cuana huasijje huoojeaje. ¡Miyaya oya cuana ecuea ejiojji ba meecue eyahuasijje epoqui'yojji! ¡Miyaya oya cuana enijje jjapeequi meesahuacue quea ja'a nee nee eba'ejji, Edosiquiana nijje, Satanasa nijje epoqui majajji pojjeama! ¡Maya oya cuana pajea mee'yocue Eyacuiñajjija esohui jayojja jama eba'ejji! ¡Enijje jjapeequi meesahuacue! Jamajjeya eyaya ojaya mimishi cuana cuijeaje'yo. Oya cuana ba'e tiiti meeje'yo eyajo ojjaña ecuea epeeji cuana nijje pea'ai" jamaya Jesosaa eya huohui canaje —Pabo poanaje.

19—Emeshi mese Anipa, eyaya Jesosaja esohui shajja'ajjanaje. Ohua huohui canaje jayojjaya eyaya anaje. 20Ebionei eyaya Jesosaja esohui quea pame nee huohuinaje Damascicojo ba'eca cuanaja eshajja'ajjajji. Majoya Jenosanena huasijje poe o'oya majje eyaya ojjaña cuana sohuihuohuinaje. Majoya eya poquinaje ojjaña cuiñajji yasijje Jodea meshijo. Esohui quea pame nee Jesosajo huohui poquianaje. Jodio pojjeama cuana pea'ai eyaya sohuihuohui poquianaje jama ba'a: “¡Miquea mimishi cuana pajea'yocue! ¡Jesosa nijje jjapeequicue! ¡Quea pame nee ba'ecue! Jamaya onaaya ba caje miya e'e jojo nei Jesosaja epeeji poani, eshahuaja pojjeama” jamaya eyaya ojjaña cuana huohui poquianaje —Pabo poanaje—. 21Eya jamaya ehuhui poaje jjejojo Jodio etii cuaa eya iña canaje Eyacuiñajjija equi quea quemajo nequi. Eya cuiajea'yo sa acanaje cuaa. 22Jamatii Eyacuiñajjija eya jaahuana canaje. Jamajjeya ojjaña pojjaño yahuajo, jjeya pea'ai eyaya ojjaña huasijje esohui quea pame nee Jesosajo huohui tiitiaña. E'e, ojjaña emeshi mese cuana huasijje, ojjaña etii cuana huasijje, ojjaña pea cuana huasijje pea'ai eyaya esohui huohuiaña pea'ai. Emeshi mese Anipa, yahuajo nei Moisesiya, Eyacuiñajjija pea esohui huohuijija yahuajo nei ba'e cuaa pea'ai esohui huohui ca poa jayojja jama eyaya esohui huohuiaña jama ba'a: 23“Eyacuiñajjija huoojea'yo ojjaña jaahuanajji Quito quea mimishi acaje'yo cuaa. Oya quea nee nee po mee caje'yo, ba'ehuanasohuajea caje'yo emano'yojji. Jamatii oya emano'yojaa Eyacuiñajjija oya shequi mee caje'yo, oja Chiiya. Ojaya ebionei eyami eyacua poaje'yo. Ohuaya Jodio cuana huasijje, Jodio pojjeama cuana huasijje pea'ai esohui huohui caje: Mimishi cuana cuijea mee'yo majje ba'e tiitii mee caje'yo onijje eyajo” jamaya pea'ai eyaya huohuiaña, de —jamaya Pabohua emeshi mese Anipa, ojjaña cuana onijje ani pea'ai huohui canaje.

24Pabohua jamaya huohui cajo, Pesitohua oya jama acanaje ba'a: —Pabo, quea huiso esohui etehue'yo ba majamaja majje eniñepoqui'yo jayojja jama poani miya —acanaje Pesitohua.

25—Chojja emeshi mese Pesito, eya quea jjashahuabaqui quehua poani pojjeama, eniñepoqui jayojja pojjeama poani. Ecuea esohui e'e jojo nei, quea ja'a nee pea'ai. 26Jamaya emeshi meseja Anipaja eba. E'e emeshi mese Anipa, ojjaña Jodio cuanaja esohui etehue'yo miquea eba. Jamajjeya eya minijje mimiani bicho'ama. Ecuea esohui, Jodio etii cuanaja esohui pea'ai quehuajje huohui jjima. Jamajjeya ojjaña ma

esohui cuanajo miya quea ja'a nee jjashahuabaquinaje —Pabo poanaje—. ²⁷Ecuea emeshi mese Anipa, ¿a'a miyaya Eyacuiñajjija esohui huohuijijja esohui cuana shajja'ajjaña? Ecuea eba miya; jiquio esohui miyaya quea ja'a nee shajja'ajjaña —Pabohua Anipa acanaje.

²⁸Majoya emeshi mese Anipaa Pabo jama acanaje ba'a: —Pabo, miquea emimi oe pojji poanaje. Jamatii miyaya eya Jesosaja epeeji po mee sa aña jjeya nei —poanaje Anipa.

²⁹—E'e emeshi mese Anipa, eya miquianajo mimiani Eyacuiñajji nijje, miquiana Jesosaja epeeji epojji jjeyahua nei, quijje pishana pojja'a. E'e, ojjaña miquianaya jiquiojo nequi Jesosaja epeeji eyaya po mee sa aña e jayojja epojji, jamatii jiquio ecua eya baa jjonojji jama epojji pojjeama miquianaya —Pabohua acanaje.

³⁰Majoya emeshi mese Anipa nequisohua majje ojaya emeshi cuiñasahuajji Pesito nijje, Pesitoja jjo'yase Menise nijje, ojjaña etii onijje ani pea'ai poquinaje pea equecuayijji yasijje Pabojjo mimiya. ³¹Pea equecuayijji yasijje anioque majje ojee mimimiminaje; jama poanaje ba'a: —Jiquio dejja Pabo quea mimishi pojjeama. Jamajjeya oya ecuiajea'yojji pojjeama, ejeanobiajea'yojji pojjeama tii. ³²Anipaa Pesito huohui canaje jama ba'a: —Pabo emeshi mese Sesa nijje mimi sa po'yo ajja jojjemo ecuaaya oya pichojea'yome. Jamatii ohuaya yahuajo huohui canaje jama ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijijjo ejo”. Jamaya poanajejo ecuanajaya oya epichojea'yojji pojjeama —poanaje Anipa.

Pabo besapoquinaje Shoma huasijje, Itania meshi yasijje

27 ¹Ecuea epeeji Teopino, eyaya Nocaa jiquio banaje ecuea ecojjaa. E'e, eya Pabo nijje poquinaje. Jamajjeya ¡ecue tehue ba neineicue! Jama poanaje ba'a: Emeshi mese Anipa pea cuana nijje mimi majje jama huohui canaje ba'a: —E'e, jjeyahua nei ecuaaya Pabo hoojeaje Itania meshi yasijje Shomano emeshi mese etii baa, Sesa baa —acanaje.

Jamajjeya jama amajje ohuaya Pabo, pea cuana eme jeyo'yo pea'ai quia canaje sohuinano hoojeajji Joño bajjani yasijje, Itania meshi yasijje edojjji. Joño Shomano dejja cuanaja meshijo ba'e, Itania meshijo. Oya emeshi mese etijja sohuinano cuana hoojeajji poanaje, Sesaja. ²Majoya Joño Pabo, pea cuana pea'ai ani mee canaje bishe ai yasijje ecuaana nijje. Ma bishe ai mese Anamitio cuiñajjijo ba'e poqui sa poanaje pea cuiñajji cuana huasijje, Asia meshi yasijje. Ojjaña apoa poajo, ebishe mese besapoquinaje. Ecuana Anitaco nijje besapoquinaje Pabo nijje. Anitaco yahuajo Tesanonica cuiñajjijo ba'enaje, Masenonia meshijo. Oya Pabo chacosahuajji poanaje. ³Majoya quea huesha nee besapoqui majje ecuaana Sinono cuiñajji yasijje ba'eñaquinaje. Ba'eñaqui majje Joño Pabo quea pame nee acanaje;

oya poqui mee canaje ecuana nijje Jেসosaja epeeji cuana baa, bobi ijiaa, aquiana chichaa pea'ai ebesapoquiji. ⁴Majoya bishe aijo ani o'oya majje ecuana Sinonojo ba'e besapoqui o'oyanaje. Beni quea quemohua bishe hui cuiasehuijea cajje enashajohua nane canaje. Jamajjeya ebishe mese besapoquinaje Chipe nasi yasijje. Chipe nasi shanijje, beni chama huasijje besapoquinaje, enashajo ai chama huasijje. ⁵Majoya Chipe nasi yejje majje ecuana bae ojje miji yasijje, ena poeji miji yasijje besapoquinaje, Sinisia meshi chipi nei, Panipinia meshi pea'ai yejjenaje quea chipi nee. Majoya besapoquinaje Nisia meshi yasijje. Miña cuiñajji yasijje ba'eñaquinaje.

⁶Miña cuiñajjijo ba'eñaqui majje ecuanaja aquiana cuana jeasohuaquinaje etaja huasijje. Majoya Joñohua pea bishe ai sa'ajja canaje Itania meshi yasijje ebesapoquiji. Bishe ai Anejanía cuiñajjijo ba'e Itania meshi yasijje besapoquiani ba majje Joñohua ojjaña dejja cuana eme jeyo'yo ma bishe aijo ani mee canaje. Majoya ecuana besapoquinaje. ⁷Jamatii quea cahui huiso ecuana jipashineijje besapoquinaje. Beni pajijjiya enashajo quea 'aa nee nee aniya bishe ai nane canaje, hui cuiajjoti canaje pea'ai. Ebesapoquiji quea camaja poanajejojo, quijje pishana ecuana poeyanaje Nido cuiñajji yasijje. Beni quea quemojjo bishe beni poeji miji yasijje besapoqui meeme ajja poanaje. Jamajjeya beniya ecuana dojjea canaje eeno poeji miji yasijje. Nasi quea quemo Queta nasi bajjani yasijje dojjea canaje. Queta nasi shanijje, benima huasijje besapoquinaje. Nasi huijje jayejequinaje Sanomo meshi bajjani huijje. Majoya beniya ecuana dojjea canaje Queta nasi pea miji yasijje. ⁸Nasi sahuajje quea besapoqui camaja poanaje. Jamajjeya ecuana Enashajoma' cuiñajji yasijje ba'eñaquinaje, Nasea cuiñajji chipi nei.

⁹Ebesapoqui'yo quea cahui huiso nee nee poanaje. Jamajjeya jjuhuee she poanaje. Jjuhuee shejo quea beni quemojjo, enashajo quea quemo nee nee poanajo bishe hui'i'yo chana'. Jamajjeya Pabohua ojjaña cuana bishejo nequi jama acanaje ba'a: ¹⁰—Epeeji cuana, ¡shajja'ajjacue mo! Ecuea eba ecuana jjeyahua nei besapoquiajo quea camaja nee nee poaje. Bishe hui'ije'yo, aquiana cuana bishejo ani hui'ije'yo pea'ai. Eseyá pea'ai hui'i'yo chana' —Pabohua acanaje.

¹¹Jamatii sohuinano huoojeajji Joñoja Pabo shajja'ajja jjima. Ebishe meseja esohui, bishe huijeajjija esohui pea'ai ca ca shajja'ajja canaje. Onaaya huohui canaje jama ba'a: —Ecuana jjeyahua nei bishe aijo besapoquije. Ehui'i'yojji pojjeama, de. ¹²Enashajoma' cuiñajji quea tai poaje eeno shejo. Jiquiojo ba'e mee ajja; quea huoe nee nee poaje —acanaje cuaa.

Jamajjeya beshahua nei ojjaña dejja cuana jomajo nequi sa po'yo ajja poanaje. Besapoqui sa poanaje quea huesha Penise cuiñajji yasijje. Jama poanaje ba'a: —E'e pojja'a eseya dojo caje Penise yasijje, beni chama pishana huasijje. Jomajo nequije eeno shejo —poanaje cuana.

Enashajoma' cuiñajji beni poeji mijijje nequi; Penise ca ca pea ojje mijijje nequi.

Benipajiji quea quemohua bishe nane canaje

¹³Jamajjeya beni biso nei eeno po'yajo, dejja cuana ma bishejo nequi quea bihui nee jama poanaje ba'a: —E'e, jjeya quea pame nee ebesapoquiji beni sisijo. Cua'a, ebesapoqui —poanaje ojjaña.

Jamajjeya bishe picho canaje, besapoquinaje Queta nasi sahuajje quea chipi nee. ¹⁴Jamatii quijje pishana beni quea quemo nee ena poejji mijijje poeyanaje. ¹⁵Benipajijiya janobajjima nei bishe nane canaje. Beniya bishe huijea canaje. Ebishe meseya beni poejjeje bishe poqui meeme ajja poanaje. Quea camaja nee neejojo ojjaña hueahueanaje. Jamajjeya beniya bishe jamatii dojo canaje. ¹⁶Caona nasi sisi chipi nei yasijje bishe dojo canaje beniya. Caona nasi shanijje jjayejjequianijo beni nequioque pishanaquinaje. Jamajjeya bishe sisi quea pame jeyojaca'ajja canaje bishe ai pejjejo. Quea camaja poanaje bishe ejeyojacajji beni yejje. ¹⁷Jamajjeya bishe sisi bishe ai biajje jjequisohua majje jeyo canaje. Bishe ai jeyo ca'a canaje pea'ai jjono quea quemohua. Ebishe ai meseya jama acanaje ba'a: —Beniya bishe ai dojo ca chana' meshijaji yasijje, Sinite meshijaji quea chipi nee yasijje. Daqui quea quemo equecuaquini eyajo ba'eya beniya bishe dojocuaji ca chana' —acanaje.

Jamajjeya ma daqui cuana bebo ca'yonaje cuaa beni quea quemajo. Majoya bishe jamatii dojo canaje beniya. ¹⁸Beni quea quemo po tiitianiyo mecajjeahua ecuaaya aquiana cuana bishejo ani jeoqueajejanaje ena huasijje, bishe quea peja epojji nisho. ¹⁹Pea pojajajo aquiana cuana quea biquie, bishe chacojji cuana jeoqueajejanaje ena huasijje pea'ai. Jjono cuana quea quemo quea huiso pea'ai jeoqueajejanaje ena huasijje bishe quea peja epojji nisho. ²⁰Quea huiso cahuime benipajiji po tiiti nequinaje. Quea misi nee poanaje. Eshequi chama' poanaje, majameta cuana pea'ai. Ojjaña cuana quea mete nee jjashahuabaquinaje jama ba'a: —E'e de, hui'ije'yo se, de.

²¹Quea mete jjejojya ojjaña cuana ijja'ijja jjima nequinaje quea huiso cahuime. Majoya Pabo ojjaña cojja nei nequinaje. Huohui canaje jama ba'a: —Epeejji cuana, yahuajo eseya Queta nasijo nequi eyaya miqianaya huohui'ajjanaje eseya poqui majje hui'yo chana'. Jamatii miqianaya jjashajja'ajjaqui sa po ajja poanaje. Yahuajo ecuea esohui miqiaaya eshajja'ajjanaje jojjemo aquiana quea huiso ena huasijje jeoqueaje'yo jjima poquiaye. Jiquio bishe pea'ai hui'yo jjima pome. ²²Jamatii ja'a quea mete pojji! Ecuea eba jama ba'a: Jiquio bishe hui'ije'yo. Jamatii eseya hui'yo ajja poaje. ²³E'e, eya Eyacuiñajjija epeejji, ojaya esohui huohuijji. Eyacuiñajjiya eya jaahuana cani. Mecajje ojaya esohuidojojji huoojea canaje enijje mimiya. ²⁴Jama poanaje ba'a: “Pabo, ja'a quea mete pojji! Eyacuiñajjiya miya huoojea caje Shomano emeshi mese yasijje esohui huohuiya. Jamajjeya Eyacuiñajjiya miya jaahuana caje, miya quea pame nee acaje. Jamajjeya ojjaña cuana minijje besapoquiani pea'ai ohuaya jaahuana caje'yo, ehui'yojji pojjeama” eya acanaje esohuidojojjiya. ²⁵Ja Jamajjeya quea bihui nee pocue! Eyacuiñajjija

esohui jayojja jama ohuaya acaje e'e jojo nei. Jamaya ecuea eba. ²⁶Jamatii beniya bishe dojo caje nasi yasijje; cuiayiyeeja caje. Jaañaqui majje cuiapojojea caje meshijajjo enashajo quea quemohua —Pabohua acanaje.

²⁷Majoya quea cahui huiso nee nee, 14 cahuime bishe jamatii dojo canaje beniya. Bishe dojo canaje bae sahua huasijje, Adia ena huasijje. Mecashono bishe chacojji cuaa jama acanaje ba'a: —E'e pojja'a eseya meshi chipi nei dojo cani beniya.

²⁸Majoya ohuaya aquiana quea biquie jeyo canaje quea jjono aojo. Jeaoquea canaje ena huasijje. Ipia'ajja canaje ache doe ebajji. Jjono quea aojo ba canaje ena quea doe nee nee, 36 metro doeme. Majoya quijje pishana ipia'ajja ca o'oyanaje. Ba canaje ena quea doe pishana, 26 metro doemeya. ²⁹Jamajjeya quea ajjajja nee nee poanaje jama ba'a: —Beniya bishe dojo caje, cuiayiyeeja capoquije bajjoo ani yasijje. Bishe jjacuiapojojeaquiñaquije nei nei, de, bajjoojo pojja'a, de —taaame poanaje.

Jamajjeya bishe chacojji cuaa ebeca pee pea'ai ejjashehuaquijji iyanobia canaje ena huasijje beniya edojo capoani jjejojo. Jeyo ca'a majje epojja ishoa'ajja po ba'enaje quea mete nee nee. ³⁰Bishe chacojji poani aje oe jjashahuaba taiquinaje ebesapoquijji etaja huasijje, enequisohuaquijji nisho epoquiquehuajji. Mecashono bishe sisi ecapashineijje jeaoqueajea canaje ena huasijje. Sijje poanaje jama ba'a: —Ecuana poquije bishe hui jeyohua. E'e, bishe hui ejjashehuaquijji ena huasijje jeaoqueajea poquije ecuana —jama sijje pomeya poanaje.

³¹Pabohua ca ca sohuinano cuana, sohuinano huojoajji Joño pea'ai huohui canaje jama ba'a: —Chojja. Bishe chacojji cuana bishe aijo mi nequijajo Eyacuiñajjiya eseya ejaahuanajji pojjeama —acanaje.

³²Jamajjeya Paboya sohui shajja'ajja canaje sohuinano cuaa. Jjono cuana bishe sisi ejeyojji'ya jajasejjajea canaje. Jajasejjajea cajje bishe sisi jamatii dojojea canaje se'ejjama'.

³³Beshahua nei jjapojjaquianijo, Pabohua ojjaña ecuana bobi ijia mee canaje. Huohui canaje jama ba'a: —Miquianaya quea huiso nee nee cahuime, 14 cahuime ijia'ijia jjima nequi, cahui jjima nei nequi beni yajjajo, enashajo yajjajo, ehui'ije'yo poso jjejojo. ³⁴Jamajjeya ijia'ijia socue! ¡Bobi ijiaque! O'o mi oe shocuishocuije so'o e'ijia'ijia jjejojo, mano'ama poaje eshocuishocui besapoquijji. Hui'i'yo ajja se poaje bishe hui'i'yajo. Ojjaña eseya jamatii quea pame poaje —Pabohua acanaje.

³⁵Jamaya huohui majje Pabohua pahui iñanequia majje bihuia canaje Eyacuiñajji ojjañaja ecuanaja ebajji. Pahui mijisisi majje ijia canequinaje. ³⁶Pabo ba majje ecuana quea bihui nee poanaje. Jamajjeya bobi ijia pea'ainaje ecuaaya. ³⁷E'e, eseya jiquio bishejo ani dejja mahuiso ba'a: quea huiso nee nee, 276 huisome se poanaje. ³⁸Jamajjeya aje oe ojjaña cuana jeje canaje. Jeje majje quea huiso anoso ai, pahui pohui pea'ai jeaoqueajea canaje ena huasijje bishe quea peja epojji, eba'ecuaya'yojji pea'ai.

Bishe ai hui'i'yonaje

³⁹Jjapojjaquiajo mecajjeahua nei bishe chacojji cuaa meshi quea chipi nee ani ba canaje. Onaja ma meshi ba jjima, ache meshi shai. Huesha'ama meshijaji enashajoma' pishana, quea coe pishana ba canaje. Jamajjeya echacojji cuana poqui sa poanaje bae sahua huasijje, ena coe yasijje bishe ba'ehuanañaquia nisho. Jomajo enashajo quea quemo pishana yani. ⁴⁰Majoya ejjashehuaquijji cuana jajasejjajea canaje, dojojea canaje, ejehuibeje bishe quii ca'ajji ejeyo ba'e jjono jajasejja acanaje bishe epii nei edojo cajji. Majoya daqui quea quemo quecuaquini majje nequiasohua canaje, beniya bishe huijje dojobesa canaje meshijaji yasijje. ⁴¹E'e, beniya bishe ai hui dojobesa canaje. Meshijaji biajje huanasohuajea capoquinaje. Bishe jaañaquinaje. Bishe chacojji cuaa bishe meshijajijo hui jaañaquiajo quecuayijejea'ajja ca'yo nequinaje. Enashajo quea quemohua, quea cuejipashi neeya bishe quiiije nane amajje bishe cuiapojojea canaje. ⁴²Sohuinano cuana jama poanaje ba'a: —Bishe hui'i'yajo, dejja cuana ejeyo nequi meshi yasijje shocuishocui majje poquiquehua chana'. Jamajjeya eseyaya ojjaña joya eme ejeyo ani quecuajea jeyojeyoje'yo —poanaje sohuinano.

⁴³Jamatii sohuinano huoojeajjiya Joñohua Pabo nahue sa acanijo huohui canaje jama ba'a: —Dejja cuana eme jeyo ani ja'a quecuayojji! ¡Pichojea'yocue oe! ¡Joya shocuishocuiani tohuua meecue ena huasijje! ¡Meshi yasijje cashocuishocui besapoquiahua! ⁴⁴¡Pea cuana joya shocuishocui ajja ca ca huepee biajje, bishe ecuiapojojea biajje cuanaya cabesapoquiahua meshi yasijje! —acanaje Joñohua.

Jamajjeya ojjaña cuana meshi yasijje besapoquinaje. Hui'i'yo jjima nei nei cuana. Nequisohuaquinaje etaja huasijje, ojjaña ecuanaya.

Pabo Manita nasijo nequinaje

28 ¹Jamajjeya ojjaña ecuanaya meshi yasijje besapoqui'yonaje. Etaja huasijje nequisohuaqui majje dejja cuana jomajo ba'e ecuaaya banaje. Ohuaya ecuana huohui canaje: —Jiquio meshi Manita nasi bajjani. Quea quemo nasi —acanaje.

²Ese ejja cuana jomajo ba'e mase'ama, quea pame nee nee. Miminaje ojjaña cuana nijje. Enapajiji quea huejo cuaqui quea huiso chicha majje dahuahuoje canaje. Jama acanaje ba'a: —¡Poecue cuaqui yasijje; ojjaña nequiana jjayoqui huacue! ¡Quea pame nee ecuana nijje ba'ecue! —acanaje.

³Majoya Pabohua acui sisi cuana chicha canaje cuaqui. Ma acui sisi cuana cuaqui quea jiji nee, quea quiyo nee yasijje jeajea canijo, peyo se najjiya Pabo me ijja neinei ca'yonaje. ⁴Nasi aijo ba'e dejja cuaa peyohua me ijja caje Pabo ba canaje. Jamajjeya oya cuana ojee mimimiminaje jama ba'a: —E'e jojo nei jiquio dejja pea quecuajji. Jamajjeya oja mimishijo peyohua oya ijja canaje. Oya hui'i'yo jjima bae aijo. Jamatii jjeyahua nei oya manoje'yo oja mimishijo —jama posoya acanaje cuaa.

⁵Jamatii Pabohua peyo jeajea canaje cuaqui yasijje. Nee'ama, mano jjima oya poanaje, shejje jima pea'ai. ⁶Ojjaña cuaa Pabo ba neinei ca aninaje. Jjashahuabaquinaje jama ba'a: —Jjeyahua nei oya shejjeje ba'ajja. Jjeya nei pojja'a oya manojeyo —poanaje.

Chojja, Pabo mano'ama nei nei poanaje. Quijje pishana Pabo quea ja'a nee nee, quea mano pojjeama ba majje ma dejja cuaa oya jama acanaje ba'a: —Oya emano'yojji pojjeama —cuana poanaje.

Jamajjeya onaaya huohui canaje jama ba'a: —Oya dejja pojjeama. Oya pea eyacuiñajji dejja jayojja poeyanaje, de —poso acanaje cuaa ojjaña.

⁷Manito nasi emeshi mese Pomino bajjani poanaje. Ojaya que cuana huesha'ama nequi. Ohuaya ecuana iyaa canaje ojaya equi cuana huasijje. Ecuana nijje miminaje quea pame nee nee. Ojaya equi cuanajo ecuana ba'e mee canaje pea beca peejjima cahuime, Pominohua. ⁸Emeshi mese Pominoja chii ca ca quea mano nee jaa, seeseejo; quea quiyo nee nee pea'ai. Jamajjeya Pabo oja equi quecuayijji yasijje dobiquinaje o baa, emanojaa baa. Ba majje Pabohua ma emanojaa eyami biajje ojaya eme huana canaje Eyacuiñajji nijje emimijji o jjaajaqui mee'yojji. Quea pame nee, quea aja nee Pominoja ejeajji po'yonaje. ⁹Jamajjeya Pominoja chii huaquia'yonaje ba majje ojjaña emanojaa cuana nasi aijo ba'e poeyanaje Pabo que. Jesosaa Pabo ojjaña huaquia meesahua ca'yonaje. ¹⁰Majoya ma dejja cuana quea bihui nee nee poanaje. Aquiana quea huiso ecuana quia canaje sosema'. Quijje ecuana pea bishe ai yasijje anisohuaqui'yonaje. Majoya nasi aijo ba'e cuaa quea huiso pea aquiana cuana eba'ejji ecuana quia canaje sosema'.

Pabo Shoma cuiñajji yasijje besapoquinaje

¹¹Jamajjeya ecuana Manita nasijo ba'enaje pea beca peejjima ba'ime, 3 ba'ime. Majoya ecuaaya pea bishe ai banaje eyacuiñajji beca jaa bajjani, Casito Pono bajjani. Ma bishe ai Anejanía cuiñajjijo jaa poe majje eeno shejo Manita nasijo aniñaquinaje; majoya besapoquinaje Shoma meshi yasijje eba'eñaquijji. Jamajjeya sohuinano huoojajji Joñohua ecuana ma bishe aijo ani mee canaje. ¹²Majoya besapoqui'yo majje ecuana pea nasi yasijje poeyanaje, Sinacosa cuiñajji yasijje ba'eñaquinaje. Jomajo ecuana nequinaje pea beca peejjima cahuime. ¹³Majoya Sinacosajo ani ecuana besapoqui o'oyanaje. Itania meshi yasijje poeyanaje. Shejio cuiñajji yasijje ba'eñaquinaje. Majoya mecajjeahua eeno beni sisi poanaje. Jamajjeya beniya bishe dojo canaje quea pame nee. Beca cahuime po majje ecuana Poteoni cuiñajji yasijje ba'eñaquinaje, Itania meshi yasijje. ¹⁴Poteoni cuiñajjijo Jesosaja epeejji quea huiso cuana ba'enaje. Ohuaya ecuana iyaa canaje oja equi yasijje e'anijji. Jamajjeya ecuana ma cuiñajjijo nequinaje me oeje beca cahuime, 7 cahuime Jesosaja epeejji cuana nijje. Majoya ecuana poquinaje Shoma cuiñajji quea quemo huasijje ejiojjijje. ¹⁵Jesosaja epeejji cuaa Shomajo ba'eya shajja'ajja canaje Pabo poeyani. Jamajjeya oya cuana Pabo ishoa sa po ajja Shomajo. Poeyanaje Apio cuiñajji

yasijje, pea cuiñajji yasijje yohua bajjani yasijje ba'a: Pea Beca Peejjima Equi cuana huasijje pea'ai Pabo baa. Jamajjeya Jesosaja epeejji cuana jomajo tii ba majje Pabo quea bihui nee nee poanaje. Eyacuiñajji bihuia canaje, Pabohua.

Pabo Shomajo ba'enaje

¹⁶Majoya ecuana Shoma huasijje poquinaje. Shomajo nequiñaqui majje sohuinano huoojeajji Joñohua Pabo huohui canaje jama ba'a: —Pabo, ¡miya mee nei ba'ecue jiquio equiojo! —acanjaje.

Jamajjeya oe sohuinano Pabo jaahuanajji nequinaje ma equijo pea'aiya.

¹⁷Majoya pea beca peejjima cahuime po majje Pabohua Jodio etii cuana iyaa canaje. Ojee jjachichaquiajo Pabohua oya cuana huohui canaje jama ba'a: —Epeejji cuana, ¡shajja'ajjacue mo oe! Ecuea Jodio cuana quea mimishi ajjima poanaje. Eseyaya etiiquiana cuanaja esohui pajea'yo jjima ecuea pea'ai. Jamatii eya Jenosanenajo nequi Jodio etii cuaa eya ña canaje. Eya quia canaje Shomano dejja cuana huasijje. ¹⁸Shomano etii cuaa eya huohui'ajja canaje. Jamatii ecuea esohui shajja'ajja majje onaaya eya ba canaje quea mimishi pojjeamajojo ecuiajea'yoyji pojjeama onajaya, ejeanobiajea'yoyji tii pojjeama pea'ai. Onaaya eya pichojea sa acanjaje. ¹⁹Jamatii Shomano cuaa eya pichojea sa acanijo, Jodio etii cuana quea mase nee, quea quene nee nee poanaje. Jamajjeya eyaya jama anaje ba'a: “Shomano emeshi mese etii nijje, Sesa nijje eya mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo” eyaya anaje. Jamatii ecuea Jodio cuana niñeba jjima poanaje, o niñeba sa po ajja eya. Chojja, Jodio cuana ecuea huapa pojjeama cuana. ²⁰Jamajjeya eya miquiana nijje mimi sa poani. E'e, ojjaña Isaeni cuaa ishoa'ajja canaje Eyacuiñajjija huoojea'yo ojjaña jaahuanajji Quito. Quitohua ojjaña cuana ba'e mee caje o'oya eyajo onijje. Eyaya ojo huohuiañajo, Jodio etii cuaa eya jeyo mee canaje baa jjonohua. ¡Bacue jiquio baa jjono ba'a! —Pabohua acanjaje.

²¹Jodio cuaa Pabo saja'a canaje jama ba'a: —Pabo, Jodio cuana Jodea meshijo ba'eja ecuana huasijje esohui etehue'yo mijo huoojea jjima. Ecuana epeejji Jodea meshijo ba'eja poe jjima mi huohuijji pea'ai. Oya cuana poe jjima mi niñebajji epo pea'ai. ²²E'e, ecuanaya miquea esohui shajja'ajja sa poani. Ecuana eba ojjaña meshijo pea cuaa Jesosaja epeejji cuana niñeba cani. Jamajjeya shajja'ajja neinei sa poani ecuanaya —acanjaje Jodio cuaa. ²³Majoya Pabo huohui canaje jama ba'a: —E'e, ecuanajaya epeejji cuana huohui majje ojjaña poeje miquea esohui shajja'ajjaa.

Jamajjeya quijje pishana pea pojjaajo quea huiso Jodio cuana mecajjeahua poeyanaje Pabo shajja'ajjaa. Pabohua esohui huohui canaje quea huiso nee nee. Meca cuanajje oya mimi tiitii nequinaje Eyacuiñajji ojjaña huoojeajji poajejojo. Jodio cuana ba mee sa acanjaje Jesosa Eyacuiñajjija huoojea'yo ojjaña jaahuanajji, Quito. Pabohua Moisesija etehue'yo cuanajo, Eyacuiñajjija esohui huohuijji yahuajo nei ba'eja esohui etehue'yo pea'aijo

Jodio cuana ba mee sa acanaje Jesosa e'e jojo nei Eyacuiñajjija huoojea'yo ojjaña jaahuanajji, Quito. ²⁴Quea huiso Jodio cuaa ojaya esohui shajja'ajja majje huohui canaje jama ba'a: —E'e de, ojaya esohui e'e nei —acanaje.

Pea cuana ca ca ojaya esohui shajja'ajja sa po maja ajja. Jesosa Eyacuiñajjija huoojea'yo ojjaña jaahuanajji pojjeamajo poso quea quene nee poanaje cuana Pabohua jama huohuime acajje. ²⁵Jamajjeya ojee cuana anica jjamimicuiajea nobiajeaqui poquinaje. Ojjaña cuayaquianijo Pabohua jama acanaje ba'a: —Edojjoshahua Pameya Eyacuiñajjija esohui huohuijji Isaia yahuajo nei nei esohui huohui meesahua canaje miquianajaya etiiquiana cuana huasijje. E'e, ¡miquianaya quea sapa ca'a poanijo shajja'ajjacue ojaya esohui etehue'yo! Jama aca poa Isaiaa yahuajo nei ba'a:

²⁶ “Jodio cuana huasijje poqui'yo majje huohuicue jama ba'a:

—Shajja'ajja majamaja majje jamatii ecuea esohui quea quehua poaje miquianajaya. Ba majamaja majje jamatii jjabahuejjaqui ajja poaje. ²⁷Jiquio Jodio cuana quea jjashahuabaqui quehua poani tii tii. Quea sapa ca'a. Jjashajja'ajjaqui sa po'yo ajja. Ba sa po'yo ajja pea'ai. Ba sa pojji jojjemo ohuaya ba ca'yome. Jjashajja'ajjaqui sa pojjiya jojjemo jjashajja'ajjaqui'yome. Quea jjashahuabaqui ja'a po sa pojji jjemo quea jjashahuabaqui ja'a po'yome. Jamajjeya oya cuana ecuea epeejji cuana po'yome. Eyaya ojaya mimishi cuana cuijea'yome pea'ai”.

Jamaya Eyacuiñajjiya Isaia huohui mee ca poa.

²⁸Majoya Pabohua jama acanaje ba'a: —Jamajjeya ¡bacue! Eyacuiñajjiya ojjaña jaahuanajji Jesosa huoojea canaje mano'yohua, mimishi cuana cuijea'yojji, mimishi sosequia'yojji pea'ai. Ohuaya ojjaña ojaya epeejji cuana ba'e tiitii mee caje'yo onijje eyajo. Jodio cuana shajjama' poanijo, Eyacuiñajjiya eya huoojea canaje Jodio pojjeama cuana huasijje ojaya esohui huohuiya. Jodio pojjeama cuaa ca ca shajja'ajja caje, de —Pabohua acanaje.

²⁹Majoya Pabohua esohui huohuijeyo cajo, Jodio cuaa oya jiñajea ca'yonaje. Majoya oya cuana janobajjima nei ojee jjamimicuiajea nobiajeaquinaje.

³⁰Jamajjeya beca shequijame Pabo oe nei ba'enaje oe equijo, ejjeshejji sosejje. Ojjaña cuana o que poeyajo, ojjaña cuana nijje quea bihui nee miminaje, quea bei nee poanaje. ³¹Ohuaya huohui canaje Jesosa ojjaña huoojeajji poaje. Emeshi Mese nei Jesosa Quitojo huohui majamaja canaje mete'ama. Pea cuanaja oya huohui pajea mee jjima poanaje, jamatii oya sohuinano cuanaja nahue poanaje. Jamaya poanaje.

Oeya ecuea esohui. Eya Noca bajjani esohui tehuejji. Apoa.